

Godigo Aga We Bidi Dabe Boi Bidi Nogode Ma Dobola Sali

Hasia nedebo tau sabo po

Te e bukude elalubo po da, te Godigo aga hani Israel dali yali se po da dali pusubo dao. Tama dago te buku Tigidali Nai Gagalama Nigali Side nedeyu da, te nago e bukude po gegebo bugagia koneaibao. Tialima, nago hasia te buku Tigidali Nai Gagalama Nigali Side tede yali se po te nago homugo koneao. Te buku, agai pɛwadage nogi Page Gagalali, tego po page e buku aga pɛwadage nogi Ma Dobola Sali, tede aseai dao.

Te Israel augwali menibadi, Godigo Abraham aga wali asomainogo i wai, tama Godigo Abraham dali bomo yai po daɗu wai, tama te Abrahamgo hani nosali pedaliyu, augwali genuai bomo yai hani bidaibao wai. Te buku Page Gagalalide Abraham dali te sege me aga usu sela suyu, aga ogwa Aisak, te Jekop aga waj dali yali po wai. Hauwa sogo te bidi selago Godigo te augwali dali te bomo yai po Abraham dali daɗu wali te mu po waliwe ma tibo po waliwe, te homu yai.

Godigo gasa bomo yai po me Abraham dali wai. Agai te po wai, “Te Kenan to nago waj dabe nosali pedalobo hani augwalibolo te to mawaiba,” wai. Tama nosali Jekop te toba bidigi pelama, tama agai wai hauwa mu ame nai. Tialima, te Page Gagalali buku silabo sogo te Kenan bulude nasi te sogo genuai mu yai. Tibaso, Jekop aga hani ogomani dali te Kenan to tagalama, Isip buluba bidigi pai. Tama augwali te Isip toba pesiqbadi, Kenan tode bidali, te sogo bidi meba augwaligo Josep te Jekopgo ogwa odasa pelama, Isip toba bidigi pai. Josep te Isip bulude genuai bidi bidibadi, te sogo aga aya, me aga ama dede sege sobadi, agai augwali bugagia tonaluyu, tama te segego augwali dolobeo.

Josep isai digi, tama te sogo kibu be hauwa te 400 bidai. Tama tialima, te nosali, e buku Ma Dobola Sali tede wali te po mu pedelai. Tama te sogo Jekopgo waj dabe te hani Isip bulude me bidai. Tama te hanigo gesi nogi te Israel wai. Polobadu Godigo te nogi Israel Jekopbolo mawai, tama augwaligo augwa ayago waj te nogi sai. Tama meba bidi hani augwaligo Israel hani nogi weyu te po wai, augwali te Hibru hani dao wai.

Tama augwali te Isip bulude bidali sogo augwali te we bidi hauwa bidai, tama augwali bomu meni yai hani bidai, tama te sogo augwa bulu tali me elalui

menio. Augwali dwai mu bidiyu, tama augwali te Isip hanigo se ebo olo we bidi bidai.

Tialima, God agai te Abraham dali daɗi wali bomo yai po te agai gageda palobeo. Menio. Te po agai me konealuai, tama agai te Moses daɗi muyu, te Israel we bidi Isip bulu tagalama odasa pomainogo yai. Tialima, hasia God agai gasagi yai bomo yai se hauwa Isip hani dali elama, tama augwali Israel Isip hanigo bomode bidali tagalama, odasa painogo yai. Te buku Ma Dobola Sali nogi page e tiwai, Godigo aga we bidi hani ma selama, bulu me deli tagalama pai. Tama te nogi te Israel hanigo Isip bulu tagalama, gasa buluba pali te po wai.

Israel hanigo Isip bulu taga pai, augwali te masigi sane aɗi nogolama, tama augwali Sainai bulu duba sabolai. Augwali te Sainai bulu dude bidibadi, Godigo te po augwali dali weyu, “Dage eno we bidi hani mu dao, te eno dage sa mubao,” te po wai. Tama agai bomo yai po hauwa augwalibolo mawai, te Godigo dwagi yai kolesaga augwaligo te kolesaga wali pelama konemainogo yai. Tama Godigo Mosesbolo te po me wai, “Nago te genuai ugwa be me se yao, tama tede augwaligo Godibolo lotu po weyu, agabolo te dwai se ebo sela sayu, nai ula maiabo be se yao,” wai. Tama augwaligo te Godigo po wali pelama, te ugwa be se yai. Augwaligo te se silai, tama Godigo genuai ula te ugwa bede paɗanaluai.

Tama augwali te bulude bidibadi, Godigo augwali dali bomo yai po wai, te po wali aga polasa peyu, augwali te Kenan to menama, tama augwali te tode tigidali sogo mu bidabo to agai augwali mawaibao wai. Tama Israel hani augwali te masigi sane yai buludu pai. Tama augwali pelama, te be sili nigibo digi augwaligo te Godigo ugwa be se ebo te koneai, tama sesemane sogo God augwali dali bidai. Nago te Josua dali, te tobolu bidi hani meba augwaligo po nago nedeyu da, te nago augwaligo te Kenan to sigi bilama, bidainogo yali, te po koneaibao. Te bukugo nogi tama wai, Godigo we bidi augwaligo se yali usu mu yai.

Tama nosali, Israel hani augwa bulude bidibadi, me gasa tode bidibadi, te sogo, augwaligo te polobadu Godigo augwali Isip tode bidibadi augwa to Kenan te buluba odasa aselama, augwali te Godigo we bidi bidai, tama augwaligo homugo te tiali ma konebo dao. Tama Godigo te buku me badu tede God agai te genuai se Israel hani dali yali po elalubo dao.

Ma Dobola Sali te bukude aseani po e tama elalubo dao. Daɗi 1 tede gagalama, te Daɗi 18 teba siligi pai, te po wai, Godigo Israel hani Isip bulude bidibadi, Sainai bulu duba odasa soali po wai. Daɗi 19-24 tede Godigo Israel hani dali bomo yai po weyu, po wai agai po hauwa augwalibolo mawai. Tama God agai nogo si bomo yai po habu po te Daɗi 20, te po aseai elalubo. Tama Daɗi te 25-40, tede Israel hanigo se haniani augwaligo te Godigo ugwa be se eyu yali po aseai elalubo dao.

Isip hani augwaligo Israel hani dali dwai se yai

1 ¹⁻² Te Jekop aga ogomani dali augwali hodobo Isip buluba pai. Tama te sogo augwa we wai dabe dali hodobo pai. Jekopgo ogomani nogi tama wai: Ruben, me Simeon, me Livai, me Juda,

³me Isakar, me Sebulun, me Benjamin, ⁴me Dan, me Naptali, me Gat, me Aser.^a ⁵Tama agai ogwa me te Josep polasa pelama, Isip buluba polobadu bidigi pai dao. Te sogo te Israel hani, te Jekop aga hani mu, augwali te bidi sese sela olama, nogo si we bidi 70 augwali Isip buluba bidigi pai. ⁶Tama nosali Josep aga ama dede aga hani tigidali augwali te sogo te Isip bulude bidibadi, augwali tigidali isai. ⁷Tiali goli, augwaligo ame nani wai te Israel hani augwaligo wai hauwa ame nai, tama augwali hani hauwa mu te bomai bidi hani pedelai, tama augwaligo te Isip t̄o pedai badu Gosen te paḡaḡa sai.^b ⁸Tama nosali gesi tuni bidi me deli pedelama, agai te Isip bidi hani tonaluai. Tama te gesi tuni bidi agai te Josepgo nogi konesiḡawai.^c ⁹Tama te tuni bidigo aga Isip we bidi hani dali te po wai, “Suiḡo, te Israel we bidi hani augwali hauwa mu yai, tama augwaligo bomogo dago bomo aiyaba elaluaibao. ¹⁰Tama w̄bi hw̄baso da, te augwaligo dago boi bidi dali taluama, da dali hw̄yu, tama dago bulu tagalama, augwali wi paibao. Tama dago augwali hani hauwa pedalidali weyu, daḡ wabo t̄u gegegaibao,” te Isip gavman polasa tuni bidi agai te po wai.^d

¹¹Tama te po olama, te Isip hanigo te Israel hanigo bomo kimi isilainogo eyu, tama augwaligo te s̄ tonalubo bidi dabebolo te s̄ mawai, tama te bidi dabe augwaligo te Israel hani s̄ emainogo selai, tama augwali s̄ dene mu yai. Tama augwaligo te Israel hanibolo genuai hanu me si niga po wai, te hanu me nogi Pitom, me Rameses. Te hanu side te Isip tuni bidigo nai sisinabo madigi te hanu nigai. ¹²Tama te Isip hani augwaligo Israel hani dali dwai s̄ dene menama, tama augwali mu dolobo s̄ yai goli, tialima te Israel hani bidi hauwa mu pedaliyu, tama tedela peyu, tama te Isip bulu t̄o paḡaḡa sai. Tama Isip hani augwali te Israel bidi hani sulama, tama dwai homu eyu, augwali wi mu yai. ¹³⁻¹⁴Tama Isip hanigo Israel bidi hanibolo s̄ dene mawai. Tama Israel hani augwali dodolama mu bidai. Tama te Isip hanigo Israel bidi hanibolo te masigigo be s̄ ebo, te s̄ me te gi s̄ me ya wai, tama augwali s̄ dene mu yai. Tama augwaligo Israel bidi hani hobede me ebeo. Mu menio.

¹⁵Tama we si bidali, te we me nogi Sifra, me we nogi Pua, tama te we augwali sigo te Israel te Hibru we dabego wai ame nabo tau sabo s̄ yai. Tama te Isip tuni bidi agai te we sibolo te po wai, ¹⁶“Dage sigo te Hibru we me deligo wai ame nobadi tau sabo sogo, tama te wego wai te ogwa ame nobaso da, te wai dage sigo ela muao. Tama te wego wegi ame nobaso da, te wai dage sigo elisiḡama tagalao,” wali.

¹⁷Tama te we si God dali wi elama, tama augwali sigo te tuni bidigo wali po wali pabeo. Tama te we sigo te Israel we dabego ogwa ame nabo

^a 1:4 Gag 46:8-27 ^b 1:7 Tpi 7:17 ^c 1:8 Tpi 7:18 ^d 1:10 Tpi 7:19

elisiqama tagalama elalui, te we sigo te ogwa ame nabo elebeo. ¹⁸Tama te Isip tuni bidigo te we si i olama, augwali sibolo te po hanaluyu, te po wai, “Magi baso dage sigo tama tebo dawe? Magi baso dage sigo te Israel wego te ogwa ame nabo sula tagalama elalubo dawe?” wali.

¹⁹Tama augwali sigo po wei ponoyu, te po wai, “Hibru we augwali te da Isip we dabe tiwai menio. Augwali te bomoyai we dabe weyu, tama augwaligo wai polo mu ame nabo dao. Tama da augwali paba pedalisibadi, augwaligo wai polo ame nai digi da pabo dao,” wali.

²⁰⁻²¹Tama Godigo te we si dali dwagi yai se yali. Augwali sigo God dali wi yai, tama agai te we augwali sigo me wai ame nomainogo yai. Tama Israel hani augwali hauwa mu pedaliyu, tama augwali bomoyai bidi hani pedelai. ²²Tama nosali tuni bidigo Isip we bidibolo te po wai, “Dagego te Hibru hanigo ame nabo wai te ogwa tigidali selama, te moni pabo aq Nail te aqba sayu,” wai, “tama te wegoyai baso da, tagalama bidimainao,” wai.^e

Augwaligo te wai Moses elebeo

2 ¹Tama te Israel hani tomode, bidi hani me Livai hanigo te me Livai hanigo wegoyai sai dao, polobadu. ²Tama nosali te we haliga elama, tama wai ogwa me deli ame nai. Tama te wego te wai boq dwagoyai wai yai baso, geme dualama, tama te wai dualama polua sela bidai.^f ³Tama nosali agai te wai ma dualainogo yali usu meni yai, tama agai te basket wa augwaligo te awi diligo nigai selama, tama mege me siyu, tama te megego te basket wa dedage sebelai. Tama agai te wai te basket wa tomode pilama, sela pai, tama te Nail aq sesegede te sigi sili elalubo digi te wai dualigi pai, te sigi sili tomode, te aq daide muai. ⁴Tama te wai aga abe digibulu gana dulaluyu, tama te wai dali magi se ebowe naga suainogo tonalwai. ⁵Tama aga dolalubadi, te Isip tuni bidigo wegoyai aga se we dabe dali te aqba asai. Tama aga se we dabe augwali te olo bilalubadi, tama te tuni bidigo wegoyai aq paugi pai. Tama te wegoyai agai te basket wa sigi sili tomode munalubo sulama, tama agai aga se we me deli tagala palama, tama te wa agabolo sela magasali. ⁶Tama tuni bidigo wegoyai agai te basket wa dalama suai, te wai boq ogwa te wade munalubo suai. Tama agai te wa po dabadi, tama te wai boq gela wai, tama te tuni bidigo wegoyai agai te wai homu dene mu eyu, tama agai te po wai, “Te e wai! Te Hibru hanigo wai dao,” te wegoyai te po wai. ⁷Tama te wai aga abe paba aselama, te tuni bidigo wegibolo hanaluyu, te po wai, “Te eno Hibru we me i wagoyai pelama, tama e wai ame menama, tama te e wai te wego negebo usu egowe?”

⁸Tama tuni bidigo wegoyai agai te po wali, “Te usu dao, te nago tama tiao,” wai. Tama te wai aga abego aga ida mu odasa asai. ⁹Tama te wai

^e 1:22 Tpi 7:19 ^f 2:2 Tpi 7:20; Hib 11:23

aga ida asai, tama te tuni bidigo wegigo te webolo te po wai, “Eno te wai nago selama, ame mayu, bugagia tonalua,” wai, “tama eno nage masigigo abelaibao,” wai. Tama te wai aga idago selama, ame mayu, bugagia tonaluai.

¹⁰Tama nosali te wai dwasianu genuai gana ebo si, aga idago te wai te tuni bidigo wegibolo magi pai. Tama tuni bidigo wegigo te wai aga wai mu tiwai yai. Tama agai te po wai, “Te eno e wai āide munalubadi, tama eno ugwaba sela holai, tama tebo olama. Tama tibaso, eno agai nogi Moses poai,” wali.^{g h}

Moses Midian buluba wi pai

¹¹Tama nosali Moses genuai bidi yai, tama agai te Hibru bidi hani sugi pai, te augwali aga hani bidi, tama abagi dabe dao. Tama agai suali, te augwali Isip tuni bidigo sē ebo dene mu yai. Tama agai suali, te Isip bidi me deligo Hibru bidi me deli ela mubo suai, te Moses aga abagi te Hibru hani.ⁱ ¹²Tama Moses agai tonono bilali, te bidi me bidibo subeo. Tama agai polo mu te Isip bidi ela muai, tama te bidi te masigi kemide haluai. ¹³Tama te sogo nosali Mosesgo suali, te Hibru bidi me aga si hw̄ibo suai. Tama Moses agai te wado po olama, hw̄iani page bidi dali te po wali, “Magi baso nago naga abagi elebawe?”

¹⁴Tama te bidigo Mosesgo po wei ponoyu, te po wai, “Nage te tobolu bidi, tama dago po dodolobo bidi menio. Tama nago ena elainogo, te nago Isip bidi me ela muani tiwai yainogo obawe?” Tama Mosesgo te bidigo te po wabo odolama, aga wi yai. Tama agai te homu yai, ‘Eno te Isip bidi me elali, te we bidi augwaligo polo koneai,’ te homu yai.^j

¹⁵Tama nosali Isip tuni bidigo Mosesgo te sē yali po odolama, tama agai Moses elainogo yai, tama tibaso Moses aga wi digibulu pelama, te Midian buluba bidigi pai. Aga te t̄oba sabolama, tama aga te āi tubo digi te sesegede dulaluai.^k ¹⁶Tama te Midian t̄ode pris bidi me deli digi bidai, tama agai nogi si, te Ruel, me Jetro. Tama te bidi agai wegī a naga olama me badu nogo si bidai. Tama Moses te āi ulu t̄o dedagedu asobo digi pāde dulaluai, tama te bidigo wegī dabe te augwa ayago kibu sipsip meme dabe maiabo āi tuagasu asai. ¹⁷Tama tialima, gasa sipsip tonalubo bidi hani aselama, tama augwaligo te bidigo wegimani āi tuagasu asobadi, augwali sela sanama, “Pao,” wai. Tama Moses agai te wegī dabe tau siyu, tama te bidi dabe augwali sela sawai. Tama nosali Moses agai te wegī dabego kibu sipsip meme dabe āi mawai.

¹⁸Tama nosali te wegī dabe augwa aya Ruel bidibo digi ma pai, tama augwa ayago augwalibolo hanaluyu, te po wali, “Magi elama, dage megī polo ma asobawe?”

^g 2:10 Te Isip pogo te nogi Moses te gasa po wabo dogoni tiwai si pāde dao, te wabo po te “āidu ugwaba sela holai,” tama wabo. ^h 2:10 Tpi 7:21 ⁱ 2:11 Hib 11:24

^j 2:14 Tpi 7:23-28 ^k 2:15 Tpi 7:29; Hib 11:27

¹⁹Augwaligo po wei ponoyu, te po wali, “Isip bidi me deli agai da tau selama, tama te gasa kibu sipsip tonalubo bidi dabe augwaligo da ela gudulubeo. Tama te bidi agai dago kibu sipsip meme dabe me agai ą mawai,” wali.

²⁰Tama te bidi aga wegi dabebolo hanaluyu, te po wali, “Te bidi menade bidibowe? Tama magi baso dagego aga ude taga soaliwe? Dagego te bidi aga i wagi pelama, tama aga da dali nai tuagasomainao,” wali. Tama te wegi dabe pelama, augwaligo Moses odasa asai. ²¹Tama nosali Jetro agai homugo Moses aga dali bidimainogo yai, tama Mosesgo te usu dao te po wai. Tama Jetro agai wegi Sipora me Moses mawai, tama Mosesgo te wegi sai. ²²Tama nosali Sipora wai haliga elama, tama ogwa me deli ame nai. Tama Moses agade digi po weyu, te po wali, “Ena gasa bulu ą bidi e ąde bidibao. Tama tibaso, eno te wai nogi Gersom dao obao,” te po wai.^l

²³Tama kibu be meba bidilama, tama nosali te Isip tuni bidi isai. Tama Isip hani augwaligo Israel hanibolo ą dene mu mawai. Tama Israel hanigo Godigo augwali tau somainogo tigidali sogo Godibolo gela weyu, i wai. ²⁴Tama Godigo augwaligo te gela wabo odoyu, tama Godigo te bomo yai po Abraham, me Aisak, me Jekop, augwali dali ąą wali, te agai koneai, tama agai te augwaligo ąągo wai dabe augwali tau saibao te po wai, polobadu.^m ²⁵Tama tibaso, God agai te Israel bidi hani augwali dodolama mu bidibo suai. Tama agai augwali hobede elama, agai augwali tau sabo homu yai.

Godigo Moses i wai

3 ¹Tama nosali me sogo Moses agai te kibu sipsip dabe, me te meme dabe te aga ąą Jetro nai dabe tonaluai, te Jetro aga da te God dali te Midian bage tomode dolalubo pris bidi dao. Tama me sogo deli sogo Mosesgo te kibu sipsip me meme dabe odasa peyu, te wa pai bulu taga peyu, te ą pedai me nogi Horep, te bulu du Sainai tede elalubo, teba sabolali, te Godigo bulu du dao. ²Tama Genuai Bidigo Ensel Mobo Bidi agaba pedelama, te sia dabo tiwai, te dwasianu ni nologo tomode sia bogoli pedelai. Tama Mosesgo sia te nide dabo suali, tiali goli te siago te ni dela dolobeo. ³Tama Moses aga homu hauwa eyu, te po wali, “Te gasagi yai nai mu dao. Tama magi baso mu siago te ni dolobewe? Te ena ąba pelama, te sia dabo nai sugi paibao,” wali.

⁴Genuai Bidi te sia dabo ni tomode bidibadi, te Moses ąba asobo suali, tama Godigo i olama, te po wali, “Moses. Moses.” Te po wali. Tama Mosesgo te po wai, “Magi yaliwe?” ⁵Tama Godigo te po wai, “Nage ąba

^l 2:22 Te Hibru pogo te wai nogi Gersom wabo dogoni te “Gasa ąde bidibo” po wabo dogoni tiwai si ąde dao. ^m 2:24 Gag 15:13-14

aselamo dao. Tama nago saḡa nadoba diḡ muao. Magi baso meni, te megi nage dolalubo tḡ te eno tedali gasagi yai tḡ, tama te tḡ eno habu selai tḡ dao. ⁶Tama ena te nago waḡ dabego God dao. Ena te Abraham, me Aisak, me Jekop, te bagego God dao.” Mosesgo te po odolama, aga gesabi halua sali, magi basowe, agai te God subo wi ebaso, tiwai dao.

⁷Tama Genuai Bidigo aga dali te po wali, “Eno suali, augwali eno we bidi Isip bulude mu dolobao. Tama eno we bidi augwali ena i wabo se ebaso, te augwali dwai tonalubo bidigo nogode ma somainogo yai. Eno te i wabo odoyu, tama eno mu koneani, te augwali dene me te seḡe mu sabo dao. ⁸Tama ena dulai dao, tama te augwali te Isip dabego nogode ma selama, tama augwali te genuai tḡ me deli te tḡ ili hauwa elalubo, te nai bugagia dwagi yai mu holobo tḡba odasa paibao. Te tḡde megi te Kenan bidi hani me, te Hit hani me, te Amor hani me, te Peres, me Hivi, me Jebus, te tama hani augwali te tḡde megi bidibo dao. ⁹Mu tama, eno te Israel hani we bidigo gela odolama, eno suali, te Isip dabe augwaligo dwai kolesaga mu augwali dali ebo dao. ¹⁰Tama megi eno nage te Isip tuni bidi bidibo digi tagala palama, te tuni bidigo nage sula tagalama, te nago eno we bidi Israel hani augwali te Isip bulu tagalama asomainao,” wali.ⁿ

¹¹Tiali goli, Mosesgo Godibolo te po wali, “Ena magi yai bidi, tama ena te Isip tuni bidiba pobaso da, eno te Israel we bidi te Isip bulu tagalama, odasa asobo usu egowe?”

¹²Tama Godigo te po wali, “Ena nage dali bidibao. Tama megi eno magi nai me deli nagebolo waselama ola mayu, tama nago kuna koneagameo, te ena digi eno nage te Israel we bidi augwalibolo tagala palobao. Te ola mabo se e tama dao: te nago te we bidi Isip tḡ tagalama, odasa aselama, tama dagego enabolo e bulu dude digi lotu po waibao,” wali.

¹³Tama Mosesgo Godibolo te po wai, “Ena te Israel we bidi augwali bidibo teba pedalobo sogo, te augwalibolo eno te tiwai po waibao, ‘Dago waḡ augwaligo Godigo ena tagala palobaso, ena dage bidibo digi asai.’ Tama augwaligo enabolo hanalubaso da, ‘Te aga nogi de dawe?’ obaso da, teda eno mena nogi wabogo augwali dali wei ponogowe?”^o

¹⁴Tama Godigo te po wali, “Ena Digi Ena Tama Bidibo Dao. Nago te Israel we bidi dali te po wao, ‘Ena Digi Bidibo,^p te Godigo nogi dao. Tama agai ena tagala palobaso, tama ena dage bidiboba asai.’^q ¹⁵Nago tama po te Israel we bidi dali weyu, te Yawe Genuai Bidi, aga te dagego waḡ dabe augwaligo God, te Abraham, me Aisak, me Jekop, te agai nage tagala

ⁿ 3:10 Tpi 7:30-34 ^o 3:13 Sai 6:2-3 ^p 3:14 Te Hibru pogo te po wabo po “Ena Digi Bidibo,” te po wabo dogoni te nogi Yawe wabo dogoni te tiwai si paḡe dao.

^q 3:14 Ped 1:4, 8

palama, tama nage augwali bidibo digi asai dao po wao.” Tama Godigo po Moses dali ma wali, “Eno nogi Genuai Bidi, te eno nogi sesemane bidada pabo sogo, tama nosali pedalobo wɔɔ dabe augwaligo ena nogi tama nage yaibao.”

¹⁶“Nage pelama, te Israel tobolu bidi dabe augwali sisinama, te God po augwalibolo wao, “Te dagego wɔɔgo Genuai Bidi, Abraham, me Aisak, me Jekop, te bagego God enaba mu pedelama, dagebolo wabo po ena dali tama wai dao, “Eno suali, te Isip hani augwaligo tigidali dwai kolesaga mu dage dali ebaso, tama eno homu hauwa dage dali ebo dao. ¹⁷Tama eno te po wali, te eno dage Isip tɔde selama, te bulu bidi dabego dwai sɛ mu dagebolo ebaso, tama eno dage te Kenan bagego tɔ, me te Hit hani, me te Amor me, Peres me, te Hivi, me Jebus, te hanigo tɔba eno dage odasa painogo ebaso. Te dwagi yai tɔ, te ili hauwa elalubo tɔ dao.”’ ¹⁸Nago te tama po augwali dali weyu da, te augwaligo nago po odolama, wali paibao. Tama nago te Israel bage tobolu bidi dabe selama, tama dage te Isip tuni bidi bidibo teba pelama, agabolo te po wao, ‘Genuai Bidi Yawe aga te da Hibru bagego God dao, te aga da dali deliba sisinai dao. Tama dago nagebolo hanalu wagasali, te nago usu da obaso, te da te bidi meni yai buluba pelama, sela sogo dago Godibolo te ofa igi painogo obao, te dage Genuai Bidi dao,’ tama po wao. ¹⁹Eno koneani, te eno bomo yai nogogo aga dali bomai sɛ esiɔyu da, teda te Isip tuni bidigo dage tagala paliyu pao, te po hasia bolo wagobeo. Tiali goli, agai dage tagala palomainogo, eno bomo yaibao. ²⁰Tama tibaso, eno bidigo isiɔwai bomo yai sɛ haniani te Isip hani augwaligo tɔde eyu, tama eno bomogo te sɛ augwali dali yaibao. Tama te bomo yai sɛ dabe elama, nosali te Isip tuni bidi agai dage pomainao, te po waibao.”

²¹“Eno tama ilama, tama te Isip we bidi augwaligo dage dali dwagi yai homu yaibao, tama dagego te Isip tɔ taga soainogo ebode, te dage olo me pogobeo. Menio. ²²Dagego we tigidali te Isip we dabe augwali bidibo pɔba pelama, me te Isip we dabe dagego bede bidibo, tama dagego we dabe sibigo te Isip we dabe sibi hanaluyu, tama te ugwa, me te meba gasa au ebo doado bage gol me silva tama, te nai dabe augwaligo dage mawaibao. Tama dagego te nai duga wai dabe tigde muaibao. Tama dagego te tebo kolesagade te Isip dabego doado bage tigidali siyu, selasa paibao,” Godigo Mosesbolo te po wai.’

Godigo bidigo isiɔwai sɛ yabo bomo Mosesbolo mawai

4 ¹Tama tialima, Mosesgo Genuai Bidi dali te po wai, “Te Israel hani augwaligo eno wabo po homude dɔɔ wasiɔma, tama eno pusubo po te augwali odogobeo. Tama augwaligo te po weyu, ‘Nago tibo po naga

obao,' waibao. 'Tama Genuai Bidi nageba pedalobeo,' te po waibao. Te augwaligo tama weyu da, teda eno magi sę egowe?"

²Tama Genuai Bidigo Moses dali hanalu wai, "Nago magi nai tolalubawe?" Tama agai te po wai, "Tolasa bilibo dono tolalubo," po wai. ³Tama Genuai Bidigo te po wai, "Te dono t̄ba s̄ayao." Tama Mosesgo te dono t̄ba s̄abadi, te hasamani gagawai, tama Mosesgo te hasamani sulama, wi pai. ⁴Tiali goli, Genuai Bidigo Mosesbolo te po wali, "Tagalama, nago nogo aiyaba munama, te danu nogogo touao." Tama Mosesgo te hasamani nogogo danude touwai, tama te hasamani hasegelama, tama te bilibo dono ma pedelai.

⁵Tama Genuai Bidigo te po wai, "Nage te Israel bageba pabo sogode nago tama tiao, tama augwaligo nago e sę tiwai ebo sulama, nago po homude daŋ weyu, mu tama Genuai Bidi ena nageba pedelali da, te homu emainogo nago tama tiao. Tama augwaligo koneyu, te ena augwa w̄ai dabego God da, ena te bidi Abraham, me Aisak, me Jekop, te bagego God ena nageba pedelai dao," wali. ⁶Genuai Bidigo Moses dali te po ma wai, "Nago nogo naga ugwa tomoba muao." Agai te Genuai Bidigo wali po gilama tama tiai, tama agai nogo me teda sai, tama te nogode keni dwai mu, tama te keni tigidali tedela yai. ⁷Tama Genuai Bidigo te po ma wai, "Nago nogo naga ugwa tomoba ma muao." Te agai tama tiali, tama agai nogo ma teda sali, tama te nogo wiegi yai yali, te aga tigi me badu elalubo tiwai yai.

⁸Tama Genuai Bidigo te po wai, "Te augwaligo homude nago po daŋ olama musiabaso da, te nago hasia ebo bomu yai sę yali augwaligo homu teba daŋ wasiabaso da, te gasa bomu yai sę si nago ebo te augwaligo sulama, tama augwaligo homu nageba muaibao. ⁹Tiali goli, augwaligo te bomu yai sę si ebo sulama, tama augwaligo nago po homuba daŋ wasiabaso da, teda nago te genuai w̄ Nail meba selama, te t̄ba gelao. Tama te w̄ hasegelama, kaneme pedelaibao," wali.

¹⁰Tama Mosesgo Genuai Bidi dali te po wai, "Tama Genuai Bidi, tiali goli polobadu bidi hauwa gedude eno po bugagia wai menio. Tama megı nago ena dali po wali, tialima tego ena te po wabo bidi tiwai egobeo. Eno pedauwali sęę mu yai, tama eno po bugagia wainogo ebo, te usu egobeo," wali.

¹¹Tama Genuai Bidigo agabolo te po wali, "Niwai bidigo te we bidibolo po wabo pedauwali te mabo dawe? Niwai bidigo te bidi odo dega weyu, te pedauwali paliyu ebo dawe? Tama dego te gedugo tonono bilimainogo eyu, ma te gedu widao po wabo dawe? Ena, Genuai Bidigo naga, eno tama tiwai kolesaga ebo dao. ¹²Megi da, nage pao. Te nago wabo po tigidali te eno tau siyu, tama te nago wabo po nagebolo ola mayu yaibao," wali.

¹³Tiali goli Mosesgo te po wai, "Genuai Bidi, eno usugobeo. Nago gasa bidi tagala palao."

¹⁴Tama Genuai Bidigo Moses dali wado po weyu, te po wai, “Magi basowe? Nago ama genuai bidi Aron te Livai hani bidibao. Eno koneani, te aga da, te po bugagia wabo bidi mu dao. Tama megì naga tama agai nage tiąba asobao, agai nage suyu, wiegi yai homu yaibao. ¹⁵Nago agabolo te po olama, tama agai te po tigidali pumainao. Tama eno dage sigo pedauwali tau siyu, tama dage sigo eno po bugagia naga waibao. Tama magi se ą dage sigo yainogo ebaso, te se ą yao po eno waibao. ¹⁶Aga te nago pedauwalide po selama, te nago po te we bidibolo mawaibao. Tama agai gedude te nage te God tiwai bidiyu, te nago wabo po agai te we bidibolo pusaibao. ¹⁷Tama megì da, nago te bilibo dono selama, tama nage pao. Tama nosali nago te donode te bidigo isiąwai bomai se meba yaibao,” Genuai Bidigo te po wai.

Moses Isip tąba ma pai

¹⁸Mosesgo po God dali ola silama, tama aga te aga waę Jetro bidibo teba ma pelama, tama agabolo te po wai, “Eno homugo nago ena te Isip tąba ma pelama, te eno deli hani sugi painogo ebo, te nago ena pao po wabo te usu da wao. Eno koneama, augwali bidibowe, ma augwali isaliwe, te eno augwali sugi peyu pobao,” wali. Jetro agai te usu da po aga dali wai, “Te usu da, nage pao.” ¹⁹Tialima, Moses aga piąbadi, tama Genuai Bidigo agabolo te po wai, “Megì nage te Isip tąba ma pao, te nage elainogo yali bidi dabe, augwa digi isai dao,” wali. ²⁰Tama Moses agai te po wabo odolama, te aga we dali te aga wai si augwali te kibu donki me deliba muai. Tama agai te Godigo dono me selama, tama augwali Isip tąba ma pabo gagalali.

²¹Tama Genuai Bidigo Moses dali te po wai, “Nosali nage Isip tąba pedalobode, te nago te bomai se te Isip tuni bidi gedude yao. Eno nagebolo te bomai se ą yabo bomo mobao. Tiali goli, eno te tuni bidide ilama, tama aga te aga homuba masigi saąwai bidi pedelaibao. Tama tibaso, agai te we bidi dabe augwali pao wagobeo. ²²Nosali nago tuni bidi dali eno po weyu, ‘Te Genuai Bidi agai tiwai po wabo dao, ‘Israel hani te eno hasia wai, te gomunai ogwa tiwai dao. ²³Tama eno nagebolo te po wai, ‘Nago te wai tagala palama, enabolo lotu po omainao.’ Tiali goli, nago hagela homu eyu da, te nago hasia wai te ogwa eno ela muaibao,” Genuai Bidigo te po wai, nago te po te Isip polasa tuni bidibolo wao.”^s

²⁴Te Moses te Isip tąba pabo tuąde pibadi, tama te toma nabo pesage tede Moses aga gasi selama, tama te gasigo aga ela muainogo yai. ²⁵Tama Sipora, te Mosesgo wego, te poa pai masigi selama, tama aga wai te ogwa te gasa tigiwali togolama, Moses saąąba muai. Tama agai te po wai,

^s 4:23 Sai 12:29

“Nage eno bidi dao, tiali goli nage kaneme tama sabo bidi dao.” ²⁶Tama Genuai Bidigo sulama tagaliyu, tama Moses bidimainogo yai, tama agai aga ela mubeo. Te we Siporago te daɣ ilibo tigiwali togwabo kolesaga tede hagela homu eyu, tama agai te po wai, “Kaneme sabo bidi dao.”

²⁷Tama Genuai Bidigo Aronbolo te po wai, “Nage te masigi sane yai buluba pelama, Moses dali tede sisinaibao.” Tialima, aga pelama, Moses te Godigo bulu dude sisinama, gesabidi suyu, tama dwagi yai homu eyu, augwa si gesabidide nono nai. ²⁸Tama Mosesgo Aronbolo te Genuai Bidigo agabolo wali po tigidali wai, te Genuai Bidigo aga tagala paliyu wali, te po wai. Tama Mosesgo Aronbolo te Genuai Bidigo agabolo te bidigo isiɣwai bomai se yabo po wali, te po me Aron dali wai.

²⁹Tama nosali Moses de Aron augwali si te Isip tɔba pelama, tama augwali sigo te Israel tobolu bidi dabe deliba sisinai. ³⁰Tama Arongo te Genuai Bidigo Mosesbolo wali po tigidali augwalibolo te po wai, tama te Israel hani olo we bidi dabe me deliba sisinama, tama agai te bidigo isiɣwai bomai se te we bidi augwali gedude yai. ³¹Tama tibaso, augwaligo homu Aronba mu daɣ wai. Augwaligo te po tiwai wabo odali, Genuai Bidigo suali, te Isip hani augwaligo te Israel hani dali dwai kolesaga ebaso, agai homu hauwa augwalide ebo dao. Tama te we bidi dabe augwaligo te po odolama, tama augwa tobolu tɔba aiyaba munama, Genuai Bidibolo lotu po wai.

Moses de Aron si pelama, Isip tuni bidi sugi pai

5 ¹Tama nosali Moses de Aron si te Isip polasa tuni bidi bidibo teba pelama, tama te po wai, “Da Israel bagego Genuai Bidi Yawe Godigo te po wai, ‘Eno hani augwali te bidi meni yai bulu, te masigi saneba pelama, enabolo te genuai lotu po weyu, ena nogi ugwaba somainogo, augwali pomainao,’ wali.”

²Tiali goli te tuni bidigo te po wai, “Genuai Bidi Yawe de dawe? Magi baso eno agai po odolama, te dage Israel hani pomainogo yaibawe? Eno te Genuai Bidi Yawe konebeo, tama tiyu, eno dage pagameo te po wagobeo,” wali.

³Tama augwali sigo te po wali, “Da Hibru bagego God te da si bidibo digi pedelai dao. Da te masigi sane yai buluba sela sogo bidigi painogo homu yai, tama dago Godibolo te ofa mawainogo, te dago Genuai Bidi dao. Tama nago da pao wabo te usu yaibawe? Te dago tama tisɣwani da, te agai da genuai gasigo, me te hwɔbo sogode, te da mu dolaibao.”

⁴Tama te Isip tuni bidigo Moses de Aron si dali te po wai, “Magi baso dage sigo eno se ebo te we bidigo tagalomainogo te po obawe? Dage si seba polo ma pao. ⁵Dage Israel hani hauwa mu pedaliyu, tama da bulu page bidi aiyaba elaluai, tama megi dagego te se ebo taga painogo obawe?”

⁶Tama te sogo naga te tuni bidigo po me deli te Isip bage dali, te Israel augwa digi te Israel se ebo bidi tonalubo bidi augwali dali te po wai. Agai te po wai, ⁷“Dagego te wa pai nosa te Israel hanigo te be se yabo dila pai nai brik nigimainogo magio, te dagego tebo dao. Augwa digi te nosa dabe sigi pomainao. ⁸Tiali goli, augwaligo te sesemane sogo te nigibo tiwai brik naga augwaligo nigimainao. Dagego te namba te pewardage iligio. Mu menio. Augwali se hagela ebo we bidi dao. Tama tibaso, augwaligo te po wai, ‘Da pelama, dago Godibolo ofa igi pomainogo emainao.’ ⁹Augwalibolo se hauwa menama, tama augwali se dene mu yao, tama augwaligo te tiwai tibo po wabo odabo sogo te meni yaibao,” te Isip tuni bidigo te po wai.

¹⁰Tama te Isip se tonalubo tobolu bidi dabe, me te Israel se tonalubo bidi dabe me, augwali te Israel haniba pelama, augwali dali te po wai, “Tuni bidigo te po wai, dago nosa dabe dagebolo sela magasigio wai. ¹¹Duga digi pelama, tama te nosa gegegi pao wai, tama dagego te mama togo nigibo nai brik te polobadu nigali tiwai hauwa nigao, tama te nigibo brik namba te aiyaba me dulugio. Te namba te polobadu elaluali tiwai naga tama elalumainao,” te po wai. ¹²Tama te Israel we bidi augwali te tigidali Isip teba tedela pelama, te nosa dabe tigidali sisinai. ¹³Tama te se tonalubo bidi dabego se polo yao weyu, augwaligo te po wai, “Dagego deli se tiwai naga tigidali sogo eyu, te dago nosa dagebolo mobadi yali se tiwai se yao.” ¹⁴Tama te Isip se tonalubo bidi dabe augwali te Israel augwa digi te se tonalubo bidi nigilali, te bidi pageba pai. Tama augwaligo te bidi dabe augwali eliyu, te po wai, “Magi baso dagego te brik namba te polobadu nigali tiwai nigibewe?”

¹⁵Tama tibaso, te Israel se tonalubo bidi dabe augwali te Isip tuni bidi bidibo teba pelama, aga dali te po wai, “Magi baso nago te tiwai kolesaga da dali ebawe? ¹⁶Augwaligo nosa dabolo magasobeo, tiali goli augwaligo dabolo te brik nigao te po wedu gebo dao. Tama megie me augwaligo da elai. Te brik namba saq pali kolesaga page dago menio. Te kolesaga te Isip bage duga digi te se yai dao,” te po wai.

¹⁷Tama te polasa tuni bidigo augwalibolo te po wai, “Dage se hagela ebo bidi dabe mu dao. Tama tiyu, dagego te po wai, ‘Dago dena Genuai Bidibolo ofa magi pobaso, te dagego da sula tagalao,’ te po wedu gebo dao. ¹⁸Woo! Dage duga seba ma pao. Augwaligo nosa dagebolo magasogobeo. Tiali goli, dagego te brik namba augwaligo dagebolo po weyu, te nigao,” te polasa tuni bidigo te po wai.

¹⁹Tama te Israel se tonalubo bidi dabe augwaligo te tuni bidigo wabo po odolama, augwaligo te brik namba pewardage ilisiayu, tama augwaligo koneani, megie genuai sege augwaliba pedelali, te homu yai. ²⁰Tama augwaligo te tuni bidi taga sobadi, te sogo augwaligo te Moses de Aron si gesabidi suai. Augwali sigo augwali te be bulu badu asobo tonaluai.

²¹Tama augwaligo te bidi si dali te po wai, “Dena homugo te Genuai Bidi Yawego dage sigo kolesaga osola suao, tama Genuai Bidi agai dage sibolo dene mawaibao, magi basowe, dage sigo te tuni bidi dali, te aga tobolu bidi dabe dali, augwaligo da te dwai nai tiwai mu, te homu ebo dage sigo ilalio. Te tuni bidigo da elemainogo dage sigo tų nigibao,” te po wai.

Moses aga homu seęę eyu, Godibolo gedu haluasa po wai

²²Tama Moses ma pelama, tama Genuai Bidibolo te po wai, “Genuai Bidi, magi baso nago naga we bidi hanibolo te dene maniwe? Tama magi baso nago ena eba tagala palai dawe? ²³Te nago po eno te tuni bidibolo wagi pali, tede gagalama daę megi tama, agai dwai seę augwali Israel we bidi dali ebao. Tama nago augwali tau selama, magi seę me deli ebeo,” Mosesgo Godibolo te po wai.

6 ¹Tama Genuai Bidi Yawego Moses dali te po wai, “Megi nago eno te tuni bidi dali ebo seę suaibao. Te eno bomogo yaibao, tama tibaso agai te dage Israel hani gasaba tagala palaibao. Mu tama, te eno aga selebo seę eyu, aga mu doloyu, tama agai dage agai tųde bidibo sela şanama, tama dage paibao,” wali.

Godigo Moses i ma wai

²Godigo Mosesbolo te po wai, “Ena digi ena te Genuai Bidi Yawe dao. ³Polobadu kibu be hauwa ena te Abraham, Aisak, Jekop, te bageba pedelali, te augwaligo koneai, ena te Tigidali Bomo Elalubo God dao. Tiali goli, eno te tama po augwali dali wabe, Genuai Bidi Yawe te eno nogi da, te po wagi sogo da, teda te nogi page augwaligo konegi dao.^t ⁴Tama eno bomo yai po augwali dali daę weyu, te tų Kenan augwali mawaibao, te po wai. Augwali te bulude te tų page bidi hani bidisiąwai goli, eno te tų augwalibolo mabo homu yai. ⁵Te me elalubo, te Isip bidi dabe augwaligo te Israel hani kalabus seę ebo tiwai seę menama yai, tama te Israel hani augwali moni gela wai. Tama megi augwali gela wabo eno odai, tama eno homugo polobadu eno te bomo yai po daę wali, te eno ma koneai.”

⁶“Tama tibaso, nago te po Israel hani dali wao, ‘God agai te po wai, “Ena digi ena Genuai Bidi Yawe dao. Eno dage te Isip hanigo nogode selama, tama te augwaligo seęę dagebolo mabo tede me eno selama, tama dage olo mu bidimainogo yaibao. Tama eno bomogo augwali dene mu somainogo menama, tama dage eno genuai bomogo dobola ma saibao. ⁷Te dage selama, tama dage ena we bidi mu pedelama, tama ena te dagego God bidaibao. Nosali dage te Isip bagego kalabus seęde bidali tagalama, tama dage olo mu bidaibao. Tama te sogo dagego mu koneyu,

^t 6:3 Sai 3:13-15

ena te Genuai Bidi da weyu, tama ena dagego God da, te homu yaibao. ⁸Eno dage te t̄ Abraham, Aisak, Jekop, augwali dali bomo yai po dā weyu, te t̄ mawaibao wai. Tama te t̄ eno dagebolo menama, tama te dagego t̄ mu elaluaibao. Ena da, te Genuai Bidi Yawe dao,” God agai te po wai,’ nago te po augwalibolo pusao,” wali.

⁹Tama Mosesgo te po Israel hani dali wai, tiali goli augwaligo agai po odobeo. Magi basowe, te s̄ dene yaligo augwali homu aiyaba mu tula palai.

¹⁰Nosali Genuai Bidigo Moses dali te po wai, ¹¹“Nage pelama, te Isip tuni bidibolo te po wagi pelama, te Israel hanigo agai t̄ mu taga pomainao, te po omainao.” ¹²Tiali goli, Mosesgo te po wei ponoyu, te po wai, “Te Israel hani augwaligo eno po odobo menio. Tama tuni bidigo eno po mena tama odogowe? Eno pedauwali s̄ s̄ ebao. Eno po te tuni bidi dali bugagia dolo wainogo ebo te usu egobeo.” ¹³Tialima, Genuai Bidigo Moses de Aron si te Israel hani bidibo, teba me, te Isip tuni bidi bidibo digi me, te tagala palali, augwali sigo te Israel hani te Isip t̄ tagalama, augwali odasa asomainogo yai.

Moses de Aron sigo hani

¹⁴Te bidi hani augwali te Moses de Aron sigo hasia w̄ dabe te bidi hani nogi e dao. Ruben, te Jekopgo gomunai ogwago wai dabe nogi e dao. Te ogwa me si me si, me nogi Hanok, me Palu, me Hesron, me Karmi. Te Rubengo hani me si me si te hani me si me w̄ si tomode te Ruben pedelai. ¹⁵Simeon, te Jekopgo tomo ogwa, agai wai ogwa te a naga olama me badu nogo deli, gomunai ogwa Jemuel, me Jamin, me Ohat, me Jakin, me Sohar, me Saul. Saul aga ida te Kenan we me deli dao. Simeongo hani a naga me badu nogo deli, te hani tomode Simeon aga w̄ pedelai. ¹⁶Livai, te Jekopgo ogwa me, agai wai ogwa sela, gomunai ogwa Gerson, me tomo ogwa Kohat, sabi ogwa Merari. Tama Livai agai kibu be 137 bidilama, isai. ¹⁷Gersongo ogwa si ame nai, me ogwa Lipni, me Sime. Te ogwa si w̄ te Livaigo hani tomode elaluai. ¹⁸Kohat agai wai ogwa me si me si, Amram, Ishar, Hebron, Usiel. Tama Kohat kibu be 133 bidilama, isai. ¹⁹Merarigo wai si, Mali me Musi. Te bidi hani tigidali augwali te Livaigo wai hani augwali dao.^u ²⁰Amram agai we Jokebet sai, te aga ayago amago weḡ, tama Jokebetgo Aron de Moses si ame nai. Tama Amram kibu be 137 bidilama, isai dao.

²¹Ishargo wai sela, Kora, me Nefek, me Sikri. ²²Usiel agai wai sela, Misael, me Elsafan, me Sitri. ²³Arongo we Eliseba sai, te Aminadapgo weḡ, te Nason aga abe dao. Tama Elisebago wai me si me si ame nai, Nadap, Abihu, Eleasar, me Itamar. ²⁴Korago ogwa sela, gomunai ogwa

^u 6:19 Nam 3:17-20; 26:57-58; 1 Sto 6:16-19

Asir, me Elkana, me Abiasap. Te bage sela augwaligo hani wai Kora dao. ²⁵ Eleasar te Arongo ogwa, agai te Putiel te bidigo wegi selama, agai wai te Finias ame nai. Te megi nogi nogi yali bidi hani augwali da te Livai hani sibi deli deli augwaligo tobolu bidi dabe dao. ²⁶ Nago te bidi hani augwali tomode te Aron de Moses si nogi elalubo suai. Genuai Bidigo te bidi sibolo naga po weyu, te po wai, “Dage sigo te Israel hani dabe augwali te Isip t̄de bidibo tagalama, augwali odasa asao,” te po Genuai Bidigo augwali si dali wai. ²⁷ Te bidi augwa sigo digi te Isip tuni bidi dali, te Israel hani tagala palaibao, te po wai. Tama te bidi sigo naga te sē yai.

Genuai Bidigo po Moses de Aron sibolo mawai

²⁸⁻²⁹ Genuai Bidigo Moses dali Isipde po wali sogo, agai te po wai, “Ena digi ena te Genuai Bidi dao. Tigidali po eno nagebolo mabo, te po nago Isip tuni bidi dali wao.”

³⁰ Tialima, Mosesgo Genuai Bidi dali te po wai, “Nago koneani, ena po wabo bidi menio. Tuni bidigo eno po odogobeo.” Mosesgo te po wai.

7 ¹ Tama tialima, Genuai Bidigo Moses dali te po wali, “Odao, eno nage te God tiwai te tuni bidigo gedude nigiliyu, tama nago ama Aron, te nagede po sabo bidi tiwai nigilama, tama nago po agai te tuni bidibolo waibao. ² Tigidali nai po eno nagebolo wali, te po nago Aron dali wao. Tama agai te po te tuni bidi dali weyu, te agai te Israel hanigo te tuni bidigo t̄q tagalama, pomainao po waibao. ³ Tiali goli, eno te tuni bidide iliyu, tama aga homu tomoba masigi sawai bidi pedelaibao, tama agai te Arongo po odogobeo. Tama tibaso, eno genuai bomai sē hauwa te Isip t̄de yaibao.” ⁴ Tiali goli, te tobage bomai sē ebadi digi, tama te tuni bidi agai nago po odogobeo. Tama tibaso, eno te Isip t̄q dolama, augwali dene mu somainogo tiaibao. Tama ena polasa peyu, te Israel hani sibi dabe odasa peyu, augwali te eno we bidi hani, tama augwaligo te Isip t̄q mu taga paibao. ⁵ Tama eno te Isip hani dali haniani dwai dene mabo, te sogo tama Israel hani odasa peyu, te Isip t̄q taga paibao, tama te sogo Isip hanigo koneyu, te Genuai Bidi Yawe aga digi te Israel hani odasa pabo homu emainogo tama tiwai dao,” wali.

⁶ Tama nosali Moses de Aron augwali sigo te Genuai Bidigo wali po wali pelama, te sē tigidali yai. ⁷ Te sogo Mosesgo kibu be 80 elalubadi, tama Arongo kibu be 83 elalubadi, augwali sigo te sogo te Isip tuni bidi po miai.

Aron peyu tolasa pabo dono

⁸ Genuai Bidigo Moses de Aron si dali e tama wai, ⁹ “Tuni bidigo dage sibolo te bomai sē meba agai suainogo, te sē yao po wabo si da, te eno

dage si tagala palobao, tama Moses nago Aronbolo agai te bilibo dono selama, te tuni bidigo gedude t̄q̄ba s̄ayao. Tama te dono hasamani gagalama pedelaibao,” wali. ¹⁰Tama tibaso, Moses de Aron augwali si te Genuai Bidigo po wali pelama, te tuni bidi bidibo digi pai. Tama Arongo dono te tuni bidigo gedude, me te aga s̄e ebo bidi dabe gedude, Mosesgo dono t̄q̄ba s̄awai, tama te dono hasamani pedelai. ¹¹Tuni bidigo te tebo sulama, tama agai te tigidali po page koneai bidi dabe, me te haniani pobi wabo bidi dabe i olama, augwaligo me te pobi po olama, tama Arongo ebo kolesaga tiwai augwaligo me yai. ¹²Augwaligo me augwa dono s̄abadi, tama hasamani gagawai, tiali goli Arongo hasamanigo augwaligo hasamani elama tuyu dalai. ¹³Tiali goli, tuni bidi aga homu kolesaga dāu ola sali, te Genuai Bidigo po wali gilama tama tiwai, tama Moses de Aron augwali sigo po odobeo.

Dwai nai mu Isip t̄q̄ba pedelai

¹⁴Tama Genuai Bidigo Mosesbolo te po wai, “Tuni bidi agai kolesaga te doyu, mu gagea pai eyu, tama agai te Israel hani pomainao te po wagobeo. ¹⁵Tama kigamu aga te āi Nail tede nago aga gesabidi deliba sisinama sueibao. Tama nago te hasamani pedelali dono selama, aga te āi sesegeba tonalugi pao. ¹⁶Tama nago tuni bidi dali te po wao, ‘God, da Hibru hanigo Genuai Bidi, agai ena tagala palali, nage te po omainogo, te agai we bidi te bidi meni yai buluba lotu po wagi pomainogo nago augwali tagala palao, te po wagasai. Tiali goli, megi nago te po odao. ¹⁷Tama megi Genuai Bidigo te po wai, “Nago eno ebo s̄e sulama, tama nago koneyu, ena digi ena te Genuai Bidi Yawe da, te po nago waibao,” Godigo te po nagebolo obao. Suao, eno donogo te āiba elebode te āi kaneme pedelaibao.” ¹⁸Tama te s̄ūḡu dabe isilama, dwai kugumini mu yaibao. Tama Isip we bidi augwaligo te āi tubo usugobeo,’ te po agabolo wao,” Godigo te po Mosesbolo wali.

¹⁹Tama Genuai Bidigo Mosesbolo te po ma naga weyu, te po wai, “Aronbolo agai dono sao te po olama, tama agai te donogo te genuai āi, me te tigidali āi gamia, me te tigidali Isip t̄q̄de elalubo sigi āi tigidali nago te donogo sa muao. Tama te w̄e dabe kaneme pedelaibao, tama tigidali Isip te badu te pede poude kaneme naga elaluyu, augwaligo te kaneme ni namego me te botolgo te masigigo nigai me, te kaneme pedelaibao,” Genuai Bidigo Mosesbolo te po wai. ²⁰Tama Moses de Aron sigo te Genuai Bidigo augwa si dali wali po wali pelama, te s̄e yai. Tama te tuni bidi dali, aga s̄e ebo bage meba dali, augwaligo gedude Arongo dono selama, te Nail moni pabo āiba elali, tama te āi tigidali kaneme pedelai. ²¹Tama te Nail āide elalubo tigidali s̄ūḡu isilama, dwai kugumini

mu te aïde yai. Tama te Isip we bidi augwaligo te wẹ tuabo usu egobeo. Tama kaneme te Isip tọ tigidalide elalui.

²²Tama te kolesaga page osola subo Isip bidi dabe, augwaligo pobigo te Arongo ebo kolesaga tiwai yai. Tama tuni bidigo augwali sigo po odobe. Menio. Agai kolesaga gagea pai me elalui, te Genuai Bidigo tama tiaibao te po wai. ²³Tama tuni bidi aga beba ma pelama, te sogo yali sẹde me agai homu midigi siyu hodalobeo. ²⁴Tama te Isip hani augwaligo te aï tuabo usu ebeo, tibaso augwaligo te wẹ sesegede dedage nigai, te tuabo wẹ tede sainogo yai. ²⁵Tama te wẹ Nail dwai elalubadi, te a naga olama, me badu nogo si sogo tama bidai.

Gedeli dabede po

8 ¹Tama nosali Genuai Bidigo Moses dali te po wai, “Nage tuni bidi pageba pelama, aga dali eno te po wao. ‘Genuai Bidi Yawe agai te po wai, “Eno we bidi augwali enaba lotu po wagasiyu asomainogo, augwali sula tagalao. ²Nago augwali tagala palisiąbaso da, teda eno te gedeli dabe augwali tagala palama, augwali te dagego be tomoba aselama, tama nago tọde bidibo we bidi augwali dolaibao. ³Tama te wẹ Nail te gedeligo mu paąana selama, tama augwali te wẹ tagalama, tama tuni bidi nago genuai be tomoba aselama, tama nago pibo be tų bet saiba asaibao. Tama te gedeli dabe te nago sẹ ebo bidi dabego be tomoba, me te nago we bidigo beba asaibao. Tama te nai ulubo nai stov tomoba, me te bret nigibo pou tomoba bidagasaibao. ⁴Tama te gedeli dabe augwali posoga palama, nago tigi daiba duayagasu, te nago sẹ ebo bidi dabeba, me te nago we bidi augwali tigiba duayagasaibao,” Genuai Bidi Yawego te po wai.’ Te po wao,” Genuai Bidigo te po wai. Mosesgo te po tuni bidiba wagasai, tama te tuni bidigo agai po odobeo.

⁵Tama tibaso, Genuai Bidigo Moses dali te po wai, “Aronbolo po olama, te aga nogo dodolama, tama agai dono ugwaba selama, nogogo tuao, tama te wẹ dabe, me aï gamia dabe, me te sigi aï ge, tede te gedeli dabe pedelama, tama te Isip bidi dabego tọ paąana somainao,” wali.

⁶Tama Arongo nogo dodolama, tama dono ugwaba selama, tama te wẹ dabe daï ilai. Tama te gedeli dabe pedelama, tama Isip bagego tọ tigidali paąana sai. ⁷Tiali goli, tuni bidigo po page osola subo bidi dabe augwaligo pobigo me te gedeli aïde bidali tagalama, hauwa te tọba pai.

⁸Tama tuni bidigo Moses de Aron si i olama, asobode augwali sibolo te po wai, “Dage sigo Genuai Bidibolo gedu haluasa po olama, agai te gedeli dabe da tigde bidibo sela saımainao, tama eno nago we bidi pomainogo tagala paliyu, tama augwa Genuai Bidibolo ofa magi pomainogo yaibao,” wali.

⁹Tama Mosesgo te tuni bidibolo po wei ponoyu, te po wali, “Te usu dao, eno gedu haluasa po nage tau siyu waibao. Naga digi te sogo bodolu

mobaso, te eno gedu haluasa po nage tau siyu, te nago sę bidi dabe, me te nago we bidi dabe, augwali tau somainogo yaibao. Tama dagego bede bidibo gedeli dabe silama, tama te gedeli dabe augwali te wę Nailde naga bidaibao,” wali.

¹⁰Tama tuni bidigo te po wai, “Gedu haluasa po do wagameo.” Tama Mosesgo te po wali, “Te eno nago po wabo gilama tama tiaibao, tama nago koneyu, te God tiwai Genuai Bidi Yawe me deli meni yai, te aga dago God dao. ¹¹Tama te gedeli dabego nage tagaliyu, te nago sę bidi dabe, me te nago we bidi dabe, augwali tagalama, tama augwali te wę Nailde naga bidaibao,” wali. ¹²Tama Moses de Aron sigo te tuni bidi tagalama, pai. Tama Mosesgo gedu haluasa po Genuai Bidibolo bomonama weyu, agai te tuni bidibolo tagala palali gedeli sela sęmainogo yai. ¹³Tama Genuai Bidigo Mosesgo hanalu wali pode tama tiwai, tama te bede bidali gedeli dabe, me obo tomode bidali, me te gide bidali, te tigidali gedeli isai. ¹⁴Tama te Isip bidi dabe augwaligo te gedeli dabe deliba sisinama, pesage holai, tama te gedeli dabe damuyu, kugumini dwai mu pedelai. ¹⁵Tama tuni bidi te gedeli dabe isali sulama, tama agai koneani, te dwai sogo silali. Tama tibaso, agai kolesaga ma doyu, gagea pai, te Genuai Bidigo agade po wali tiwai gilama tiwai, tama agai Moses de Aron sigo po odobeo.

Dina dabe

¹⁶Nosali Genuai Bidigo po Mosesbolo ma weyu, te po wai, “Aronbolo te po olama, agai dono tęba elama, tama tigidali Isip tę hogomugo te dina dabe pedelaibao,” wali. ¹⁷Tama augwali sigo tama tiwai. Arongo dono selama, tęba elai, tama tigidali Isip tę hogomugo dina pedelama, tama te dina dabego te we bidi dabe, me te hasa dabe, augwali halua selama, tama augwali gęugo kela tuai. ¹⁸Tama te pobi page koneai Isip bidi dabe augwaligo te dina pedalomainogo pobi po wali, tiali goli augwaligo usu ebeo. Tama te dina dabego te hasa dabe augwali halua sai. ¹⁹Tama te pobi po koneai bidi dabe augwaligo tuni bidi dali te po wai, “God aga digi te sę ebao.” Tiali goli, tuni bidigo kolesaga dolama gagea pai, te Genuai Bidigo po tama tiaibao wai, tama agai Moses de Aron sigo po wabo odobeo.^x

Bolia dabe

²⁰Genuai Bidigo Moses dali te po wai, “Tama kigamu mu tuni bidi węba asaibao,” wai, “tama aga asobadi nago aga sulama, tama eno po agabolo wao, ‘Genuai Bidi Yawego te po wai, “Eno we bidi lotu po enabolo omainogo pomainao. ²¹Nago augwali tagala palisięyu da, teda eno te

^x 8:19 Luk 11:20

bolia hauwa nageba tagala paliyu, te nago se bidi dabebolo, me te nago we bidiba me, te bolia tagala palaibao. Tama dagego be me, te dage bidibo to me, te boliago pagana saibao. ²²Tiali goli, te bolia dabe pedalobo sogo te Gosen to eno tonaluyu, te eno we bidi bidibo bulu, tama te bolia dabe augwali bidibo badu me pedelama bidigobeo. Te eno tama tebo sogo nago konemainogo te ena digi ena Genuai Bidi Yawe, eno te se nago tode ebao. ²³Eno te deli tigi tiwai se eno we bidi dali ebo tiwai te nago we bidi dali tegobeo. Odao, te gasagi yai bomai se te do pedelaibao,” Genuai Bidi Yawego te po wai, ‘tuni bidi dali te po wao,” Genuai Bidigo te po wai.

²⁴Tuni bidigo homu kolesaga hasegelebe, tama Genuai Bidi agai tama tiai, te agai po obadi, tama te genuai bolia hani hauwa te tuni bidigo genuai be tomoba asali, tama aga se bidi dabego beba me asiyu, te Isip we bidi tigidaligo beba pai. Tama te boliago te Isip hani tigidali dolai.

²⁵Tama tuni bidigo Moses de Aron si asa olama i wai, tama agai te po wai, “Dage pelama, duga Godibolo te Isip to tomode naga ofa mao.”

²⁶Tialima, Mosesgo te po wali, “Dago tama tiyu da, te dolo meni, magi basowe, Isip bage augwaligo te dago Genuai Bidi Godibolo ofa ebo hasa dabe sulama, tama augwaligo da dali dwai homu yaibao. Dago te hasa dabe elama ofa eyu da, te Isip bage augwaligo ofa isawai nai, tama Isip bage augwaligo te tebo suyu, tama augwali sebe eyu, masigi sanama, da ela muaibao. ²⁷Da pelama, sela sogo te bidi meni yai toba dago Godibolo ofa igibu paibao, dago Genuai Bidi Yawe, agai te se dabolo yao te po wai.”

²⁸Tama tuni bidigo te po wai, “Te usu da, eno dage te duga Godibolo ofa magi pomainogo tagala paliyu, te duga Genuai Bidi Yawebolo te bidi meni yai toba ofa igi pomainogo, tiali goli dage digibulu gana pelamo dao. Tama dagego ena me tau somainogo gedu haluasa po wao,” wali.

²⁹Tama Mosesgo po wei ponoyu, te po wai, “Te eno nage taga pabo sogo te eno Genuai Bidibolo gedu haluasa po weyu, te do agai nago bede te bolia dabe sela sayu, te nago se bidigo bede me, te nago we bidi augwaligo bede me tiaibao. Tialima, nago tibo po da ma ola mayu, tama te we bidi augwali te augwa Genuai Bidibolo ofa magi pidali weyu, te tu nago ma paligio.”

³⁰Tama Mosesgo te tuni bidi taga peyu, Genuai Bidibolo gedu haluasa po wagi pai. ³¹Tama Genuai Bidigo Mosesgo aga dali hanalu wali te se yai. Tama tigidali bolia dabego te tuni bidi dali, te aga se bidi me, te aga we bidi, augwali tagalama, tama te bolia me deli tede me bidibeo. ³²Te bolia dabe pela silai, tiali goli te tuni bidi aga homu ma hasegelisiayu, tama agai te Israel we bidi augwali tagala palobeo.

Kibu dabe isai

9 ¹Nosali Genuai Bidigo Mosesbolo te po wai, “Nage pelama, te tuni bidibolo te po agabolo wagi pao, ‘Da Hibru bagego God, Genuai Bidi

Yawe, agai te po wai, “Eno we bidi augwaligo enaba lotu po omainogo augwali tagala palao. ²⁻³Nago augwali daꝝ weyu, tama augwali tagala palisiꝑbaso da, te eno nage dali, te naga hani dabe dali dene mayu, tama eno genuai gasi te nago tigidali kibu dabeba tagala paliyu, te hos dabe me, te bidi duabo donki dabe me, te kamel, me bulmakau, me sipsip, me meme, te tama bulu badu bidibo nai dabeba eno gasi tagala palaiꝑbao. ⁴Tialima, Genuai Bidi Yawe ena digi bugagia eno te Israel hanigo kibu dabe tonaluyu, tama augwaligo kibu dabe me deli isigobeo.” Genuai Bidi Yawego te po wai. ⁵Nago te po te tuni bidibolo wagi pao,” Genuai Bidigo te po Mosesbolo mawai.

⁵Tama Genuai Bidigo te seꝝ yabo sogo bodolu mayu, tama te po wali, “Do eno te seꝝ yaibao.” ⁶Tama tuni bidigo homu kolesaga hasegelebe, tama Genuai Bidi agai te po wali seꝝ yali, tama Isip bagego bulu badu bidali kibu dabe tigidali isai. Tiali goli, Israel hanigo kibu dabe tigidali te bugagia bidali, tama me deli isibeo. ⁷Tama tuni bidigo aga hani dali hanalu wali, “Te Israel bagego kibu dabe te bugagia bidibowe?” Tama te bidi mebago agabolo te po wai, “Awe. Tigidali bugagia bidibao. Me deli munu me isibeo.” Tiali goli, te tuni bidi homu kolesaga dwai me elaluyu, tama te we bidi augwali me tagala palobeo.

Keni dabe pedelali

⁸Tama Genuai Bidigo Moses de Aron si dali te po wali, “Dage si te brik ulubo be me deliba pelama, tama te sia keli meba selama, tama tuni bidi bidibo digi pao. Dage si te tuni bidi bidiboba sabolama, tama Moses nago te keli ugwaba saꝝao. ⁹Tama te keli hogomu pedelama, tama Isip toꝝ tigidali usu naibao. Tama te keli hogomu bidi tigiba me, te kibu dabe tigiba me tulalubode, te dili keni tiwai pedelama, tama genuai keni pedelaibao,” wali. ¹⁰Tama augwaligo te keli selama, pelama, te tuni bidi geduba doligi pali, tama Mosesgo te keli ugwaba saꝝwai. Tama te keligo te dili keni tiwai pedelali, tama te dili keni dabe ulu elama, tama keni te we bidi tigde, me te kibu dabe tigde pedelai.^y ¹¹Tama te pobi page koneai bidi dabe augwaligo te Moses ebo bomo yai seꝝ teba pedelainogo ebo te usu ebe, magi basowe, augwali tigde te dili keni paꝝana sali, te Isip we bidi tigde keni yali tiwai, augwali tigde me te keni pedelai. ¹²Tialima, Genuai Bidigo te tuni bidigo homu kolesaga daꝝ walama, tama te tuni bidigo Moses de Aron sigo po wabo odobeo, te Genuai Bidigo tama po wali gilama tama tiwai.

Genuai talua ge tiwai tulubage po

¹³Tama nosali ma, Genuai Bidigo Moses dali te po wali, “Kigamu digi mu nage pelama, tuni bidi agabolo te po weyu, ‘Da Hibuꝛu bagego God,

^y 9:10 Ped 16:2

Genuai Bidi Yawe, agai te po wali, “Te eno we bidi hani augwali enaba lotu po wagasomainogo tagala palao. ¹⁴Tama nago te we bidi tagala palisiqbaso da, megi eno nagebolo dali, te nago se ebo tobolu bidi dabe me, te nago we bidi dali, dageba te dene ilibo se dabe mu mawaibao. Tama dagego te tigidali tq habu badu te bidi me deli, me te tibo god te ena tiwai me bidibo meni, te megi dagego mu bugagia konea saibao. Ena te God mu dao. ¹⁵Te eno nage dali, naga we bidi dali, dage te eno genuai gasigo dage dolainogo homu igi sogo da, teda dage tigidali mu ela siligi da. ¹⁶Tiali goli, eno nage hodolama, te tuni bidi nigiliyu, te eno genuai bomo dagebolo ola mayu, tama te we bidigo eno genuai nogi te tigidali tqba te po pusugi pomainogo tebao.^z ¹⁷Tiali goli, nago eno we bidi dali te boi bidi homu eyu, tama nago augwali tagala palobeo. ¹⁸Tama tibaso, odao. Do e tobage tiwai sogo, te eno moni genuai tulubage, te talua ge tiwai tulubage e tqba dulumainogo yaibao. Te tiwai tobage talua ge tulubage te Isip tqba gesi sogo pedalisiqyadi, tama megi sogoba usu nagasai. ¹⁹Tama te bidi dabe augwalibolo po olama, te kibu bulmakau dabe, me te nago nai gasa badu bidalua pabo nai dabe tigidali selama, te gasa be meba tomoba selasa pao. Meni baso, te eno genuai talua ge tulubage te bidi dabe tigiba, me te bulu badu bidibo kibu dabe tigiba tulama, tama augwali isaibao.” God Genuai Bidigo te po wai, dage sigo te po wao,” wali.

²⁰Tama te tuni bidigo se bidi meba augwali te Genuai Bidigo wali pode wi elama, tama augwaligo augwa se ebo bidi dabe, me te augwa kibu dabe, te augwa be tomoba selama muai. ²¹Tiali goli, bidi meba augwaligo te Genuai Bidigo wali pode wi isama, tama augwaligo augwa se bidi, me te kibu dabe dali, augwali bulu badu olo bidai.

²²Tama Genuai Bidigo Mosesbolo te po wali, “Nago nogo ugwaba selama, tama nago te dagalu usu siyu, tama te talua ge tulubage te Isip tq tigidali habu badu tuluyu, te we bidi dali te gide elalubo tigidali naiba tulubage tulaibao.” ²³Tama Mosesgo dono ugwaba sali, tama Genuai Bidigo dagalu kulukulu omainogo yali, tama dagalude te be sele ebo ula te tqba dulali, tama te talua ge tulubage tqba tagala palai. Genuai Bidigo te talua ge tulubage te tigidali Isip tqba tulumainogo yai. ²⁴Tama te talua ge tulubage me mu tutulu pidubadi geai, tama dagalude te be sele ebo ula te sia dabo tiwai eyu, tama te tigidali habuba pidubadi geai. Tama polobadu te Isip bage augwaligo te tiwai talua ge tulubage me subeo. Mu menio.^a ²⁵Tama te tulubagego te bidi dabe, me te kibu dabe, me te Isip tqde bulu badu elaluali nai dabe tigidali dolai. Tama te talua ge tulubagego te gide elaluali nai, me te ni du dabe tigidali pedelama, tigidali mu dolai. ²⁶Tiali goli, te Gosen tq badu, te Israel bage bidibo digi, te bulu delide digi naga te tobage tulubage menio.

^z 9:16 Rom 9:17 ^a 9:24 Ped 8:7; 16:21

²⁷Tama tuni bidigo po ola toloyu, te Moses de Aron si asao, te po wai. Tama augwali si aselama, tama tuni bidigo augwali dali te po wali, “Megi eno dwai seḡe salio. Genuai Bidi Yawego doloba pai kolesaga yai, tiali goli ena dali, te eno we bidi dabe dali, dago dwai kolesaga yalio. ²⁸Te talua ge tulubage tulali dali, te dagalu kulukulu wali, te sigo da dolai dao. Tama nago gedu haluasa po Genuai Bidibolo olama, tama agai te nai silibo side, te eno dage pomainogo tagala palaibao. Tama dage e tḡde ma bidimainogo menio,” wali.

²⁹Tama Mosesgo te tuni bidi agabolo te po wali, “Te ena te hanu buluba pabo sogo, te eno nogo ugwaba selama, te Genuai Bidibolo gedu haluasa po waibao. Tama te be kulukulu ma wasiḡama, tama te talua ge tulubage silaibao. Tama te sogo nago koneyu, te tḡ te Genuai Bidigo tḡ naga da waibao. ³⁰Tiali goli, eno koneani, nage dali, te nago seḡ bidi dabego te Yawe God dali wi isiḡyu, te aga Genuai Bidi da te homu menio,” wali.

³¹Te dwasianu ni dabe augwaligo tigi waligo te ugwa hobolobo hobi nigibo nai, me te rais bali dabe mu dolali, magi basowe te rais bali sabo tau sisi yai, tama te dwasianu ni dabe honu megī tama pedalobadi dao. ³²Te tubo nai wit te digi dolobe, magi basowe, te honu dwasianu pedelai elaluai.

³³Tama Mosesgo te tuni bidi taga peyu, aga te hanu sesege bulu badu pai. Tama agai nogo ugwaba selama, tama Genuai Bidibolo gedu haluasa po wai. Tama te dagalu kulukulu ma wasiḡama, tama te talua ge tulubage me, te olo tulubage me, te tigidali sia sai. ³⁴Tama tuni bidigo suali, te dagalu be kulu wasiḡyu, tama te talua ge tulubage me, te olo tulubage me, te me te silali, tama te tuni bidi aga dali, te gavman seḡ ebo bidi dali, augwaligo kolesaga hasegelisiḡama, tama augwa homu ḡaḡ olama, tama augwaligo dwai seḡ God dali ma yai. ³⁵Mu tama, te tuni bidigo homu ḡaḡ olama, tama agai te Israel hani tagala palobe, te Genuai Bidigo te Mosesgo pedauwalide polobadu po weyu, tama tiaibao wai.

Kuli mano dabe

10 ¹Tama nosali Genuai Bidigo Mosesbolo te po wai, “Nago te tuni bidi sugi pao. Eno digi te tuni bidigo homu me, te aga dali gavman seḡ ebo bidi dabego homu me, te mu ḡaḡ ilai, tama eno te bomai seḡ augwali tomode yaibao. ²Tama eno te seḡ ebaso, te dagego duga wai dabebolo, me te dagego waḡgo wai dabebolo te eno te bomai seḡ Isip tomode yali po weyu, tama te Isip bage augwalibolo eno te bidigo isiḡbo bomai seḡ eyu, tama augwaligo homu kolesaga aiyaba mu elaluali. Tama dage Israel dabe tigidaligo te seḡ ebo koneyu, tama ena digi ena te Genuai Bidi Yawe da, te me dagego mu koneaibao,” Genuai Bidigo Mosesbolo te po wai.

³Tama Moses de Aron si pelama, te tuni bidi agabolo te po wagi pali, “Da Hibru bagego God, Genuai Bidi Yawe, agai te po wai, ‘Nisu naga sogo nago te po sela saꝓu, tama nage ena dologode bidigobewe? Te eno we bidi hani tagala palao, te augwaligo lotu po enaba wagasomainao. ⁴Te nago tama tisabaso da, teda do eno te kuli mano dabe tagala palama, tama nago tɔba paꝓana sagasaibao. ⁵Te augwaligo tigidali habu badu mesega sagaselama, tama nago te tɔ me sugobeo. Tama te nai dabe, me te ni dabe, te talua ge tulubagego dolisiꝓwani nai, te kuli mano dabe augwaligo te tigidali mu tula silaibao. ⁶Augwali te nago beba, me te nage dali gavman seꝓ ebo bidigo beba me, te nago we bidigo beba me, te kuli mano dabe augwali paꝓana saibao. Polobadu waꝓ dabe me te aya dede bidada asali, te megi tama bidibo sogo te tiwai kuli mano dabe hauwa te dagego tɔba me pedelai menio. Te dwai nai mu dao.’ Godigo te po wai.” Mosesgo te po olama, tama aga begelama, te tuni bidi tagalama, buluba pai.

⁷Tama te tuni bidi aga dali gavman seꝓ ebo bidi dabe augwaligo te tuni bidi dali te po wai, “Odao. Nisu naga sogo dabolo te seꝓeꝓ mabo bidi da tomode me bidaibawe? Te we bidi dabe naga te augwali te augwa God Genuai Bidibolo lotu wagi peyu pomainao. Nago te Isip tɔ dolali susiꝓama ebawe?”

⁸Tama augwaligo te Moses de Aron si te tuni bidiba odasa ma asai. Tama tuni bidigo augwali sibolo te po wali, “Dage te duga God Genuai Bidibolo lotu po wagi peyu piꝓo. Tiali goli, eno koneama te de dede naga mu dage paibawe?”

⁹Tama Mosesgo te tuni bidigo po wei ponoyu, te po wai, “Da tigidali paibao. Te dago gesi bidi dali, te monu dabe me, te wai ogwa me, te wegi me, tama te tigidali sipsip, me te meme, me te tigidali bulmakau dabe, te tigidali sela paibao. Magi basowe, te dago genuai nai daa tuyu, lotu po genuai te dago Genuai Bidibolo weyu yaibao,” wali.

¹⁰Tiali goli, tuni bidigo te po wai, “Eno te dage dali dagego we wai tigidali dali tagala paligi sogo da, teda eno homugo dagego Genuai Bidi Yawe aga me dage dali pigi da. Tiali goli, te menio, eno dagego te we wai dali tigidali sela pomainogo ebeo. Mu menio. Eno koneani, dagego dwai kolesaga dabolo yainogo ebao. ¹¹Tama eno te we wai dabe pomainogo me tagala palogobeo. Te bidi dabe augwali naga pelama, te Genuai Bidiba lotu po wagi peyu pomainao.” Tunu bidigo po ola silama, tama augwaligo Aron de Moses si buluba sela saꝓwai.

¹²Tama nosali Genuai Bidigo Moses dali te po wali, “Nago nogo ugwaba selama, tama nago te Isip tɔ usu sao, tama te kuli mano dabe tigidali asomainao. Tama te kuli mano augwaligo te ni yabe dabe tigidali te genuai ais tulubagego dolisiꝓwani nai dabe tigidali tula silimainao,” wali.

¹³Tama Godigo te po obaso, Mosesgo dono ugwaba sali, tama Genuai Bidigo te giliga pedalobo badu te wali te deli sogo giligade aselama, tama be hulua sai. Tama kigamu te waligo te kuli mano dabe selasa asalio. ¹⁴Tama genuai genuai kuli mano dabe aselama, te Isip t̄q tigidali habu badu mesega sagasai. Polobadu Isip hani augwaligo te tiwai genuai kuli mano hani suai meni, tama nosali augwaligo ma sugobeo. ¹⁵Tama te kuli mano augwali mu paḡana sagaselama, tama te t̄q tigidali mu mesega sai, tama te t̄q sisi mu yai. Tama te kuli mano augwaligo te tigidali nosa dabe, me te tigidali nedu du wai te genuai ais tulubagego dolisiḡwani, te tigidali tula silai. Tama te nide te ni yabe, me te Isip t̄qde nosa dabe deli digi me elalubeo. Menio. Augwaligo mu silai.^b ¹⁶Tama tuni bidigo po polo tagala paliyu, tama Moses de Aron si asao wai. Tama augwali pali, tama agai augwali sibolo te po wai, “Eno dwai seḡḡ God dali yali, te dagego Genuai Bidi Yawe dali, me dage si dali me, te eno seḡḡ salio. ¹⁷Tama dage sigo eno seḡḡ megi deli sogo digi ma sela saḡyao. Tama dage sigo Godiba gedu haluasa po weyu, tama dagego Genuai Bidi agabolo hanaluyu, tama te dwai naigo ena dolainogo ebo te sela saḡmainao.” ¹⁸Tama augwali sigo te tuni bidi taga peyu, tama Mosesgo Genuai Bidiba gedu haluasa po wagi pai. ¹⁹Tama Genuai Bidigo te wali hasegelama, te bomai wali te sia ge dega sabo badu asomainogo yai. Tama waligo te kuli mano tigidali te mama yai tamu aḡba selasa pai. Tama te Isipde te kuli mano tede me deli bidibeo. Menio. ²⁰Tiali goli, Genuai Bidigo te tuni bidigo homu daḡ mu ilama, tama tuni bidi te Israel bage augwali tagala palobeo.

Genuai be hulua sai

²¹Nosali Genuai Bidigo Moses dali te po wai, “Nago nogo ugwaba sao, tama moni genuai hulua sabogo te Isip t̄q halua saibao. Te be hulua sabo te gasagi yai mu dao. Te bomai nai augwaligo nogogo tuabo usu tiwai dao,” te po wai. ²²Tama Mosesgo nogo ugwaba sali, tama genuai be hulua selama, tama Isip t̄q tigidali sela sogo be hulua sai elaluai.^c ²³Tama Isip we bidi augwali te augwa hasi suainogo ebo usu ebeo. Tama tigidali we bidi te sogo augwa be tomode bidai. Augwali buluba soabo usu ebeo. Tiali goli, te Israel bage augwali bidibo digi te be hulua sabeo. Menio.

²⁴Tama tuni bidigo Moses i olama, asobode agabolo te po wai, “Dage te duga Genuai Bidibolo lotu po wagi piaḡ. Tama te we wai augwali duga dali pomainao. Tiali goli, te bulmakau, sipsip dabe augwali te Isipde bidimainao,” te po wai.

²⁵Tama Mosesgo po wei ponoyu, te po wai, “Menio. Nago dago God Genuai Bidi Yawebolo ofa yabo nai me sela pomainogo yao. ²⁶Tama dago dena kibu dabe me tigidali selama, dago sela odasa paibao. Dago me deli

^b 10:15 Ped 9:2-3 ^c 10:22 Tib 105:28; Ped 16:10

bidibadi taga pogobeo. Dago kibu dabe meba te dago Genuai Bidibolo ofa yabo sa muaibao. Tiali goli, da te lotu po wabo buluba pedelama, tama dago koneama, mena kibu te ofa yainogo te saibao,” wali.

²⁷Tiali goli, Genuai Bidigo te tuni bidigo homu daꝝ olama, tama tuni bidigo augwali tagala palobeo. ²⁸Agai Mosesbolo te po wai, “Ao, nage pao! Nage te bulude bidigio, gedao. Nago ena ma sugobeo. Tama nago ena ma suagasiyu da, te deli sogo mu eno nage ela muaibao.”

²⁹Mosesgo te po odoyu, te po wai, “Te dolo dao. Eno nage ma sugobeo.”

Te gomunai ogwa augwali isaibao

11 ¹Tama Moses te Isip tuni bidi sugi pesiꝑbadi, hasia bolo Genuai Bidigo Mosesbolo te po wai, “Eno deli sogo digi me te Isip tuni bidi, aga hani we bidi dali, augwalibolo te eno dene mu ilaibao. Tama tebo si, nosali agai dage tagala palaibao. Tama agai dage dali homu nagame elama, dage tagala palogobeo. Menio. Te agai dage polo mu pao weyu, tama dage te bulude tigidali mu sela saꝝwaibao. ²Tama megi nago te Israel we bidi tigidalibolo te po olama, tama augwali te paꝑde bidibo Isip haniba pelama, tama augwalibolo te au dobage gol, me te au dobage silva te augwali momainogo hanalugi pao,” wali. ³Nosali augwaligo tama tiwai, tama Genuai Bidigo te Israel bage augwalibolo te genuai nogi te Isip we bidi augwaligo gedude menama, tama augwaligo au dobage gol me silva te Israel bage augwalibolo mawai. Mu tama, te gavman seꝑ ebo genuai bidi dabe dali, te Isip olo we bidi dali, augwaligo Moses te genuai bidi mu da, te homu yali, tama tiyu, augwaligo te seꝑ ebo homu yai. ⁴Tama te tuni bidigo te “Nago ena ma sugobeo,” te po olama, tama Mosesgo tuni bidibolo po wei ponoyu, te po wali, “Genuai Bidigo po odao. Agai te po wai, ‘Me sogo be huli tomode ena te Isip tꝑ tigidali habuba bilaibao,’ te po wai. ⁵‘Tama tigidali Isip bagego gomunai ogwa isa silaibao. Tama tuni bidi, nago gomunai ogwade digi gagalaibao. Te wai agai nage hasegelama, te tuni bidi pedelainogo yali, te ogwa isaibao. Tama tigidali gomunai ogwa te isiyu, tama te olo seꝑ ebo we dabego gomunai ogwa me tigidali isaibao, te nogi meni yai we dabe sibi augwaligo te tubo nai wit te masingo agaga pelama te bret nigibo seꝑ ebo dao. Tama te tigidali bulmakau dabego gomunai wai dabe me isaibao. ⁶Tama tigidali Isip tꝑ badu bidibo we bidi augwali homu seꝑeꝑ me elama, tama gela genuai mu waibao. Te tiwai gela te Isipde polobadu me wai meni, tama te gela ma wagobeo. ⁷Tiali goli, eno dwai seꝑ deli me te Israel we bidi augwali dali, me te augwaligo bulmakau nai dabe dali, dwai seꝑ me egobeo,’ Genuai Bidi Yawego te po wai. Tama nago koneama, aga da te Genuai Bidi Yawe da, te homu emainogo yai, agai te deli tigi tiwai kolesaga te Israel bage dali ebe, te dage Isip dabe dali ebo kolesaga tiwai ebo menio.” ⁸Tama Mosesgo te po ma wai, “Tama tuni bidi,

nage dali, gavman se ebo bidi dabe, dage tigidali aselama, tama enaba kidu sugunama, po bomonama weyu, te po waibao, 'Nage pao. Nage naga we bidi hani dali, polo pao.' Te se tigidali pedela silama, tama nosali eno te Isip taga paibao." Tama Moses sebe mu elama, tama agai te tuni bidi tagala buluba soai.

⁹Te Moses te tuni bidi polobadu sugi pesiqbadi, tama Genuai Bidigo Mosesbolo te po wai, "Tuni bidigo nago po me odogobeo, magi baso meni, te eno bomai se meba te Isipde ma emainogo tama yaibao," Genuai Bidigo te po wai. ¹⁰Tama Moses de Aron sigo bomai se hauwa deli deli te tuni bidigo gedude yai, tiali goli Godigo aga homu daq olama, tama te tuni bidigo te Israel bage augwali agai tq tagala palobeo.

Nai bodolu muani sogo Godigo Israel bage augwali tagaliyu, ela soai

12 ¹Moses de Aron si Isipde bidibadi, Genuai Bidigo augwali sibolo te po wai, ²"Te megii polua te hasia polua te dagego kalenda bukude elaluaibao. ³Tama tigidali Israel we bidibolo te po wao, "Tama e polua dei nogo si wabode, te deli deli bidigo aga we waide te kibu sipsip wai sa muao, ma aga kibu meme wai me deli sa muao.' ⁴Tama te we bidi wai augwali hani dwasianu eyu, tama augwaligo te nai tula silabo homu isiqbaso da, teda ayago te aga pade bidibo we bidi wai augwali asa olama, tama te hani augwa si te nai dobola selama tuao. Augwaligo homugo te we bidi wai bidibo usu nama, tama te kibu sipsip mi augwaliba dobayao. ⁵Tama dagego kibu sipsip omai, ma te meme omai, te kibu be deli yai sa muao. Dagego te sipsip meme te tigde keni keni yai me selamo dao. ⁶Augwaligo te kibu dabe bugagia tonaluama, te polua dei 14 wabode, tama pio mu tigidaligo te augwa kibu dabe elao. ⁷Tama augwaligo te kibu dabe kaneme meba selama, tama mena bede te nai tubo te be tude elalubo ni pos side me, te ugwadu me, te kaneme pipili pao. ⁸Tama te sogo hulide dagego sipsip meme mi dabe siade ulao. Tama dagego te kibu mi dali, te bo disiqwai bret, me te ha yai donai dali tuao. ⁹Tama dagego te kibu mi disiqwai tugio, tama dagego senede ulama tulamuo. Menio. Dagego siade naga ulao. Tama te kibu tobolu me, te nogo saqa me, te tigidali haliga dabe, te kibu sipsip wai, ma meme wai, tigi sese elalubadi tama ulama, te mi tuao. ¹⁰Dagego te kibu mi meba munalubadi kigamu elamuo. Tama te kibu mi meba kigamu munalubaso da, teda te siaba ulama, tama te siago tigidali dela silimainao. ¹¹Dagego te kibu mi tuabo sogo e tama tiao. Gudubo ugwa gudama, tama saqa nadoba mubadi, bilibo dono nogode tola sao. Tama dagego polo te kibu mi tuao, magi basowe, te nai tuali bodolude ena Genuai Bidi Yawe eno dage ela soaibao."^{d e}

^d 12:11 Te Hibru pogo te Genuai Bidi Yawe agai augwali tagalama, ela soabo bodolu mani sogo, te sogo nogi Hibru pogo begelama tama Pasova, te tama wabo dao.

^e 12:11 Prs 23:5; Nam 9:1-5; 28:16; Bom 16:1-2

¹²“Tama te sogo hulide tama, ena te Isip t̄o tigidaliba pelama, tama te Isip we bidigo tigidali te gomunai ogwa ela muyu, tama augwaligo kibu dabe me elaibao. Ena digi ena te Genuai Bidi Yawe, tama eno te Isip bage augwaligo tibo god tigidali augwali te bomo meni yai bage mu dao hanilama, ola mawaibao. ¹³Tama dagego te be pilali kaneme te dagego d̄aj tiwai elaluaibao. Tama eno te Isip bage augwali dene ilibo sogo, eno te kaneme sulama, tama eno dage ela soaibao.”

¹⁴“Te s̄e yali sogo, dagego bodolu pedalobode, te dagego genuai lotu po wabo sogo yagasaibao, tama te sogo koneama, ena Genuai Bidi eno te s̄e yai. Tama dage hani nosali nosali pedalobo bage, augwaligo me te Godigo dage Tagalama Ela Soali Sogo pedalobode te nai tueibao,” wali.

Te bo disīawai nai bret tubo te genuai side dao

¹⁵Genuai Bidigo po ma weyu, te po wai, “Te nosali bidada peyu, tama dagego te Pasova bret tubosi da, teda dagego te a naga olama, me badu nogo si, te tama side te bo disīawai nai bret tuao. Te hasia mu dagego bede munalubo te bret bo dabo nai yis tigidali selama, tagalao. Magi baso meni, niwai bidi me deli agai hasia sogo te bo dabo nai yis tudu pelama, te a naga olama, me nogo si usu nigi pobaso da, teda aga dagego te Israel hanide sela s̄ayao. ¹⁶Te hasia deli sogo, me te a naga olama, me badu si sogo, dage sisinama, lotu po wao. Dagego te si sogo gasa s̄e me igio. Dagego duga tubo nai dabe naga dodolao. Te s̄e ebo naga te usu da.”

¹⁷“Te hasia deli sogo te a naga olama, me badu si sogo wabode, te sogo digi eno dage hani tigidali te Isip taga peyu odasa paibao. Tama tigidali kibu bede dagego te wali peyu, te Bo Disīawai Nai Bret Tuali bodolu muao. Tigidali sogo nosali dagego hani augwaligo te sogo te dagego genuai side tiwai dao.^f ¹⁸Tama dagego te bo disīawai nai bret te polua dei 14, tede pio tubo gagalama, tama te polua dei 21, te tama te nai tuao. ¹⁹Tama te 7 sogo elalubadi, te yis dagego bede me munaluamo dao. Tama dage hani bidi me deli, ma te gasa bulu bidi dage dali bidibo bidi, te niwai bidigo te yis elalubo bret te sogo tubaso da, teda te bidi aga te dage Israel hanide sela s̄ayao. ²⁰Odao. Te dage tedali tedali mena bidibo me, te Bo Disīawai Nai Bret Tubo bodolu mani sogo, tede dagego te bo dabo nai yis tugio. Dagego te bo disīawai bret naga tuao.” Genuai Bidi Godigo te po wai.

Augwaligo nai te Godigo augwali ela soali side tuai

²¹Tama Mosesgo tigidali Israel tobolu bidi dabe i olama asobode, augwalibolo te Israel hanibolo pusabo po weyu, te po wai, “Dage pelama, te ogwa bidi sipsip meme te dage dali duga we wai pulubade sa munama,

^f 12:17 Sai 23:15; 34:18; Prs 23:6-8; Nam 28:17-25; Bom 16:3-8

tama te Godigo dage ela soabo Pasova side te sipsip meme dabe elao. ²²Tama kaneme te pouba gelama, tama te ni hisop dwasianu nologo selama, tama te kaneme munalubo pouba muao. Tama kaneme dwasianu me badu te be tude elalubo ni pos side piliyu, tama te tu ugwadu podilali nide me, te kaneme pilao. Tama dage tigidali te be tomode bidiyu, tama buluba me soasiama, tama kigamu be posaibao. ²³Tama nosali Genuai Bidi te Isip to habu tigidali teba pelama, te Isip bagego gomunai ogwa dabe elaibao. Tama agai te kaneme dagego be tu sesegede elalubo sulama, tama agai dage ela soyu, tama te ensel mobo bidi dabe augwaligo te be tomoba pelama, dagego gomunai wai dabe elegobeo,” wali.^g

²⁴“Tama dage dali, tama dagego nosali ame nabo bulai wai dabe, augwaligo te tiwai kolesaga tigidali kibu bede yao. ²⁵Tama dage te Genuai Bidigo po daq weyu, dage mawaiba wali te toba bidigi pabo sogo me, tama dagego te Godigo dage tagalama ela soali side te nai tuo. ²⁶Tama nosali dagego wai dabego dagebolo hanaluyu, te po waibao, ‘Magi po pagede te nai tubo dawe?’ ²⁷Tama dagego augwalibolo te po wao, ‘Megi da, te Pasova sogo dao. Dago te ofa Genuai Bidibolo ebo, te agai da Israel hani tagalama ela soali bodolu side te se ebao. Dago te Isip hani augwaligo gomunai ogwa agai elali sogo homugo koneama tiwai. Tiali goli, agai da Israel bagego be tagalama, ela soai, tama dago wai dabe sula tagalama, bugagia bidai.’ ” Mosesgo te po te tobolu bidi dabebolo wai.

Tama nosali te we bidi augwaligo te po odoyu, tama augwali tobolu aiyaba munama, tama Godibolo lotu po wai. ²⁸Tama nosali augwali hodaloama peyu, tama augwaligo te Genuai Bidigo Moses de Aron sibolo wali po wali peyu, te se igi pai.

Te gomunai ogwa dabe isai

²⁹Tama huli tomode mu, Genuai Bidigo te Isip dabego gomunai ogwa tigidali ela silai. Agai te tuni bidigo gomunai ogwade elebo gagalama, tama ela pelama, tama te kalabus bidi dabego gomunai ogwa dabeba me usu nigi pai. Tama agai te haniani kibu hani dabego gomunai wai dabe me elai.^h ³⁰Tama te sogo hulide naga, te tuni bidi aga dali, gavman se ebo bidi dabe me, tama te Isip we bidi tigidali, augwali hodaloama, te wai dabe isai suai. Tama Isip to tigidali habu badu tigidali we bidi genuai gela ola pali, magi basowe, tigidali be deli delide wai ogwa isasa pai.

Te Israel hani augwaligo te Isip to tagalama soai

³¹Tama te sogo hulide naga tuni bidigo Moses de Aron si i olama, asobode augwali sibolo te po wai, “Dage pao! Dage si dali, te tigidali

Israel we bidi, dage polo pião! Eno hani we bidi taga pao. Dagego enabolo hanalu wali te dagego Genuai Bidi Yawebolo lotu po wagi pao. ³²Tama te kibu sipsip, me meme, tama te kibu bulmakau me selama, tama te Isip mu tagalama, dagego polobadu wali po tiwai eyu pao. Tama nago gedu haluasa po Godibolo obaso, agai ena dwagi yai ilimainao,” te Isip tuni bidigo augwali sibolo te po wai.

³³Tama Isip dabe augwaligo te Israel dabe augwaligo te Isip tã tagalama, polo pomainogo bomonama yai. Augwaligo te po wai, “Dagego da taga peyu, polo pesiãyu da, teda da tigidali isaibao,” wali.

³⁴Tama te Israel dabe augwaligo plaua te yis dali begelisiãbadi te pouba muai. Tama augwaligo te pou name ugwago haluama, tama augwaligo nagede tolasa pai. ³⁵Tama Israel hani augwaligo te Isip we bidibolo te gol, me silva, me ugwa dabe, te nai hanalu wai, Mosesgo te po augwalibolo polobadu wai. ³⁶Tama Genuai Bidigo te Israel hani augwalibolo genuai nogi te Isip we bidi augwaligo gedude mawai. Tama te Isip dabe augwaligo te Israel hanigo sainogo homu yali nai augwalibolo mawai. Tame te kolesagade Israel hanigo te Isip dabego nai umabo sai.ⁱ

³⁷Te Israel bage augwali hogolama peyu, te Rameses hanu tagalama, tama te Sukot hanuba pai. Te sogo te Israel hani bidi te bidi sese hauwa 600,000 mu pali, tiali goli augwaligo te we wai dabe dali nedebeo.

³⁸Tama te Israel hani isiãwai we bidi hani hauwa, me te bulmakau, me sipsip, me meme dabe hauwa, te augwali dali pai. ³⁹Tama augwaligo bret te yis meni yai plaua te Isipdu sela asali tedali ulai. Augwaligo te yis te plaua dali musiãwai, magi basowe, te Isip dabego augwali polo mu sela sayu, tama augwaligo te nai sisi yabo sogo meni yai.

⁴⁰Tama te Israel hani augwali Isip tãde kibu be bidi sese hauwa 430 mu bidai.^j ⁴¹Tama te sogo mu dolo augwali Isip tãde bidali kibu be bidi sese hauwa 430 mu bidama, tama Genuai Bidigo Israel hani dabe we bidi augwaligo te Isip tã taga soai. ⁴²Tama te sogo hulide naga Genuai Bidigo te Israel hani bugagia tonaluai, tama augwali te Isipde selama odasa asai. Tama tibaso, tigidali sogo nosali kibu bede augwali te sogo hulide odasa asali sogo Genuai Bidi homugo koneama, tama bugagia tonaluyu, augwaligo agabolo lotu po wabo dao.

Te Pasova naide wabo bomai po

⁴³Genuai Bidigo Moses de Aron sibolo te po wai, “Odao, te Pasova nai dabego bomai po e dao. Te Israel hani isiãwai gasa bulu we bidigo te nai tugio. ⁴⁴⁻⁴⁵Te augwali dage dali pẽwadage sogo naga bidibaso da, ma augwali mone sabo sã eyu da, teda augwaligo te nai sela tugio. Tiali goli,

ⁱ 12:36 Sai 3:21-22 ^j 12:40 Gag 15:13; Gal 3:17

dagego abelama te olo sę ebo bidi pedelali, tama dagego augwali tigiwali togwali, te bage augwaligo te nai tubo usu dao.”

⁴⁶“Te we bidi augwaligo te mi te nai sisi yali bede naga tuao. Augwaligo te nai meba te buluba sela pigio. Tama me te augwaligo te kibu sipsip dili dabe togogio.^k ⁴⁷Tama tigidali Israel hani augwaligo te nai tubo sę ilao. ⁴⁸Tiali goli, tigiwali togosiawai bidigo te nai tugio. Tama gasa bulu bidi hani me deli te dagego bulu tōba bidagasai yai baso da, tama te bidi agai te nai sela tuainogo yai, te Genuai Bidi Yawe eno dage tagalama ela soali sogo tubo nai, tama dagego te bidi aga bidi tigidali, me te mena bidi aga dali bidibo bidi dabe, te tigidali augwali tigiwali togwa. Tama nosali te bidi aga hani dali augwaligo te nai tumainao. Tama te bidi aga te dagego bidi me deli tiwai bidaibao. ⁴⁹Tama te gasa bidi hani te Israel hani augwali dali bidagasali bagego te Israel hanigo Pasova nai bomai po tiwai naga wali peyu, dage dali bidao,” wali.

⁵⁰Tama te Israel hani augwaligo te Genuai Bidigo te Moses de Aron sibolo po wali gilama te tiwai sę yai. ⁵¹Tama te sogo naga Genuai Bidigo te Israel hani tigidali Isipde selama, tama augwali odasa asai.

Israel bage augwaligo gomunai ogwa Godibolo mawai

13 ¹Genuai Bidigo Mosesbolo te po wai, ²“Dagego gomunai ogwa tigidali enabolo mao. Dage Israel hanigo gomunai ogwa tigidali, me te dagego tigidali sipsip, meme, bulmakau gomunai omai wai dabe me, te enaba naga mao. Augwali te eno tedali muani nai dao,” wali.^l

Te Bo Disiawai Nai Bret tuali genuai side

³Mosesgo te we bidi augwalibolo te po wai, “Dage te Isipde bidali, te kalabus sę ebo bulu dao. Tama aga bomogo digi, Genuai Bidigo dage Isip bulude selama, odasa asai. Tama tibaso, tigidali kibu be dagego agai te tama tiali side homugo koneama, tama dagego te bo dai nai bret dali tugio. ⁴Tama megı dagego te Isip taga sobao, te side e polua delide, augwaligo te nogi Abip wai. ⁵Tama Genuai Bidigo dago wai dabe dali po daę olama weyu, te Kenan dabe augwaligo tō, me Hit bidi dabe, me te Amor dabe, me te Hivi, me te Jebus dabe, te bidi hani augwaligo tō dage mawaibao. Te tō wiegi yai mu, tama ili hauwa elalubao. Tama Genuai Bidigo dage te tōba odasa pabo sogo, dagego te Bo Disiawai Nai Bret tuali te genuai side tigidali kibu be e Abip nogi wabo poluade te sę wali piąo. ⁶Tama dagego te bo disıawai nai bret te a naga olama me badu nogo si tama side tuao. Tama a naga olama me badu si sogo, te dagego te genuai nai tuyu, Genuai Bidibolo lotu po wao. ⁷Tama te a naga olama me badu nogo si te side te we bidi augwaligo te bo disıawai nai bret

^k 12:46 Nam 9:12; Jon 19:36 ^l 13:2 Nam 3:13; Luk 2:23

tulama, tama dagego te yis, me bret te yis elalubadi, te bulude me te dagego t̄ode munalubadi elaluamu dao. ⁸Tama te genuai side pedalobo si, dagego duga ogwa te wai dabe augwalibolo te po haninama pusao, ‘Dago te kolesaga tigidali ebo, te Genuai Bidi agai da te Isip t̄ode bidibadi, da odasa asali sogo koneagasu, te se ebo dao.’ ⁹Tama dagego kegeda pidali weyu, te tiwai lotu po wabo kolesaga da, te d̄aḡ me deli dao, te dagego duga nogode me gesabidide elaluabo d̄aḡ aḡ yaibao. Tama te Genuai Bidigo bomai po te dagego homu kolesaga iliyu, tama po wabo nigilaibao. Magi basowe, Genuai Bidigo bomogo se elama, tama da Isip t̄ode selama, odasa asai dao. ¹⁰Tama tigidali kibu bede te tiali sogo pedalobode, te sogo dagego te nai tuo,” Mosesgo te po wai.

Te gomunai wai ogwa dabe

¹¹Te Mosesgo po ma weyu, te po wai, “Genuai Bidigo dage te Kenan dabego t̄oba odasa paibao. Tama agai dagebolo me, te dagego waigo wai dabe, te dagego waḡ dabe, augwalibolo me te t̄o maiabo po polobadu digi d̄aḡ wai dao. ¹²Tama agai te t̄o dageba mabo sogo, tama dagego gomunai ogwa tigidali te dagego Genuai Bidiba mao. Tama tigidali kibu dabego gomunai wai, te me Genuai Bidigo naga dao.”^m ¹³Tiali goli, dagego te sipsip wai me deligo te donki gomunai wai ma dobola abelama, ofa ilao. Tiali goli, dagego te donki ma abesiḡy da, teda dagego te donki dogoni togwao, isimainao. Tama dagego duga digi te gomunai ogwa wai dabe tigidali ma abelao.”

¹⁴“Tama nosali dagego ogwa dabego dagebolo te tiwai hanaluyu, te po tiwai waibao, ‘Te kolesaga page mena tama dawe?’ Tama dagego augwalibolo te po wao, ‘Da Isip bulude kalabus se ebadi, tama Genuai Bidigo bomai se mu elama, tama da Isip bulude selama, da odasa asai dao. ¹⁵Tama hasia sogo Isip hani tuni bidigo homu kolesaga hasegelisiḡy, tama da tagala palobeo. Tiali goli, Genuai Bidigo te Isip dabego gomunai ogwa tigidali, me te augwaligo kibu dabe gomunai wai tigidali ela muai. Tama megi dago te kibu dabego gomunai wai te Genuai Bidiba ofa ebo dao. Tama tiali goli, dago te dena gomunai wai ogwa te augwali ma abelebo dao.’ Te po duga ogwa dabebolo wei ponao. ¹⁶Dago te se ebo te dago homugo ma koneama, te Genuai Bidigo bomogo aga digi da te Isipde selama, odasa asai. Tama te dago nogode me gesabidide muai nai tiwai, tama dago homu hodolobo se ebo dao,” Mosesgo te Israel hani we bidibolo te po wai.

God te p̄ode me siade bidiyu, augwali dali pai

¹⁷Te Isip tuni bidigo te Israel we bidi hani tagala palai sogo, Godigo augwali te nabis badu te p̄ewadage t̄udu te Filistia t̄o badu odasa pabeo.

^m 13:12 Luk 2:23

Magi basowe, Godigo te homu yai, ‘Te Israel hani augwali te pewardage tũdu odasa peyu da, tama gasa hanigo augwali dali hwjainogo ebo suyu da, teda augwaligo homu hasegelama, te Isipba ma paibao. Tama te Israel hani augwaligo te tama tebo te eno hagela yai.’¹⁸ Tama tibaso, Godigo augwali te ni meni yai te t̄q wa pai bulu, te badu bagulama soyu, tama augwali te mama yai tamu āɓba pedelai. Augwaligo te boi bidi dali hwj̄bo nai me tolama pai.

¹⁹Polobadu Josepgo te Israel hanibolo te po wai, “Nosali ena isama, tama Godigo dage Isipdu te Kenan t̄ɓa ma oda sagasobode, tama dagego eno dili dabe dali selasa pao.” Tama Israel dabe augwaligo bomai po dāɗ weyu, tama tiaibao wai. Tama Mosesgo te Josepgo dili dabe selama, tolasa pai.”²⁰ Tama Israel hani augwaligo te Sukot hanu tagalama, te masigi sane yai bulu Etam sesegeba pedelai. ²¹Tama siade te Genuai Bidi te genuai bobage p̄q tomode bidali, tama aga polasa peyu, augwali pabo t̄ɗ ola mawai. Tama hulide aga te genuai bobage sia dabe tomode bidiyu, tama aga polasa peyu, tama augwalibolo te sia ula ilai. Tama tibaso, augwali te siade me, hulide me pabo usu yaibao. ²²Tama sesemane sogo siade te p̄q te we bidi augwali pobadi te p̄q polasa pali, tama hulide me te sia polasa peyu, ula ela pai.

Augwaligo te mama tamu āɓ togwai

14 ¹Te Genuai Bidigo Mosesbolo te po wai, ²“Te Israel dabe augwalibolo te po olama, tama augwali ma geasa peyu pelama, tama te tamu āɓ sesegede te bulu Pihahiro, tede te bidabo pesage nigao. Te bulu te Mikdol dali, te mama tamu āɓ dali, te si tomode elalubao, te Balsefon bulu dolo si dao. ³Tama augwali tama tibaso da, teda te Isip t̄ni bidigo augwali soali gegelama suyu, te po waibao, ‘Te Israel hani augwali te pabo t̄ɗ susiama gegede biliyu, te masigi sane yai bulude olo bilama, tama augwaligo te badu t̄ɗ taga pabo menio,’ t̄ni bidigo te homu yaibao. ⁴Tama eno te t̄ni bidigo homu hasegelama, tama agai dage pobeasa asomainogo yaibao. Tiali goli, eno aga te agai ami bidi dabe aiyaba elaluama, tama eno genuai nogi te s̄e ebode saibao. Tama Isip dabe augwaligo koneama, ena digi ena Genuai Bidi Yawe dao,” Genuai Bidigo te po wai. Tama po obaso, te Israel dabe augwaligo te Genuai Bidigo po odolama, augwali ma geasa pai.

⁵Tama te Isip we bidi dabego te Israel bage augwali wi pali po te t̄ni bidibolo wai, tama aga dali, te gavman s̄e ebo ofisa bidi dabe dali, augwaligo homu hasegelama, tama augwaligo te po wai, “Magi baso dago te Israel hani augwali tagala palaliwe? Tama meḡi da, augwaligo dago s̄e egobeo. Dago dwai geda mu muai dao,” te po wai. ⁶Augwaligo te

po olama, tama tuni bidigo aga kibu hosgo kegela pabo hwıbo nai karis dali, te aga ami dabe augwali sai. ⁷Tama agai te bidi sese hauwa 600 te wiegi yai polasa peyu hwıbo nai karis dabe dali, te ami bagego gasa karis tigidali me, te agai karis tonalubo ofisa dabe augwali me selama, pai. ⁸Tama Israel hani augwaligo koneani, te Isip dabe augwali aiyaba elaluama, tama augwali dwagi yai homu dali pai. Tiali goli, Genuai Bidigo te tuni bidigo homu hasegelama, tama tuni bidigo augwali nosali polo pobeasa asai. ⁹Te Isip ami bidi dabego karis elaluai, tama te ami bidi dabe augwali te hosde duayu, tama ami bidi dabe meba tıdu pali, tama augwali tigidaligo te Israel hani augwali pobeasa peyu, pai. Tama augwali te Israel bage bidibo paba pedelai, te mama tamu aı sesegede, te Pihahiroto bulu pade, te Balsefon bulu dolo si elaluali, tede pedelai.

¹⁰Tama te Isip tuni bidi aga ami dabe dali, augwali paba polo asobo te Israel hani augwaligo suai. Tama augwali wi mu eyu, tama Genuai Bidigo augwali tau somainogo i wai. ¹¹Tama augwaligo Mosesbolo te po wai, “Magi baso nago da e masigi yai kemi tı buluba olo odasa asaliwe? Nago da e olo bulude isimainogo yaliwe? Tama da te Isip tıde bidibadi isigi sogo da, te usu igi dao. Te Isip bulude elalubo gu page te da usu igi dao. ¹²Dago te Isip taga soasiabadi, tama dago nagebolo te tiwai se pedelaiba, te po walio. Tama dago te po wai, ‘Da tagalama, da ede bidimainao, tama da te Isip dabego olo se bidi bidimainao,’ te po wai. Tama da se olo mu naga igi dao. Tama tiyu, da e olo masigi naga yai bulude isibo dwaibao.” Augwaligo te po wai.

¹³Tama Mosesgo augwalibolo te po wei ponoyu, te po wai, “Wibo tagalao. Bomonama dolaluyu, tama megı Genuai Bidigo dage tau selama, tigidali se ebo suaibao. Tama megı dagego te Isip dabe subo, tiali goli nosali dagego augwali munu ma sugobeo. ¹⁴Odao, Genuai Bidigo dage tau siyu, hwıaibao. Tiali goli, duga digi magi se me elamuo. Dagego pedauwali daı naga wao,” wali.

¹⁵Tama Genuai Bidigo Mosesbolo te po wai, “Magi baso nago ena i wabo se ebawe? Te Israel dabe augwalibolo te po weyu, augwali pomainao,” te po wai. ¹⁶“Tama nago dono ugwaba selama, tama te tamu aı usu sao. Tama te we si badu peda pelama, tama wa pai tı pedelama, tama Israel dabe augwali te tomodu pelama, te u badu pedalomainao. ¹⁷Tama eno te Isip bage augwaligo homu kolesaga te homu tomoba masigi sawai bidigo homu tiwai ilama, tama augwaligo dage Israel dabe wali pobasa asaibao. Tama eno te tuni bidi aga karis dabe dali, me te hosde duawali ami bidi dabe tigidali, augwali aiyaba elaluama, tama eno te se yalide te eno genuai nogi saibao. ¹⁸Tama eno te Isip dabe aiyaba elalubaso, tama augwaligo homugo ena digi te ena Genuai Bidi Yawe dao,” agai te po wai.

¹⁹Te Godigo Ensel Mobo Bidi te Israel hani dabe polasa pabo bidi, tama augwali tede tagalama, aga augwali nosali pai. Tama te Israel dabe pabo

tedu polasa pabo pɔ, te me geasa te augwali tudi badu ma doligi sai. ²⁰Tama te sogo hulide te pɔ te Isip dabe dali, te Israel dabe dali, augwali tomode ɗaj tiwai elalui. Tama te pɔgo te Isip dabe augwali bidibo badu te be hulua sai mu elalui. Tiali goli, te pɔgo te Israel dabe bidibo digi, te badu te ula elalui. Tama tibaso, te sogo hulide te Isip dabe augwali te Israel hani paba pabo te usu ebeo.

²¹Tama Mosesgo nogo ugwaba selama, tama tamu aɗ hulide usu sai, tama Genuai Bidigo bomai wali te sia ge pedalobo badu asiyu pedelali, tama te waligo te tamu aɗ te sia ponobo tiwai edubadi, tama be posai. Tama waligo te tamu aɗ ma sela sɔbode, tama tamu aɗ tomode si peda pai. ²²Tama tomode tɔ tigidali wa pai, tama Israel dabe augwali tedu uba pai. Tama te tamu aɗ si dali si badu te be daga tiwai dolalui.^o

²³Tama tigidali Isip ami bidi dabe augwaligo te Israel dabe elainogo wali pobasa peyu, augwali me te tamu aɗ tomodu pai. Te hos dabe, me te karis, me te hosde dua yali ami bidi dabe, tigidali hodobo pai. ²⁴Tama Genuai Bidi te bobage pɔde me te siade bidiyu, tama te be posobo pade agai te Isip ami bidi aiyaba tonono bilama, tama agai augwaligo homugo kolesaga te polobo bidigo homu tiwai ilama, tama augwali midigi dwai mu yai. ²⁵Genuai Bidigo te augwaligo karis nadoba te tɔde ɗaj ilali, tama te karis dabe bomonama uda wainogo yali usu ebeo. Tama te Isip dabego te po wai, “Odiɔ. Te Genuai Bidi Yawe aga hani Israel augwali tau siyu, da dali hwɔbao. Da polo wi pinao. Dago augwali polo taga pinao,” wali.

²⁶Tama tibaso, Genuai Bidigo Mosesbolo te po wai, “Nago nogo ugwaba selama, te tamu aɗ usu sao, tama te aɗ ma asiyu, te Isip ami bidi dabe dali, me te karis, me hos dabe me, augwali te aɗgo mesega sagasaibao,” wali. ²⁷Tama Mosesgo nogo ugwaba selama, te tamu aɗ usu sali, tama be posobode te aɗ ma asiyu, tama te polobadu elaluali tiwai ma yai. Tama te Isip dabe augwali wi pabo usu sali, tiali goli augwali usu meni yai, magi basowe, Genuai Bidigo augwali tigidali te tamu wɛ tomoba popogolo pai. ²⁸Tama te Isip tuni bidigo ami bidi dabe augwali te Israel hani wali peyu, te tamu wɛ tomoba pali bage, te wɛ ma asiyu, te Isip ami bidi dabe augwali mesega sai. Tama agai te ami dabe tigidali, me te hos, me karis dabe, augwali dali agai te wɛgo mesegelali, tama deli me bidibeo. Tigidali isai.

²⁹Tiali goli, te sɛ pedalisiɔbadi, te Israel dabe augwali te tɔ wai digi pali, tama te wɛ te be daga u badu me e badu elalubo tiwai yai, tama augwali pelama, te wɛ u badu hasia sabolai dao. ³⁰Tama te sogo Genuai Bidigo te Israel dabe te Isip dabego nogode ma dobola sai, tama Israel dabe augwaligo te Isip isai bidi dabe te wɛ sesegede munalua pai suai.

³¹Augwaligo te genuai sę Genuai Bidigo eyu, te Isip dabe aiyaba elalubo suai. Tama Israel we bidi augwali wi elama, Genuai Bidi dologode bidiyu, tama augwaligo bomu yai homu agade daų weyu, tama aga sę bidi Moses dali tiwai.

Mosesgo tęabi po

15 ¹Tama te sogo Moses dali te Israel dabe augwaligo tęabi po me deli te Genuai Bidibolo e tiwai tęabi wali, “Megi te eno Genuai Bidi Yawebolo tęabi waibao, magi basowe, agai te genuai wabi mu hwınama, tama tede genuai wiegi yai nogi sai dao. Agai te hosde duawali bidi dabe dali, te hos dali, augwali te tamu aı tomoba sawai.^p ²Genuai Bidigo digi ena bomu ilali, tama eno tęabigo aga nogi ugwaba saibao. Agai ena ma dobola sali, aga da te eno God mu dao, tama eno aga nogi ugwaba sobao. Tama aga te eno ayago God, tama agai genuai nogide eno tęabi po waibao.^q ³Tama Genuai Bidi aga te boma pai ami bidi mu dao. Genuai Bidi Yawe naga te aga nogi dao. ⁴Agai te Isip tuni bidigo ami bidi dabe dali, te hwıbo nai karis dabe dali, augwali te tamu aıba sawai. Tama te tuni bidigo ami bidi dabego polasa pabo bidi kapten te wę tulama, tama te mama tamu węde isai dao. ⁵Genuai węgo augwali mesegai, tama augwali aiyaba mu dulama, te kemi masigi tiwai yai.”

⁶“Genuai Bidi, nago dolo nogogo bomu genuai elalubao, tama agai te boi bidi aęalama, tama augwali mu mia sawai. ⁷Te nago genuai bomogo digi nago naga boi bidi augwali aiyaba elalui. Nago sębę te sia tiwai pedaliyu, tama augwali te wa pai nosa tiwai siago ulai. ⁸Nago te bomai wali hodolai. Tama waligo te wę bo ugwadu ilali, tama wę te obo tiwai dolo dolalui. Tama aiyadu mu elalui tamu wę dila pai pedelai.”

⁹“Te boi bidi dabe augwaligo te po wai, ‘Dago augwali pobelama, tama augwali daų waibao. Tama dago augwaligo wiegi wiegi yai nai dena hanibolo dobola saibao. Tama tigidali nai dago sainogo yali nai te dago siyu naga yaibao. Tama dago augwali dali te poapi ge hwago hwınama, tama dena bomogo digi te dago augwali dolaibao.’ ”

¹⁰“Tiali goli nago mobo deli sogo naga ponani, tama tamu aıgo Isip dabe mesega sai. Tama augwali aiyaba tomoba mu te tamu wę tomoba masigi dulubo tiwai yai.”

¹¹“Genuai Bidi Yawe, mena gasa god bidibo te nago bomu tiwai dawę? Me deli menio. Nage te polalubo tuni bidi te nage ugwadu tama tigidali wiegi yai tedali mu dao. Tama niwai bidi te nage dali usu tiwai dawę? Me menio. Nago te bidigo isawai bomai sę eyu, tama genuai sę ebaso, te we bidi augwali nagede wi mu ebo dao. ¹²Nago dolo nogo dodolobode tama tę dedage elama, tama te boi bidi dabe augwali te tę dedageo dalai.”

¹³“Tama nago da homu dene eyu, tau sabo silisiąbo kolesaga eyu, tama nago da ma selama, tama nage polasa peyu, da odasa pai. Tama nago bomogo digi da pabo dodolama, tama nago da te naga digi bidainogo yali wiegi yai buluba odasa pai. ¹⁴Tama meba tųde bidibo bage augwaligo te sę yali po odolama, tama augwali wi mu eyu, tama augwali noma saibao. Tama te Filistia bage augwaligo me te po odolama, wi mu yaibao. ¹⁵Tama Idom tųde bidibo genuai bidi augwali wi mu yaibao. Tama Moap bomai bidi dabe augwali didibili mu yaibao. Tama Kenan dabe augwaligo bomo te olo wę ayana pabo tiwai yaibao. ¹⁶Genuai Bidi, nago genuai bomo augwaligo sulama, tama genuai wigo augwali mesejelama, tama augwaligo magi sę me deli yabo usugobeo. Augwali te ni tigi tiwai, olo naga dolalubadi, tama naga we bidi da ela soala silibo usu yaibao. Genuai Bidi, nago da Isipde ma sela asaligo tama da olo bugagia bidaibao. ¹⁷Tama nago da odasa asiyu, te da naga bulu dude bugagia dualama bidimainogo yaibao. Tede te naga digi naga be sęwai dao, te bulu nago nogogo digi bugagia dodolama muai dao. ¹⁸Tama Genuai Bidi nage tuni bidi sesemane sogo bidada paibao.” Moses agai te Genuai Bidi Yawebolo te tęąbi po wai.

Miriamgo tęąbi

¹⁹Te mama tamu ąi te tų wa tiwai pedelai tiwaidu tama te Israel dabe pelama, u badu pedelalio. Tiali goli, Isip tuni bidigo ami bidi dabe dali, te hos dali, te karis me, augwali te Israel dabe augwali wali asai, tama Genuai Bidigo te tamu ąi ma asomainogo ilama, tama augwali te węgo mesega sai. ²⁰Tama nosali, Genuai Bidigo po pusubo we Miriam, te Aron aga abe, agai te dwasianu kilikili wabo habili tiwai nai musik sali, te tigidali we dabego me te tobage habili tiwai nai musik selama, te Miriam pabo wali pai. Tama augwaligo te musik dabe eliyu, tęąbi eyu, tigi bebege eyu, danis me yai. ²¹Tama Miriamgo tęąbi e tiwai augwalibolo wali, “Genuai Bidibolo tęąbi wao, magi basowe, agai genuai wąbi mu hwįani aiyaba elaluai. Agai te hos dabe dali, te hosde duayali bidi dali, augwali te tamu ąi tomoba sęwai dao.”

Ha ebo wę

²²Nosali Mosesgo Israel dabe augwali te mama tamu wę tagalama odasa pali, tama augwali te wa pai ni meni yai bulu Sur tedu pai. Tama augwali sela sogo te wa pai nai meni yai buludu pai, tama augwaligo wę me subeo. ²³Tama nosali augwali te ąi me elalubo bulu me Mara teba pedelali, tiali goli te wę dwai ha pedauwalide ebo wę, tama augwaligo te wę tuabo usugobeo. Te Mara nogi page e tiwai, te pedauwalide ha ebo nai dao. ²⁴Tama te we bidi augwaligo wado po weyu, tama po hauwa Moses dali weyu, tama augwaligo agabolo te tiwai po hanalu wai, “Te dago magi nai tuguwe?”

²⁵Tama tibaso, Mosesgo gedu haluasa po bomonama, Genuai Bidibolo wali, tama Genuai Bidigo aga ni me deli ola mani. Tama Mosesgo selama, te wɛba sɛwai, tama te wɛ wiegi yai pedelai, tama augwaligo tuabo usu yai.

Te bulude Godigo te Israel bagebolo bomo yai po meba augwaligo te po wali pomainogo mawai, tama me agai augwali usu sela suali, te augwaligo aga wali asobowe naga suainogo yai. ²⁶Tama Godigo augwalibolo te po wai, “Dagego eno po bugagia odao, te dagego God Genuai Bidi, tama te sɛ dabe ena digi te dwagi yai sɛ da homu ebo, tama dagego eno bomo yai po tigidali wali piɛo. Dagego tama tibaso da, teda eno dagebolo te haniani dwai gasi te Isip we bidi augwalibolo yali te tiwai dagebolo me magobeo. Ena digi ena te Genuai Bidi dao. Tama eno naga te dagego gasi dabe usu ma ilibo dao,” wali.

²⁷Tama nosali Israel dabe augwali te Elim buluba pedelai. Tama Elimde wɛ ulu pedalobo dedage nogo si olama sɛgɛgo si, tama ni bidi sese sela olama nogo si, 70 ni det elaluai. Tama Israel dabe augwaligo augwa name ugwa be dabe te wɛ ulu dedage pɛde dodolama, bidai.

Israel dabe augwaligo tuabo nai mana me, ba me sai

16 ¹Te Israel hani te Isip taga soalama, tama pelama, tama te bulu Elim tede osogo bidali. Tama te Isip taga soalama, tama polua deli silama, te polua dei 15, te side tigidali Israel hani we bidigo te Elim bulu tagalama, tama te tɔ wa pai nai meni yai bulu nogi Sen tomoba pai. Te bulu te Elim de Sainai te bulu si tomode elaluai. ²Tama augwaligo wado po, me te po hauwa te Moses de Aron si dali te bulude wai. ³Augwaligo te bidi si dali te po wai, “Dago homugo Genuai Bidigo da Isipde eligi sogo da, usu igi dao. Polobadu da Isipde bidibadi, mena tiwai nai dabe, me hasa mi me, te dago homugo digi sai dao. Tiali goli, dage sigo da e nai meni yai wa pai buluba odasa asai, tama dage sigo homugo da nai sili bidilama, tama da tigidali isimainogo homu yai. Tama da Isipde bidibadi isigi sogo da, te wiegi yai mu igi dao,” wali.

⁴Tama Genuai Bidigo te po Mosesbolo wai, “Eno te bret dagalude tulalubode te dagego siɛo. Tama tigidali deli deli side te we bidi augwali pelama, te side tuabo te nai sigi pao. Te eno augwali te kolesagade usu selama, tama augwaligo eno po wali pogowe, te eno koneainogo tiaibao.” ⁵Tama te nogo a olama me badu deli te side augwaligo si sogo tuabo nai sisilama, sela muao,” te po wai.

⁶Tama Moses dali Aron sigo te Israel we bidi hani tigidalibolo te po wai, “Tama pio te dagego bugagia koneagameo, Genuai Bidi aga digi dage Isipdu odasa asai dao. ⁷Dagego wado po weyu, po hauwa aga dali

wali, te agai odalio. Tama tibaso, kigamu te Genuai Bidigo digi aga bomo de ula dali si dagego sueibao. Da si te olo bidi naga dao. Tama magi pode dagego wado po da si dali obawe?”⁸ Tama Mosesgo po ma wai, “Genuai Bidi aga digi dage te nai mi pio mabode te dagego tuagameo. Tama agai te nai bret kigamu te dagego homugo somainogo mawaibao. Magi basowe, dagego po hauwa aga dali wabo odai. Tiali goli, da si te olo nai tiwai dao. Dagego wado po te Genuai Bidi dali naga obao.”

⁹Tama Mosesgo Aronbolo te po wai, “Augwalibolo e po pusao, ‘Genuai Bidigo te dage tigidali we bidigo wado po wabo odalio. Tama tibaso, dage tigidali aselama, te Genuai Bidi p̄ba dolagasao,’ te po wao.”

¹⁰Tama Arongo te po augwalibolo wali, tama te sogo agai po odubadi, augwaligo te masigi kemi yai buluba tonono pai, tama polo tama Godigo genuai ula de bomo dali si, te augwali polasa pabo bobage p̄q tedu pedelai.

¹¹Tama Genuai Bidigo Mosesbolo te po wai, ¹²“Eno te Israel dabe augwaligo wado po wali po odalio. Tama te po augwalibolo wao, te pio mu augwaligo te nai mi tuyu, tama kigamu augwaligo te bret te augwa homugo sela tuao. Augwaligo te nai sela tuyu, tama augwaligo te tiwai koneyu, ena Genuai Bidi Yawe, ena digi ena te augwaligo God da, te augwaligo konemainao,” wali.

¹³Tama pio dwasianu ba hani hauwa augwali bidibo pesageba p̄aḡana sagasai. Tama me te kigamu te hulide tulubage segeni yali aḡ te augwali bidibo pesage nosa p̄ade elaluai. ¹⁴Tama te w̄ wa paide, augwaligo suali, te dwasianu nai hauwa te t̄de munaluali, te ni yabe dabe pepeda pabo tiwai yai. ¹⁵Tama Israel dabe augwaligo te nai suali, tama augwaligo konebeo. Tama augwaligo augwa hasibolo digi hanaluyu, te tiwai po wai, “Te magi nai dawe?” Tama Mosesgo augwalibolo te po wai, “Te bret Genuai Bidigo digi dagego tuabo nai mobao.”^s ¹⁶Tama Genuai Bidigo tama po wai, ‘Dage deli deligo duga we wai dabe dali usu sisinao. Dagego te lita si sabo sene deli delide te duga ugwa bede bidibo we bidi wai puluba usu nama sao,’ wali.”

¹⁷Tama Israel dabe augwaligo tama tiwai, tiali goli mebago hauwa sali, tama mebago dwasianu naga sai. ¹⁸Tama augwaligo te nai dagala subo sogo, te nai hauwa sali bidi dabego, te sene usu menio. Tama te dwasianu naga sali bidi dabego, te augwaligo nai habuge ebeo. Tama tigidaligo te nai tulama, tama augwali tabi p̄aḡanama, tama augwali nasi me ebeo.^t

¹⁹Tama Mosesgo augwalibolo te po wai, “Dagego nai meba te do tuaiba olama, me munamo dao.” ²⁰Tiali goli, mebago Mosesgo po odisiḡama, wali pabe, tama augwaligo nai meba nosali side tuainogo muai. Tiali goli, kigamu dwasianu kigi dabe te naiba p̄aḡana selama, tama kugumini dwai pedelai. Tama Mosesgo augwali dali wado yai.

²¹Tama te we bidi augwaligo tigidali sogo kigamu te nai augwa sabo usu tama sai. Tama giliga nanobo sogode, te sisama tɔde munaluali nai, te wɛ tiwai pedelama, odolali sia sai. ²²Tama te namba 6 dei augwaligo nai si sogo tuabo usu siyu, te dwasianu sene si te deli deli bidi usu nama sai. Tama Israel tobolu bidi dabe aselama, Mosesbolo te sɛ yali po wagasai. ²³Tama Mosesgo augwalibolo te po wai, “Genuai Bidigo te po wai, do te olo bidibo side dao. Te Sabat side, tama te Genuai Bidigo olo bidibo side. Tama megɛ te dagego nai meba siade ulai wida, teda dagego uluiɔ, tama meba te dagego sene ulainogo wida, teda te sene ulao. Tama te me badu munalubaso da, teda te do ulabo munalumainao,” te po wai.⁴

²⁴Tama augwaligo Mosesgo po wali pelama, te sogo nai meba ula tuali, tama augwaligo ulusiɔwani nai meba te nosali side ulainogo muai. Tama do kigamu augwaligo suai, te nai damua piɔama, tama dwasianu kigi dabe me pedalobeo. ²⁵Tama te side Mosesgo te po wai, “Megɛ te Sabat side, te side olo bidiyu, genuai nogi Genuai Bidibolo mabode, tama megɛ dagego nai te dage bidibo pesage tɔde me gegegobeo. Tama dagego te do munaluali tubo nai megɛ tuagameo. ²⁶Tama te tigidali Sarere te a naga olama me deli tede, dagego te nai saibao. Tama a naga olama me badu nogo si, te side te olo bidibo side, tama te side te tɔde nai me munalugobeo,” wali.

²⁷Tama agai te po wai goli, te nogo a olama me badu si te olo bidibo Sabat side te we bidi meba nai sigi peyu pai, tiali goli augwali odolali gegai. Nai me munalubeo. ²⁸Tama Genuai Bidigo Mosesbolo te po wai, “Nisu sogo dagego te dwai kolesaga ebo tagalama, tama dagego eno bomo yai po wali paibawe? ²⁹Bugagia odao, Genuai Bidi eno dagebolo te olo bidabo side te mobao. Tama tibaso, te dwasianu Sarere eno dagebolo eno te deli sogode te si sogo tuabo nai mawaibao. Tama, te nogo a naga olama nogo me si wabo side tigidali we bidi te ugwa bede bidiaɔ. Te bidi me deligo me, te wego me, te aga bidibo obo bolama, te buluba me pelamo dao.” ³⁰Tama te po obaso, nosali augwali te a naga olama me badu nogo si te side olo bidai.

³¹Tama Israel we bidi augwaligo te tɔ daide sali nai nogi mana wai.^v Te nai mana dwasianu ge tedela yai, te nedu du me deli tiwai. Tama te nai pusu, te bisket hani mege dali gelama nigai tubo pusu tiwai yai.^w ³²Tama Mosesgo augwalibolo te po wai, “Genuai Bidigo te po wai, dago te tɔgo nigai dwasianu sene selama, te nai mana tede munama, te dago wɔɛ te wai dabe augwalide muao. Nosali augwaligo te Genuai Bidigo da te nai meni yai bulude mani nai sumainu, te agai da Isip tagalama odasa asai dao,” wali.

^v 16:23 Sai 20:8-11 ^w 16:31 Te Hibru pogo te nai nogi mana te tiwai page elalubao, “Te magi nai dawee?” ^w 16:31 Nam 11:7-8

³³Tama Mosesgo te po Aronbolo wai, “Te tōgo nigai sene me deli selama, tede te nai mana paḡaḡama, tama te sene te Genuai Bidigo gedude muao, tama te nosali ame nabo hani wai dabe augwaligo te sulama, konemainao.”^x

³⁴Tama Arongo te mana muani sene te bomo yai po munalubo halobage eda badu muani, te Genuai Bidigo Mosesbolo wali po gilama tama tiwai. ³⁵Tama Israel dabe augwaligo te nai mana te kibu be bidi sese side 40 tuai. Tama te kibu be bidi sese si silama, tama nosali augwali te bulu tō Kenan teba pedelama, tama augwali te tōde bidiyu, gi se yai.^y ³⁶(Tama te mana nai senede muani sogo, augwaligo sene gasa tobage tiwai si elalui. Te me sene deli te dwasianu usu tama, tama gasa te dwasianu sene nogo si usu yabo tiwai elalui. Tama Arongo te tobage dwasianu sene te nai mana paḡaḡama, te Genuai Bidigo gedude muani.)

Augwaligo wę masigide sai

(*Nam 20:1-13*)

17 ¹Tigidali Israel we bidigo te wa pai bulu Sen tagalai. Genuai Bidigo te po obaso da, teda augwaligo te bidali bulu me tagalama, tama gasa buluba pelama, bidigi pidu geai. Tama nosali augwali te bulu Refidim teba pedelama, tede te bidabo pesage nigai, tiali goli te bulude te tuabo wę menio. ²Tama tibaso, te we bidi augwaligo wado po Moses dali wai. Tama augwaligo te po wai, “Da wę mao. Da tuaibao.” Tama Mosesgo augwaligo po wei ponoyu, te po wai, “Magi baso dagego wado po ena dali obawe? Dagego homugo aga usu siyu, Genuai Bidigo bomu dagebolo ma ola momainogo ebawe?”

³Tiali goli, te we bidi augwali te wę nogonego mu isabo aḡ ebaso, tama augwaligo po hauwa Moses dali wai. Augwaligo te po wali, “Magi baso nago da Isipde selama, da odasa asai dawe? Nago homugo da dali, te dago wai dabe me, te dago kibu dabe me, da wę menia selama, tama da isimainogo ebawe?”

⁴Tama tibaso, Mosesgo gedu haluasa po bomonama Genuai Bidiba te tiwai wai, “Te we bidi augwaligo masigi saḡama, tama ena ela muainogo ebao. Tama eno magi se augwalibolo egowe?”

⁵Tama Genuai Bidigo Mosesbolo te po wai, “Te Israel tobolu bidi dabe meba selama, tama dage polasa peyu, te we bidi augwali nosali asomainao. Tama dage pabo sogo, te dono polobadu nago te wę Nailba elali, te dono me sela pao. ⁶Tama ena te moni genuai masigi me deli daide ugwadu te bulu du Horep, tede ena dolaluaibao. Tama nage paḡa aselama, te donogo te masigiba elama, tama wę te masigide pedelama, tama te we bidi dabego tumainao,” te po wai. (Te bulu du nogi Horep

te gasa nogi me elalubao, te Sainai bulu du dao.) Tama te Israel tobolu bidi dabe augwaligo Mosesgo te tiwai se ebadi, tama te masigide we pedelama asobo suai. ⁷Tama te bulu nogi augwaligo Masa wai, te nogi page “Usu sai,” tama me nogi Meriba, te nogi page “Wado po wai.” Magi basowe, Israel augwaligo wado eyu, tama augwaligo te po wai, “Genuai Bidi da dali bidibowe, ma meniwe?” Tama te dwai kolesagade augwaligo te Genuai Bidigo bomogo ebo se usu sai.^z

Israel dabe augwaligo Amalek dabe dali hwjai

⁸Tama nosali Amalek hani bidi dabe aselama, Israel dabe te Refidim bulude bidibadi hwjagasai. ⁹Tama Mosesgo bidi me deli Josuabolo po weyu, te po wai, “Nago dago bidi meba usu selama, tama do dagego te Amalek dabe dali hwji pao. Tiali goli, ena da, te dwasianu bulu du bagede dolaluyu, tama Godigo enabolo te sela bilao wali dono te eno nogogo tolaluaibao,” wali.

¹⁰Tama Josuago te bidi dabe meba selama, te Amalek hani bidi dabe dali hwji pali, te Mosesgo agabolo te po wali gilama tama tiwai. Tama Moses dali, te Aron, me te Hur, augwali sela te dwasianu bulu duba holai. ¹¹Tama Mosesgo nogo ugwaba sabo sogo, te Israel ami dabego te Amalek dabe aiyaba elaluai. Tiali goli, agai nogo aiyaba elalubo sogo, te Amalek dabego te Israel ami dabe aiyaba elaluyu yai. ¹²Tama nosali Mosesgo nogo dene eyu, boma pobaso, tama agai nogo ugwaba ma sabo usugobeo. Tama Aron de Hur sigo masigi me deli selama, toba munama, tama Moses te masigide dulaluai. Tama augwali si Moses pade u badu, me e badu dolaluyu, tama augwali sigo te Mosesgo nogo ugwaba selama, tolaluai. Augwali sigo tolalubadi, sia ge dega sigi pai. ¹³Tama Josua dali Israel dabe augwaligo te Amalek dabe augwali aiyaba elaluama, tama augwali mu dolai.

¹⁴Tama nosali Genuai Bidigo Mosesbolo te po wai, “Te po te buku me delide asenama, te we bidi augwaligo homude konealumainao. Te po e tiwai, ‘Genuai Bidi eno te Amalek dabe mu silaibao silama, tama te we bidi dabego homugo augwali munu me ma konegobeo.’ Tama nago te po Josuabolo me mao,” te po wali.^a

¹⁵Genuai Bidigo po wai digi, tama Mosesgo te Genuai Bidibolo nai ula maiabo alta sai me deli nigilama, tama te alta sai yali nogi e tiwai wai, “Genuai Bidi aga eno te nide walama, ugwaba sabo plak ugwa tiwai dao.” ¹⁶Tama Mosesgo te poali nogide te po wai, “Te ugwaba sagalobo plak ugwa tiwai eyu, tama eno ena nogo si ugwaba selama, tama Genuai Bidi aga bidibo digi teba gedu haluasa po te hwibode wai dao. Magi basowe, Genuai Bidi agai sesemane sogo te Amalek hani bidi dabe dali hwjaibao,” Mosesgo te po wai.

^z 17:7 Nam 20:2-13 ^a 17:14 Bom 25:17-19; 1 Sml 15:2-9

Jetro aselama, Moses suagasai

18 ¹Jetro aga te Midian dabego pris bidi, tama Mosesgo waji, aga we aga aya. Tama agai Godigo tigidali se Moses dali, me te Israel dabe dali me yali po odai. Tama me agai te Genuai Bidigo aga we bidi Israel dabe te Isipde bidibadi dabolama, odasa soainogo yali kolesaga, te po me odai. ²⁻³Tama Jetro aselama, Moses suagasai. Polobadu Mosesgo we Sipora te aga aya pageba ma osogo tagala palai. Tama megida, Jetrogo te Moses we Sipora dali, aga ogwa si badi, augwali odasa aselama, aga bidibo digi pedelai. Te wai sigo nogi e tiwai, Gersom, me Elieser. Polobadu Mosesgo te po wai dao, “Ena gasa badu bidi, tama ena gasa tede bidibao.” Tama agai gomunai ogwa nogi e tiwai nogi yai, Gersom dao. ^{b c} ⁴Tama nosali agai te po wai, “Eno ayago God agai ena tau selama, tama Isip tuni bidigo ena ela mubeo.” Tama tiyu, agai tomo ogwa nogi Elieser po wai. ^d

⁵Tama Jetro te Mosesgo we dali, te aga ogwa si me, augwali aselama, te masigi kemi bulu te Godigo bulu du paba sabolali, te Mosesgo pesage nigilama bidibo digi dao. ⁶Tama Jetrogo po Mosesbolo ola toloyu, te po wai, “Ena Jetro, te naga waji dali, te naga we me, te naga ogwa si me, da asobao.”

⁷Tama Mosesgo te po odama, tama agai Jetro tiaba tudu pai. Tama Mosesgo mage basi gulama, tama nosali agai aga sebedi usai. Tama augwa si bidabo po dabe olama, tama nosali augwali Mosesgo ugwa be tomoba pai. ⁸Tama Mosesgo Jetro dali te Genuai Bidigo Isip tuni bidi dali yali se po tigidali wali, me te Isip we bidi dabe dali me, te Israel dabe tau selama tiai. Tama agai Jetro dali me te dwai sogo te sege te tude augwaliba pedelali po wali, tama Genuai Bidigo augwali tau selama bugagia bidai.

⁹Tama Jetrogo te wiegi yai se Genuai Bidigo te Israel dabe augwali te Isip dabego nogode ma sainogo yali po odolama, tama aga wiegi yai homu mu yai. ¹⁰Tama agai te po wai, “Genuai Bidi Yawego nogi ugwaba sao. Agai dage te tuni bidigo nogode me, te Isip we bidi dabe augwaligo nogode me, te dage ma sai. Agai aga we bidi dage tau selama, tama dage te dwai kalabus se de bidali tagalai dao. ¹¹Tama megieno koneani, Genuai Bidigo te gasa god dabe tigidali aiyaba elaluali, magi basowe, te Isip dabe augwaligo hagoma homu eyu, tama augwaligo dwai se dagebolo yai baso, tama Genuai Bidi agai dage augwaligo nogode ma dobola sali.” Te po wai. ¹²Tama Jetrogo ofa yabo nai me deli sela asali,

^b 18:3 Te Hibru pogo te wai nogi Gersom wabo dogoni te “Gasa tede bidibo,” po wabo dogoni tiwai si pade dao. ^c 18:2-3 Sai 2:21-22; Tpi 7:29 ^d 18:4 Te Hibru pogo te wai nogi Elieser te page elalubao, te “Eno God aga ena tau sabo bidi dao.”

te siaba tigidali ulama, tama Godibolo mawai. Tama agai meba gasa ofa me te Godibolo yai. Tama Aron dali, te tigidali Israel genuai bidi dabe me aselama, tama Moses agawai dali te Godigo gedude nai tuai.

Augwaligo po dodolobo bidi meba sa muani

(Bom 1:9-18)

¹³Te nai tula silama, tama te sogo nosali Moses dualama, te Israel we bidi augwaligo po tu odai. Tama we bidi hauwa Moses bidibo digi kigamu aselama, tama bidada pidubadi, pio mu igi pai. ¹⁴Jetrogo Mosesgo te se dabe eyu, te we bidi dabe augwali tau sabo sulama, tama agai Mosesbolo te tiwai po wai, “Tegoba. Nago te we bidi tau sabo se hauwa mu ebao. Magi baso nagaduba deligo naga nago te po tu odobo se dabe ebo dawee? Suao, tigidali we bidi kigamu nage dali po wainogo asali, tama augwali dolayu, tonalubadi, be pio ebao. Magi baso nago tama tibawee?” wali.

¹⁵Tama Mosesgo agabolo te po wai, “Te we bidi dabe augwaligo te mena se te Godigo augwaligo emainogo ebo se te koneainogo tiwai. Tama tiyu, augwali ena bidibo digi asobo dao. ¹⁶Tama me sogo bidi me aga si magi nai me delide wado ebo sogo, te bidi si ena bidiboba aselama, tama eno augwali sigo po dagalama, tama te po isilaibao. Tama augwaligo wado ebo page tede eno augwalibolo te Godigo bomai po ola mabo dao,” wali.

¹⁷Tama Jetrogo agabolo te po wai, “Moses, nago te se ebo te wiegi yai tu wali pabeo. ¹⁸Te se genuai mu dao. Nagaduba deligo naga ebo usugobeo. Nago naga te se eyu da, teda nago tigi hagela mu eyu, tama te we bidi augwali me hagela yaibao. ¹⁹Eno po megii odao. Eno wiegi yai tu me deli te nago se yabo po nagebolo eno te po waibao. Nago te po odoyu da, te God nage dali bidaibao. Tama nage te we bidi augwaligo polalubo bidi te Godigo gedude te augwaligo hwiabo po weyu, wado po wabo dabe, te po nago agaba sela pabo bidi bidiyu da, teda usu yaibao. ²⁰Tama nago augwalibolo te Godigo bomai po tigidali ola mayu, tama augwaligo wali pabo tu me, te sesemane sogo te se yabo kolesaga, te po augwalibolo wao. ²¹Tiali goli, me nago te po page koneai bidi meba sa munama, tama augwaligo te we bidi tonaluabo bidi bidimainao. Tama mebago te we bidi bidi sese hauwa 1,000 mu tonaluyu, tama meba bidigo te bidi sese a naga 100 we bidi tonaluyu, tama mebago te 50 we bidi tonaluyu, tama mebago te nogo si we bidi naga tonalumainao. Nago te God dologode bidibo bidi dabe augwali sa munama, tama te tiwai bidi dago homu augwaliba daqu olama, tama meba bidi dabego dwai se yali te monego augwali abelainogo ebo usugobeo. ²²Tama te bidi dabe augwali te we bidigo po dodolobo bidi pedelemainao. Augwa digi te dwasianu po dabe te po tu de dodolomainao. Tiali goli, augwaligo genuai se yali po tu te nageba sela aselama, te nago te po dodolomainogo yaibao. Tama augwaligo nage

tau siyu, tama te seḡe ebo se toloyu, tama nago se dene kuna egobeo. ²³Te se dabe eno nagebolo yao olama po wali, te Godigo digi te se nago emainogo homu yai. Tama nago eno po wali peyu da, teda te seḡe nage tigi hagela iligobeo. Tama dagego te we bidigo yali se, me te we bidigo po dodolama, tama augwali homu dua nagame elama, tama augwa buluba ma pelawaibao,” Moses aga waḡo te po wai.

²⁴Tialima Mosesgo te wiegi yai po Jetrogo wabo po odolama, tama tiwai. ²⁵Tama agai te Israel dabe augwali tomode te po page koneai bidi dabe augwali sa munama, tama augwaligo te bidi sese hauwa 1,000 we bidi, me te we bidi 100, we te 50, we te 10 we bidi meba tama tonaluabo bidi nigilai. ²⁶Tama sesemane sogo augwaligo te po tu odobo se tonaluai. Augwa digi te dwasianu se yali seḡe dabe dodolali, tiali goli augwaligo genuai seḡe yai se yali te Moses pageba pelama, tama aga digi te seḡe dabe dodolai.

²⁷Te po dabe dodolobo se tama dodolama, tama nosali Mosesgo aga waḡi nogo menama, tama Jetro aga bulu to pedaiba ma pai.

Israel dabe augwali aselama, Sainai bulu duba bidagasai

19 ¹⁻²Te Israel dabe augwaligo te bulu Refidim tagalama, ma soali. Tama solama, tama augwaligo te bulu Isip taga soali sogo gagalama nedeyu, tama polua si mu silama, te polua sela wabo te dei delide, te sogo naga augwali te nai meni yai wa pai bulu Sainaiba sabolai. Tama augwali bidabo pesage te bulu du Sainai paḡe nigai. ³Tama Moses te bulu duba God dali po miainogo holai.

Tama Genuai Bidi bulu dude bidiyu, Moses i olama, agabolo te Israel dabe augwalibolo maiabo po meba wali, te hani dabe te Jekopgo waḡi dabe dao. ⁴Genuai Bidigo te po wai, “Dagego eno yali se te Isipde sui dao. Tama eno dage te ba kemodagego te aga gesi noma goḡu te bogo ugwadu daide sela soabo tiwai elama, tama dage eno e buluba odasa aselama, tama megi dage ena dali bidibao. ⁵Tama dagego megi eno bomai po daḡ olama, tama eno po mu wali peyu da, teda dage eno gasagi yai tedali we bidi hani pedelaibao. Tigidali to me, tigidali we bidi me, te eno naga, tiali goli eno dage sa munama, hagea siyu, tama dage ena we bidi mu bidaibao. ⁶Tama dage eno te pris se ebo tuni we bidi hani bidibo tiwai yaibao. Tama dage te eno tedali we bidi mu bidaibao.” Genuai Bidigo Mosesbolo te po te we bidi dabe augwalibolo mao wai.^f

⁷Tama Mosesgo te bulu du tagalama, tama pelama, te Israel dabe genuai bidi nigilali bage augwali sisinama, tama Genuai Bidigo agabolo te bulu dude wali po tigidali augwalibolo wai. ⁸Tama tigidali we bidigo te po wai, “Dago te se dabe tigidali te Genuai Bidigo po wali gilama te se yaibao.” Tama Mosesgo te we bidigo po te Genuai Bidibolo wagi pai.

^e 19:5 Bom 4:20; 7:6; 14:2; 26:18; Tai 2:14 ^f 19:6 Ped 1:6; 5:10; 1 Pi 2:9

⁹Tama Genuai Bidigo Mosesbolo te po wai, “Odao, te genuai husugu yai p̄de bidilama, tama ena nageba asiyu, tama te we bidi augwaligo te eno nage dali po mibo odolama, tama sesemane sogo augwaligo nago poba homu d̄aḡ omainao.” Tama Mosesgo Genuai Bidibolo te we bidi augwaligo wali po wai.

¹⁰Tama Genuai Bidigo Mosesbolo te po wai, “Nago te we bidi augwalibolo te po wagi pelama, megi de do si te augwaligo homu kolesaga me dodolama, tama ugwa w̄e tedelama, tama augwaligo enaba lotu po wainogo sisilalua. ¹¹Augwaligo do digi sisi yao. Te duba sogo ena dulama, tama ena te Sainai bulu dude bidibadi, tama te we bidi augwaligo ena sumainogo yaibao. ¹²Nago d̄aḡ mubogo te bulu du bagulama, tama te we bidi augwali te d̄aḡ tomoba pigimio. Tama augwalibolo te po olama, tama augwali bugagia dua bidiyu, tama augwaligo te d̄aḡ bolama, tomoba pelama, te bulu duba hologio. Tama augwali te bulu du p̄ba pigio. Tama niwai bidi me deligo te d̄aḡ bolobaso da, augwaligo aga ela muao. ¹³Tialima, augwaligo aga elebo sogo augwaligo nogogo aga eligio. Te augwaligo masigi s̄anama eliyu, me te enigo aga enao. Te bidigo, me ma te kibugo te d̄aḡ bolobaso da, teda dagego aga te kolesaga elama elao. Te dage deli sogo te bulu duba holabo sogo elalubao. Tama te sogo dagego te bu wabo nai nogi biugel te bu wai da obaso da, teda dage p̄aḡ,” Genuai Bidigo te po wali.^g

¹⁴Tama Mosesgo te bulu du tagalama, dulama, tama te we bidi augwalibolo te lotu po wabo sisi iȳaḡ te po wai. Tama augwaligo agai po wali pelama, augwa ugwa dabe w̄e telawai. ¹⁵Tama Mosesgo augwalibolo te po wali, “Dagego do digi sisi ela muao. Tama megi e side gagalama, do tama te sogo dage we dabe dali me pilamo dao,” wali.

¹⁶Tama bidama, te sela sogo wabo side kigamu, te genuai p̄ḡ te bulu dude pedelali, tama te p̄ḡ kulukulu olama, tama be sele ula pepeda pelama, tama bu wabo nai biugel gela genuai mu wai. Tama te bulu du sesegede pesage nigali we bidi dabe tigidali wi mu elama, tama augwali tigi didibili yai.^h ¹⁷Tama Mosesgo augwali odasa te be mesalo buluba pelama, tama augwali te bulu du sesegede God dali deliba sisinai hagede dolalugi pai. ¹⁸Tama Genuai Bidi te sia tomode bidilama dulali, tama te Sainai bulu duba bidagasali, tama genuai hanogo te bulu du tigidali mu mesega sai. Tama ugwaba holali hano te genuai sia mu dabo hano holobo tiwai mu yai, tama t̄ḡ mali genuai mu te bulu dude pedelai.ⁱ ¹⁹Tama te bu wabo nai biugel gela wabo genuai eyu, tama genuai mu pedelai. Tama Mosesgo po Godibolo olama, tama Godigo pedauwalidu agai po wei ponobo odainogo yai.

²⁰Tama Genuai Bidi dulama, te Sainai bulu du bagede bidiyu, tama agai Moses te bulu duba ugwa holomainogo aga i wai. Tama Moses te

^g 19:13 Hib 12:18-20 ^h 19:16 Ped 4:5 ⁱ 19:18 Bom 4:11-12

bulu duba ugwa holai. ²¹Tama Genuai Bidigo te po agabolo wai, “Nage aiyaba dulama, tama te bomoi yai po tigidali we bidibolo magi pao, tama augwaligo te daji bolama, tama ena me suagasigio. Augwaligo te daji boloyu da, teda we bidi hauwa isaibao. ²²Te pris dabe augwali ena paba asobo bage, augwali me te augwaligo homu kolesaga dwai meda elalubo dabe geselama, tama augwali eno gedude wiegi yai pedelao. Ma, te kolesaga isayu da, teda eno augwali dene ilaibao,” wali.

²³Tama Mosesgo te po Genuai Bidibolo wai, “Te we bidi dabe augwali edaba me hologobeo, magi basowe, naga digi nago bomai po dabolo mawai. Tama da te bulu du sesegele bobegelama, tama daji muai, tama dago te bulu du habu selebao,” te po wai.

²⁴Tama tialima, Genuai Bidigo agabolo te po wai, “Te usu da, nage aba dulama, tama Aron aga selama, tama nage dali edaba holao. Tiali goli, te pris dabe, me te we bidi dali, augwaligo te daji muani bolama, ena paba me edaba holamo da po wao. Ma, augwaligo te daji boloyu da, teda augwali eno dene ilaibao,” wali.

²⁵Tama Mosesgo te po wabo odama, tama aga te we bidi dabe bidibo digi dulama, tama Genuai Bidigo agabolo mani po tigidali augwalibolo pusai.

Godigo bomoi yai habu po nogo si

(Bom 5:1-21)

20 ¹Godigo te po wai, ²“Ena digi ena Genuai Bidi Yawe, ena dagego God dao. Eno dage Isipde sali, te bulude kalabus se ebadi, tama eno dage selama, odasa asai.”

³“Nago ena deli naga wali asao. Nago te tibo god me wali pelamo dao.”

⁴“Nago tibo god me nigigio, tama nago te dagalude me, te tode me, ma te we tomode elalubo naigo me, te to dologode elalubo naigo te gasa nai piksa noma me deli munu me nigilamo dao. ⁵Nago te tibo godiba, me te noma bidiba kidu sugunama, lotu me wagimio, magi basowe, ena Genuai Bidi Yawe te ena nago God, tama ena te tibo godigo hasegelemainogo ebo usu me egobeo. Mu menio. Tede eno hagela homu mu ebo dao. Tama ena hagela mu homu ebo we bidi dabe, augwaligo te naide magi se yai elalubaso, te eno augwali dene iliyu, tama augwaligo wai hani sela, me me si me si nosali pedelabo hani, augwalibolo me te mabo dene tiwai ilaibao.^j ⁶Tiali goli, ena godolo homu elama, tama eno bomoi po tigidali wali pabo we bidi bidibaso, teda eno augwali me godolo eyu, te augwaligo wai dabe hauwa 1,000 mu nosali pedalobo hani me, te eno augwali dali wiegi yai homu eyu, augwali eno godolo mu yaibao, tama te kolesaga ebo siligobeo.”^k

^j 20:5 Sai 34:17; Prs 19:4; 26:1; Bom 4:15-18; 27:15 ^k 20:6 Sai 34:6-7; Nam 14:18; Bom 7:9-10

7“Nago eno nogi God dwai odolali nogi egio, te nago Genuai Bidi dao. Magi baso meni, ena nogi olo nogi ebo we bidi te eno augwali dene ilaibao.”^l

8“Nago te Sabat side bugagia homugo koneama, te eno bodolu muani side dao. Te side te gasagi yai tedali elalumainao.”^m 9Nago te Sarere deli tomode te se ebo side te nogo a naga olama me badu nogo kibisa deli, te tama sogo se ebo si elalubao. ¹⁰Tialima, te a naga olama me badu nogo si wali, te me deli sogo te nago Genuai Bidi, God eno side dao. Te olo bidibo Sabat side nago se me igio, tama nago ogwa dabe me, wegi dabe me, se ebo we bidi dabe me, te nago se ebo kibu dabe me, te nage dali bidibo gasa bulu to bidi dabe me, dage tigidaligo te side se me igimio.”ⁿ ¹¹Nago te tama tiao, te magi baso meni, te a naga olama me badu nogo kibisa deli sogo naga Genuai Bidi eno te to dagalu, me te tamu ai, me te tigidali elalubo nai nigai. Tiali goli, te a naga olama me badu nogo si wali, te me deli sogo eno olo bidiyu, toma tuai dao. Tama tibaso, Genuai Bidi eno te Sabat side te gasagi yai side te me tedali mu ilai. Tama te side te eno bodolu dolo mu dao.”^o

¹²“Nago naga aya ida dologode bidama, tama augwaligo po wali pao. Nago tama tiyu da, te nage polo me isigobeo. Menio, te nage hauwa sogo te tode bidimainogo te God eno nago Genuai Bidi eno nage mawainogo homu ebo tode bidagameo.”^p

¹³“Nago we bidi ela mugio.”^q

¹⁴“Nago bidigo sai we dali, me ma te we sai bidi dali, me dwai se me igio.”^r

¹⁵“Nago nai wi sigio.”^s

¹⁶“Nago tibo po olama, tama gasa we bidi olo po to ela magio.”^t

¹⁷“Nago gasa bidigo be sulama, pesa eyu, godolo igio. Tama nago gasa bidigo we dali gedu igio. Tama aga se ebo bidi, me te se ebo we, me te bulmakau, me bidi duabo donki, me te agai tigidali gasa nai dabe me, te nago godolo eyu, sabo homu me igio.”^u

Te we bidi augwali Godide wi yai

(Bom 5:22-23)

¹⁸Te we bidi augwaligo te po kulukulu wabo, me te bu wabo nai biugel gela wabo me odai. Tama augwaligo te be sele te po ula ebo ugwaba

^l 20:7 Prs 19:12 ^m 20:8 Sai 16:23-30; 31:12-14 ⁿ 20:10 Sai 23:12; 31:15; 34:21; 35:2; Prs 23:3 ^o 20:11 Gag 2:1-3; Sai 31:17 ^p 20:12 [Bom 27:16; Mat 15:4; 19:19; Mk 7:10; 10:19; Lu 18:20; Ef 6:2, 3] ^q 20:13 [Gag 9:6; Prs 24:17; Mat 5:21; 19:18; Mk 10:19; Lu 18:20; Ro 13:9; Je 2:11] ^r 20:14 [Prs 20:10; Mat 5:27; 19:18; Mk 10:19; Lu 18:20; Ro 13:9; Je 2:11] ^s 20:15 [Prs 20:10; Mat 5:27; 19:18; Mk 10:19; Lu 18:20; Ro 13:9; Je 2:11] [Prs 19:11; Mat 19:18; Mk 10:19; Lu 18:20; Ro 13:9] ^t 20:16 [Sai 23:1; Mat 19:18; Mk 10:19; Lu 18:20] ^u 20:17 Rom 7:7; 13:9

peyu, eda asiyu eyu, tama genuai hano te bulu dude pedalobo sulama, tama augwali wi mu yai. Tama augwali kilasa ma pelama, te bulu du digibulu gana dolalugi pai. ¹⁹Tama augwaligo Mosesbolo te po wai, “Nago digi te po dabolo wabo, te dago te po odaibao. Tiyu Godigo po dabolo wabo si, te da isidalio,” wali.”

²⁰Tama Mosesgo augwalibolo te po wai, “Dage wibo, tagalao. Godigo dage usu naga sagasiyu asali, te dage aga dologoba pelama bidiyu, tama dagego dwai sę ma idali weyu, tiwai sę yai.”

²¹Tiali goli, te we bidi dabe augwali digibulu digi dolalubadi, Moses agaduba deli naga te genuai husugu yai pę pęba, te God bidibo digi pai.

Alta nigibo bomai po dabe wai

²²Tama Genuai Bidigo po Mosesbolo olama, tama agai te Israel dabe augwalibolo te po omainogo yai. Tama Genuai Bidigo te po wai, “Dagego koneani te tiwai, te ena dagalude bidiyu, te eno po dage dali miai dao.

²³Odiąo, dagego te tibo god dabe te gol me silvago nigilama, tama te nai dabeba lotu po me wagio. Dagego ena delibolo naga lotu po wao. ²⁴Tama dagego tę meba selama, tama eno alta nigao. Tama te altade dagego te sipsip dabe me, bulmakau me, te tigidali siaba ulama, siago dabo te ofa dali, te we bidi augwaligo ena dali dedeli homu yabo te ofa me yao. Tama dagego te tigidali bulude te dagego enabolo lotu omainogo, eno te sa mubo bulude dagego tama tibaso da, te ena aselama, dage bugagia wiegi yai mu ilaibao. ²⁵Dagego masigigo te alta me deli nigiyu da, teda dagego te bidigo togwali masigi sigio. Magi baso meni, dagego te sę yai ain tulgo te masigi togoyu da, tama te tiwai masigigo eno sę ebo te dolo egobeo.”

²⁶Tama dagego te ugwadu daide te alta nigigio, te dagego ofa yainogo ugwaba holabo togobili nigigio. Tiyu yaide, dage te togobilidu ugwaba holobadi, tama augwaligo dagego hale hanialubo suidalio,” te po wai.

Te olo sę ebo bidi tonaluyu negebo kolesaga po

(Bom 15:12-18)

21 ¹Tama Genuai Bidigo po me wadolama weyu, te po wai, “Nago te po tų dodolabo bomai po te Israel we bidi augwalibolo mao.

²Bidi me deligo te olo sę yabo bidi me deli te duga Israel hanide me abelebaso da, teda agai te bidigo sę te kibu be 6 kibu bede te sę yaibao. Tama te kibu be 7 wabo, te kibu be delide te aga pomainogo tagala palao. Tama hasia agai mone meba mobaso, te sigio. Mu menio. Aga olo mu pomainao. ³Tama aga te we sisąbadi te sę ebo bidi pedelai baso da, teda agaduba deli naga pomainao. Tiali goli, hasia aga we bolo selama asai yai baso da, teda agai te sę ebo taga pabo sogo, te aga we dali sela pomainao.

⁴Tama te bidi aga dali se yali bidigo we menama, tama te wego wai dabe ame nai baso da, tama te we me, te wai dabe dali, augwali te aga se yali bidi dali bidaibao. Tama bidi naga aga te se yali tagalaibao. ⁵⁻⁶Tiali goli, te se bidigo te po weyu, 'Eno ena genuai bidi godolo mu yali, tama ena we me wai dabe godolo elama, tama eno augwali taga pabo hagela homu ebao,' te po obaso da, teda aga genuai bidigo aga te po tu dodolabo beba selasa pao. Tama te se ebo bidi te be tuđe elalubo pos nide dolalubadi, tama aga genuai bidigo te nel selama, te se bidigo olo podolama, dedage nigilao. Tama aga te genuai bidigo se olo ebo bidi bidada pelama, tama aga isiyu, te se tagalaibao."^x

⁷"Tama bidi me deligo masigi dabe sabo homu eyu, tama aga wegi muyu, Israel hani gasa bidigo te wegi abelebaso da, tama te kibu be 7 wabo kibu bede te genuai bidigo te we tagala palagio, tama agai te se bidi dali hasia yali tiwai kolesaga naga yai. ⁸Tama te bidigo te we te olo se yabo we tiwai abelebaso da, tama hasia agai homugo te we sainogo yai, tiali goli nosali agai te we sabo homu isayu da, teda te we aga ayago ma abelama, somainao. Te bidigo te we dali te doloba pai kolesaga ebe, tama agai te we te gasa bulu bidigo abelemainogo elamo dao. ⁹Tama agai te we aga ogwabolo mawainogo homu eyu da, teda agai wiegi yai se aga dali ilama, te aga wegi dali ebo kolesaga tiwai gilama te we dali me tama tiao. ¹⁰Tama te genuai bidigo gasa we siyu da, teda agai te hasia sali te olo se ebo we te bugagia tonalua. Agai te we nai mayu, te ugwa me mayu elama, tama aga te we dali piyu, te agai polobadu yali tiwai gilama yao. ¹¹Tama agai te tobage se sela te we dali isayu da, teda agai te we pomainogo tagala palama, tama te wego agabolo te mone meba magio," wali.

Hwibode dodolobo bomai po dabe

¹²"Bidi me deligo gasa bidi bomonama elai digi, tama te bidi isai baso da, teda dagego te bidi elali te bidi aga me ela muao.^y ¹³Tiali goli, agai homugo te bidi mu ela muabo homu isayu da, tiali goli agai geda muyu naga te bidi elama, nosali aga isimainogo yai, tama te bidi elali bidi aga wi pomainao, te bidigi wi pabo buluba, te eno dagebolo sa muaibao, tama tede aga bugagia bidaibao.^z ¹⁴Tiali goli, bidi me deli agai gasa bidi dali sebe eyu, aga ela muabo homu ebaso da, tama nosali agai tama tiyu da, teda dagego aga digi ela muao. Te aga eno nai ulubo alta teba aselama, bugagia bidabo homu ebo tagaliyu, te dagego aga selasa pelama, aga ela muao."

¹⁵"Mena bidigo aga aya, ma aga ida si elebaso da, teda dagego te bidi aga ela muao."

^x 21:5-6 Prs 25:39-46 ^y 21:12 Prs 24:17 ^z 21:13 Nam 35:10-34; Bom 19:1-13; Jos 20:1-9

16 “Tama bidi me deligo aga abagi me deli wi selama, tama aga se ebo bidi bidimainogo yai, ma agai gasa bidigo te bidi abelearninogo eyu da, teda dagego te tiwai kolesaga ebo bidi ma suyu, daŋ olama eyu, tama aga ela muao.”^a

17 “Niwai bidigo aga aya de ida si dali wado po weyu, dwai dolabo bomaj po wabo bidi, teda te bidi aga dagego ela muao.”^b

18-19 “Bidi me aga si wado po olama, tama bidi me deligo nogo sugunama, tama gasa bidi me elali, me ma masigi selama elali, tiali goli agai te bidi aga mu ela musiayu da, teda dagego te bidigo yali dwai se wei ponogio. Tama elama, tigi dolai bidi aga te betide pila munama, tama nosali aga dono tulama, be bulu badu bilibaso, teda te elali bidigo te mone wei agabolo mao. Te monego agai se te tigidali sogo isawani te usu nao. Tama te bidi elali bidi aga te bidi bugagia tonaluama tama, tama aga tigi usu ma ebo si te usu dao.”

20 “Tama bidi me deligo wabi selama, tama aga se ebo bidi me, te aga se ebo we me elama, tama aga te elali sogo dolo isibaso da, teda dagego te genuai bidi agabolo te dene mu ilao. 21 Tialima, te bidi ma te we te deli sogo, me ma si sogo bidilama, tama nosali aga isibaso da, teda dagego te aga genuai bidibolo dene iligio. Magi basowe, se ebo bidi, ma te se ebo we, te bidigo digi te aga se dao, te abelai mone te olo hagawai baso, te aga sege dao.”

22 “Tama bidi meba wabi hwiyu, tama bidi me deligo te wai tabi elalubo we elali, tama te wai dolama, te wego te wai polo ame nani, tiali goli te wai ame nani ida te dolisiabaso da, teda te we elali bidigo te we page bidigo wabo po odama, tama agai te dwai se yali dodoluyu wei begelama, te mone mao. Tiali goli, po tu ebode te mone sabo po usu da po weyu bolo elama, tama nosali te we aga bidigo te mone sao. 23 Tiali goli, we ma aga wai tigi dolai baso da, teda dagego te bidibolo me te tiwai kolesaga naga wei ponao. Ma, te we isai yai baso da, teda dagego te we elali bidi aga ela muao. 24 Tama te gedu, me ma te kele, me te nogo saŋa dolai baso da, teda te tiwai kolesaga naga te aga dali wei ponao.^c 25 Tama me ma, agai te we siago, me ma te we tigi dolama, te keni me te keloago elai baso da, teda dagego te bidibolo te tiwai se naga yao.”

26 “Tama bidi me deligo aga se ebo bidi ma te aga se ebo we te geduba elama, tama te gedu dolobaso da, teda aga te bidigo se bidi ma, te se ebo we ma, te se de bidigio. Te bidigo te genuai bidi taga pao, te aga gedu dolali dali wei si ponao. 27 Tama agai te se ebo bidi me te se ebo we me te elali digi, tama aga kele degebaso da, teda agai te se ebo aga tagalao, te aga kele degali dali wei si yao.”

^a 21:16 Bom 24:7 ^b 21:17 Prs 20:9; Mat 15:4; Mak 7:10 ^c 21:24 Prs 24:19-20; Bom 19:21; Mat 5:38

Bulmakaugo ebo kolesaga dodolabo po wai

²⁸“Tama bulmakaugo te bidi me deli, ma te we me, te agai gaugo ela mubaso da, teda te bulmakau dagego ela muao. Tiali goli, dagego te bulmakaugo mi tugio. Tama dagego te bulmakau aga aya po tu ela magio. ²⁹Tiali goli, te bulmakaugo te we bidi augwali te gaugo eniyu ebaso, tama te we bidi augwaligo po bomonama te bulmakau page bidi dali wali digi, tama te bulmakau page bidigo te obo isabaso da, teda dagego te tiwai kolesaga yao. Tama te bulmakaugo bidi me deli, ma te we me, ela mubaso da, teda dagego te bulmakau ela muyu, tama te bulmakau page bidi me ela muao. ³⁰Tiali goli, po tu ebode te po obaso da, agai te isali bidi ma te we te aga hanibolo te bulmakaugo dwai se yali me te aga dali te si ma abelama, tama te mone aga hanibolo mao. Tama tibo si, te aga isigobeo. Agai aga digi bidibo ula ma abelemainao. ³¹Tama te bulmakaugo te wai puluba, te ogwa me, te wegi me, elebaso da, teda te tiwai bomo yai po naga dagego wali pia. ³²Tama te bulmakaugo te se ebo bidi ma te se ebo we elebaso da, teda te kibu page bidigo te monego K300, te se bidi ma te se we te aga genuai bidibolo te mone menama, tama dagego masigi sanama te bulmakau ela muao.”

³³“Tama bidi me deligo te to dedage haluali nai sela sawani, ma agai genuai to dedage nigilama halusiqwai, tama bulmakau me deli, ma te bidi duabo donki, te dedageba tulaluama isibaso da, ³⁴teda te to dedage nigali bidigo te kibu page bidi abelao. Tama te isali kibu aga somainao.”

³⁵“Tama bidi me deligo bulmakaugo te gasa bidigo bulmakau ela mubaso da, teda te bidi si me bidigo te bidibo bulmakau te gasa bidigo abelemainogo elama, tama te bidi augwa si te mone selama, tama te isali bulmakau mi, te augwa si dobola sao. ³⁶Tiali goli, te bulmakaugo hwibo bulmakau yai baso, te kibu page bidigo obo bugagia isawai yai baso da, teda agai gasa bulmakau te isali bulmakau page bidibolo wei ponao. Tiali goli, agai te isali bulmakau te bidi aga somainao,” wali.

Dwai kolesaga yali dodolabo bomai po dabe

22 ¹Tama Genuai Bidigo po dage wadolama weyu, te po wai, “Tama bidi me deligo te bulmakau, me ma te sipsip me te wi selama ela muyu, me ma agai te gasa bidigo abelemainogo yai baso da, teda dagego te kibu page bidibolo te nai wi sali bidi agai te bulmakau a naga sobadi, te sipsip me si me si sobadi elama, wei ponomainao. ²⁻⁴Tama agai dolo ponomainao. Tiali goli, agai wei ponabo bulmakau me sipsip te meni baso da, te aga dagego te olo se ebo bidi tiwai te gasa bidigo abelemainogo elama, tama te mone dagego selama, agai te wi sali kibu wei ponao. Tama agai te wi sali bulmakau, me sipsip, ma te bidi duabo donki, te nai dabe te agade elalubaso da, teda agai te nai si te aga te dwai se yali wei ponao.”

“Tama nai wi sabo bidi me deligo be hulide te be daga aluama, tama gasa bidigo aga daꝓ olama, tama aga ela mubaso da, teda te nai wi sali bidi ela muani bidi aga te seꝓe menio. Tiali goli, agai aga te siade ela muyu da, te agai bidi ela mubo seꝓe elalubao.”

⁵“Tama bidi me deligo aga bulmakau dabe tedela pelama, tama aga tꝓde, ma te aga wain bono du gide nai tumainogo yai, tama augwaligo agai daꝓ bolama, tama gasa bidigo giba nai tugi pai yai baso da, teda te bulmakau page bidigo te aga gide wiegi yai nai me, te wain bono du me, te gi page bidibolo wei ponao.”

⁶“Tama bidigo aga tꝓde te kala siago ulai digi, tama te sia genuai pedelama, tama te daꝓ bolama, gasa bidigo gide elalubo te tubo nai wit, me ma te wit augwaligo togolama tama pesage holai elalui, tama te siago dobaso da, teda te sia ulali bidigo te siago dali nai tigidali wei ponao.”

⁷“Tama bidi me deligo aga doado bage meba, ma aga mone dabe te aga abagibolo menama, tama agai bugagia munalumainogo homu yai. Tama nai wi sabo bidi me deli asiyu, te nai dabe wi sai, tama nosali augwaligo aga gegelama subaso da, te nai wi sali bidigo te nai si si naga tigidali te mone sali wei ponao. ⁸Tiali goli, augwaligo te nai wi sali bidi gegabo usu isaꝓaso da, teda te nai tonaluali bidi dagego selama, te eno geduba te po tꝓ dodolobo bidi dabe bidibo digi pao. Tama agai te po weyu, ‘Mu tama, eno te nai wi me sabeo,’ te po wao. ⁹Tama tigidali sogo bidigo po aga abagi dali te nai bulmakau, me te bidi duabo donki, me ma te sipsip, me te ugwa dabe, me gasa nai dabe hagawali po elalui, tama te bidi augwali sigo te po weyu, ‘Te nai ena naga da,’ obaso da, teda te bidi si eno geduba te po tꝓ dodolobo bidi dabe bidibo digi selasa pao. Tama te tibo po wabo bidi te eno aga sa mubaso da, teda te bidigo te nai si si naga te aga abagibolo wei ponaibao.”

¹⁰“Tama bidi me deligo te bidi duabo donki, me te bulmakau, me ma te sipsip, ma gasa kibu dabe meba te aga abagibolo menama, tama agai tolalumainogo yai, tama te kibu dabe me dolo baso, me ma isiyu, me ma boi bidigo hwiyu selasa peyu da, tama bidigo te nai me susiaꝓu da, ¹¹teda te bidi augwali si te po tꝓ dodolobo digi pelama, tama Genuai Bidi eno gedude te abagigo te po wao, ‘Mu tama, eno agai nai doliyu, ma te kibu me te eno wi me sabeo.’ Tama kibu page bidigo agai te po wabo usu da weyu, tama te abagigo agai te hagawali kibu dabe wei ponogobeo. ¹²Tiali goli, meba bidigo te abagigo tolalubo nai kibu dabe wi sobaso da, teda te kibu page bidibolo te abagigo te monego wei ponao. ¹³Tama te uni hasago elai baso da, teda te abagigo te kibu elama tuali, te me badu dage te aga abagibolo waselainogo sela pao. Tama agai te uni hasago elali bulmakau wei te monego ponogobeo.”

¹⁴“Tama bidi me deligo aga abagigo te seꝓ yabo bulmakau me deli osogo abelama, seꝓ emainogo yai, tama te bulmakau page bidi te sogo

tede bidisiq̄badi, tama te bulmakau doliyu, ma isiyu me ebaso da, teda te abagigo te kibu page bidi abelao. ¹⁵Tiali goli, te bulmakau page bidi aga te abagi dali bidibadi, tama te bulmakau dolobaso da, teda abagigo te abelegio. Tama abagi agai hasia nagebolo mone menama, tama te bulmakau s̄y yainogo sai digi, tama te bulmakau dolobaso da, teda agai abelegio, magi basowe, agai te hasia mani mone te usu dao,” wali.

Te bomo yai po meba

¹⁶“Tama bidi me deligo te gesi wegi te bidibolo noma po wasiq̄wai wegi, tama te bidi dali pis̄q̄badi, tama bidigo te wegi nogo tubaso da, teda agai te we abeleyu, aga ayabolo mone menama, tama agai te we sao. ¹⁷Tama te we aga ayago te bidigo te we sabo hagela homu ebaso da, te usu dao. Tiali goli, agai te we aga aya te augwaligo bidi dali pis̄q̄wai we abelebo mone usugo abelao.”^d

¹⁸“Dagego te pobi nigibo we dabe ela muao.”^e

¹⁹“Dagego te bulmakau so kibu t̄q̄bo bidi ela mubadi, tama omai kibugo te we aga t̄q̄mainogo ebo te we ela muao.”^f

²⁰“Tama te we bidi augwaligo ena Genuai Bidiba naga ofa yao. Tama me deligo te tibo godiba ofa ebaso da, te dagego aga ela muao.”^g

²¹“Dagego te gasa bulu t̄q̄ bidi aselama, dage dali bidibo bidi aga dali haniani dwai kolesaga eyu, ma te s̄q̄q̄ agaba mugimio. Magi basowe, polobadu dage te aga tiwai te Isip t̄q̄de bidai dao.”

²²“Dagego te aga bidi isai we dali te dwai kolesaga eyu, ma te wai puluba, augwa aya ida isai tiana wai dabe dali me te kolesaga igio.”^h

²³Tama dagego augwali dolobaso, tama eno augwali tau somainogo tama augwaligo gela enabolo obaso da, te eno augwaligo gela wabo mu odaibao. ²⁴Tama eno s̄q̄b̄ eyu, tama te boi bidi dabego dage dali hw̄imainogo ilama, tama dage elemainogo yaibao. Tama dagego we dabe te bidi meni eyu, tama te dagego wai dabe augwaligo aya meni yaibao.”

²⁵“Tama eno we bidi augwali mone mu menia sobaso, tama augwaligo dage dali negeli sobaso da, teda dagego te mone sabo bisnis s̄y ebo bidigo negeli mabo tiwai igio. Tama augwaligo te negeli sali wei ponobo sogo, te dagego gasa mone dali daganama, sigio. Mu menio.”ⁱ ²⁶Tama dage dali te negeli sabo bidigo agai te negeli sali wei begelainogo te agai holobo ugwa te sa mubo tiwai eyu, dagebolo mubaso da, teda dagego te sia ge dega sis̄q̄badi, te sogo naga te ugwa agabolo ma mao. ²⁷Magi basowe, agai te ugwa deli naga elalualu, te aga hulide kedau idali weyu, tigi bea sabo ugwa dao. Te ugwa nago tolalubaso da, te aga tigi magi naigo halua

^d 22:17 Bom 22:28-29 ^e 22:18 Bom 18:10-11 ^f 22:19 Prs 18:23; 20:15-16;

Bom 27:21 ^g 22:20 Bom 17:2-7 ^h 22:22 Sai 23:9; Prs 19:33-34; Bom 24:17-18; 27:19

ⁱ 22:25 Prs 25:35-38; Bom 15:7-11; 23:19-20

selama pigowe? Te eno aga tau somainogo, agai gedu haluasa po enabolo obaso da, te eno agai gedu haluasa po wabo odaibao, magi basowe, eno tigidali we bidi olo tau sabo homu kolesaga mabo dao.”^j

²⁸“Tama dagego dwai po God enabolo me wasiama, tama dagego te dwai po te we bidi augwaligo tobolu bidibolo dagego te Godigo aga dolomainogo, te dwai po me wagio.”^k

²⁹“Tama hasia dagego te gide pedalobo te wit, me bono du wain, me tubo wel, me te oliv ni du dabe me, te selama, enabolo te ofa tiwai mabo te hagela igio.”

“Tama dagego gomunai wai te ogwa te dagego enabolo mao. ³⁰Tama dagego te bulmakau de sipsip sigo gomunai wai te enabolo ofa yao. Tama te bulmakaugo wai, me te sipsipgo wai ame nenama, te nogo a naga olama me badu si sogo te aga ida dali hasia bidimainogo elama, tama te nogo a naga olama me badu sela wali, te me deli sogode dagego te kibu wai elama, enabolo ofa ilao.”

³¹“Dage te eno tedali gasagi yai we bidi hani dao, tama tibaso, dagego te uni hasa dabe augwaligo te bulude ela muai kibu te nai mi dagego me tugio. Dagego te nai te yowi dabego naga tumainogo mao,” te po wai.^l

Augwaligo doloba pai kolesaga yao

23 ¹Tama Mosesgo Genuai Bidigo po pusuyu, te tiwai po wai, “Tama dagego te magi nai po me deli pedelali te po odoyu, tama te mu po meni homu eyu da, teda dagego te se yali po subigila ola biligio. Tama bidigo te dwai kolesaga ebaso da, teda dagego aga tau siyu, te po tu ebode tibo po wagio.”^m ²Tama bidi hauwa augwaligo te dwai kolesaga ebaso da, teda augwaligo te ebo kolesaga wali pigio. Ma, augwaligo te po tu ebode augwaligo tibo po weyu, te po tu dodolobo se dolyu eyu da, teda augwali dali deli homu eyu, augwaligo te ebo kolesaga me wali pigimio. ³Tama bidi mebago te magi nai meni yai bidi po tu ela mainogo, tama augwaligo dage te se ebo suali tiwai po omainogo dage i obaso da, dagego te magi nai meni yai bidi tau siyu, te po mesegelama tibo po wagio.”ⁿ

⁴“Tama dagego duga boi bidigo te bidi dualasa pabo donki, ma bulmakau te obo tagalama wi pai yai subaso da, teda dagego selama, te bidi agabolo ma magibao. ⁵Tama dagego boi bidigo te donki, ma te bulmakau te walu dali tula muai elalubaso da, dagego te boi bidi tau selama, aga ma hodolao. Dagego aga te tode pila mumainogo tagaligio.”^o

⁶“Tama te magi nai meni yai bidigo magi nai me delide po tu yagasobaso da, dagego agai po tu ebo mesegelama, aiyaba elalugio.

^j 22:27 Bom 24:10-13 ^k 22:28 Tpi 23:5 ^l 22:31 Prs 17:15 ^m 23:1 Sai 20:16; Prs 19:11-12; Bom 5:20 ⁿ 23:3 Prs 19:15 ^o 23:5 Bom 22:1-4

7Dagego gasa bidi tibo pode po tų ela magio. Tama doloba pai bidi agai dwai kolesaga me isabadi, tama augwaligo aga po tų olo mu ilibaso da, teda dagego aga ela mugio. Magi basowe, te tiwai dwai kolesaga ebo bidi eno aga po tų ilama, tama aga hagawaibao.”

8“Tama bidigo dage homu bega siyu, te po tų ebode tibo po omainogo te mone mobaso da, dagego te mone sigio. Magi basowe, te tiwai kolesagago te wiegi yai bidigo homu te tibo po wabo bidi tiwai pedelama, tama te dwai kolesaga isawai bidigo po tų ebo aiyaba mesegelaibao.”^p

9“Dagego bulude bidibo gasa bulu bidi dali dagego dwai kolesaga me igio, magi basowe, polobadu dage te Isipde bidibadi, te aga tų mude bidisabo we bidi ebo kolesaga te dagego bugagia koneai dao.”^q

Kibu be a naga olama, nogo me badu si tama me olo bidibo side

10“Dagego gide nai bulama tuyu, tama te kibu be a naga olama nogo me badu deli, te kibu bede te nai bulama siyu, beba sisinao. 11 Tiali goli, te kibu be 7 wabo, te kibu be me delide dagego nai bulisama, te tų toma tuyu, olo elalumainao, tama dagego te tųde olo pedalobo nai sigio. Tama te wain gide me, te ni du oliv gide me, dagego te tiwai kolesaga naga yao. Tama te magi nai meni yai bidi dabe augwaligo naga te gide olo holobo nai siyu, tama te magi nai meni yai bidi dabego sisama tagalali nai me badu, te uni hasa dabego tula silimainao.”^r

12“Tama tigidali Sarere dagego se te nogo a naga olama me deli, te tama sogo dagego se eyu, tama te a naga olama nogo me badu si wali, te me deli sogo dagego se igio. Tama tiyu da, te donki dabe, me te bulmakau, me te se ebo bidi dabe, me te se ebo we dabe, me te dage dali bidibo gasa bulu bidi augwali me, te toma tuyu, tama bomo ma saibao.”^s

13“Tama dagego eno te mabo po tigidali bugagia odolama, wali pao. Tama dagego tibo godibolo te gedu haluasa po me wagio. Tama dagego augwaligo nogi me wagio. Habu mu dao,” te po wali.

Sela sogo genuai lotu wabo side

(Sai 34:18-26; Bom 16:1-17)

14“Tama deli deli kibu bede sela sogo dagego genuai lotu enaba wabo bodolu muao. 15 Tama dagego te Bo Disiawai Nai Bret te genuai side te me bodolu munama, tama sisinama, lotu po wainogo, te eno wali po gilama tiwai yao. Tama dagego te bo disiawai nai bret te a naga olama nogo me badu si, te tama sogo polua nogi Abip, te sogode te nai tuabo bodolu muai dao. Magi basowe, te poluade naga dagego te bulu Isip taga soai.

^p 23:8 Prs 19:15; Bom 16:19 ^q 23:9 Sai 22:21; Prs 19:33-34; Bom 24:17-18; 27:19

^r 23:11 Prs 25:1-7 ^s 23:12 Sai 20:9-11; 31:15; 34:21; 35:2; Prs 23:3; Bom 5:13-14

Tama dagego enaba lotu po wagasainogo da, dagego te ofa yabo nai deli me selasa asião.”^t

¹⁶“Tama dagego te wit tau yali gagalama hasia bolo nai sabo sogo, tama dagego enabolo usu da po weyu, tama wiegi yai homu te nai tuyu yabo, te sogo genuai bodolu muao.”^u

“Tama dagego te genuai side te poluade te nedu du tau ebo sogo, te me bodolu muião. Tama te sogo dagego te wain gide te wain du siyu, osogo bidabo dwasianu be seņama, tama te bede bidiyu, te wain me, oliv ni du dabe me, te gide sião.”

¹⁷“Ena God, dagego Genuai Bidi, tama eno te kibu be deli delide sela sogo lotu wabo bodolu muani, tama te tigidali bidi dage aselama, enaba lotu po te sogo wagasião.”

¹⁸“Dagego te kibu sipsip me bulmakau enaba ofa ebo sogo, dagego te bo dai yis elalubo bret dali ofa igio. Tama dagego te ofa ebo kibu ili dabe tigidali te siaba ulama, tama dagego te nosali kigamu ofa yabo me tagalama elalumainogo igio.”

¹⁹“Tama dagego te polasa mu tau yali wiegi yai nai mu te gasa nai elalubadi, te nai dagego Genuai Bidi God eno beba sela pao.”^v

“Dagego te meme ame pe te seneba munama, tama te memego digi wai elama, aga tigi mi te seneba munama, ulama tugio.”

Godigo po meba augwaliba mayu, tama po daų wai

²⁰“Odião, te eno se ebo Ensel Mobo Bidi tagala palama, polasa peyu, tama dage tuđu pabode tonalua paibao. Tama agai te dage eno mawainogo sisi yai elaluali te bulu tũa odasa peyu, teba sabolaibao. ²¹Tama dua dao, dagego agai po bugagia odolama wali pao. Dagego agai po sela sađio, magi basowe, ena digi ena aga dali mu bidiyu, tama agai te po sela sađo we bidigo dwai kolesaga te sela sađobeo. ²²Tialima, dagego agai po wali pelama, tama eno te po wali se tiwai tigidali ebaso da, te eno dagego boi bidi dabe augwali dali hwınama, tama te dage dene mabo homu ebo bage me, te eno augwali aiyaba elaluaibao. ²³Eno se ebo Ensel Mobo Bidi agai te dagego polasa pabo bidi pedelama, tama dage te Amor dabe, me te Hit dabe, me Peres, me te Kenan dabe, me te Hivi dabe, me te Jebus dabe, te hani augwaligo tũa dage odasa pelama, tama eno augwali hani mu ela silaibao. ²⁴Dagego augwaligo tibo godiba kidu sugunama, lotu wagio. Tama dagego augwaligo lotu wabo te kolesaga sigio. Dagego augwaligo te tibo god dolama, tama augwaligo te lotu wabo masigi dabe pepedela sayao. ²⁵Tama dagego lotu po enaba naga wao. Ena God, dagego Genuai Bidi dao. Dagego tama tiyu da, te eno dage

^t 23:15 Sai 12:14-20; Prs 23:6-8; Nam 28:17-25 ^u 23:16 Prs 23:15-21, 39-43; Nam 28:26-31 ^v 23:19 Bom 26:2; Sai 34:26; Bom 14:21

wiegi yai iliyu, tama dage nai me te wẹ me mayu, tama dage gasi dabe me tigidali sela s̄awaibao. ²⁶Tama eno te wai haliga elalubo we dabego wai bugagia ame nomainogo yaibao. Tama eno te bidigo sai wego tabi daḡ me walogobeo, te tigidaligo wai ame nomainogo yaibao. Tama dage polo me isigobeo. Menio. Te eno dage tigidali e t̄de bobobage sogo bida waibao.”

²⁷“Tama ena dage pabo digi polasa peyu, tama eno te boi bidi dabe augwaliba wi genuai ilama, tama eno augwali homu didibili ilaibao. Tama eno augwali dagede wi ilama pomainogo yaibao. ²⁸Tama eno te bidi gaḡ kelebo nai nenemo dabe polasa tagala palama, dage nosali asobadi, tama augwaligo te Hivi dabe me, te Kenan dabe me, te Hit dabe me, te hani augwali sela s̄amainogo yaibao. ²⁹Tiali goli, eno augwali te kibu be delide naga sela s̄agobeo. Eno tama tiyu da, te t̄ olo elalubo digi te bulu uni hasa dabe hauwa tede pedelama, tama dage dolidalio. ³⁰Te eno boi bidi dabe augwali dua dua digi sela s̄ayu, tama dage hauwa pedelama, tama dagego te t̄ tigidali usu na silao.”

³¹“Tama eno dagego t̄ daḡ e tiwai ilaibao, te wẹ sanede, te mama tamu aḡ badu, te Akaba t̄ te badu pelama, te t̄ tomode elalubo genuai tamu aḡ Mediterenian teba sabolama, tama genuai wẹ Yufretis te badu peyu, te masigi kemi elalubo badu teba te daḡ sabolaibao. Tama eno bomo dageba menama, tama te t̄de bidibo hani augwali aiyaba elaluama, tama dage te t̄ tomoba peyu, augwali sela s̄awaibao. ³²Tama dagego augwali dali po daḡ weyu, me ma augwaligo tibo god dali me te tiwai kolesaga igio. ³³Dagego augwali te dagego t̄de bidimainogo sula tagaligio. Tama tiyu, augwaligo dage dwai kolesaga tomoba kegeyu, tama enabolo seḡe ilidalio. Tama dagego augwaligo tibo godiba lotu weyu da, te dage tulaluama, tama mu dolaibao,” wali.

Bomai po daḡ wali daḡ

24 ¹Genuai Bidigo Mosesbolo te po wai, “Eno homugo nage dali, te Aron, me Nadap, me Abihu, me te Israel dabe genuai bidi, te bidi sese sela olama nogo si bidi dabe, dage ena bidibo te bulu duba ugwa holomainogo yaibao. Tama dage digibulu gana dolaluyu, tama t̄ba basi gulama, tama enaba lotu wagameo. ²Tama Moses, nage deli naga ena p̄ba asagameo. Tama gasa te Israel genuai bidi dabe augwali te p̄ba me asis̄ama, tama te olo we bidi augwali me te nage dali aselamo dao,” wali.

³Tama Moses pelama, te Genuai Bidigo bomai po tigidali te we bidi augwalibolo pusigi pai. Tama tigidaligo te po odolama, tama augwaligo pedauwali deliba munama, tama te po wai, “Dago te Genuai Bidigo po wali te se tigidali yaibao.” ⁴Tama Mosesgo Genuai Bidigo bomai po tigidali aseai. Tama nosali side aga kigamu mu hodaluama, tama alta me deli te bulu du sesegede nigilama, tama te alta p̄de agai te masigi nogo

si olama saḡaḡo si dodaluali, te Israel hani nogo si olama saḡaḡo si te ɗai ilai. ⁵Tama nosali agai gesi bidi meba tagala palama, tama augwaligo te ofa dabe te Genuai Bidibolo igi pomainogo tagala palai. Augwaligo te siago tigidali dabo ofa eyu, tama te bulmakau dabe elama, tama God dali deli homu elama bidabo ofa dabe yai. ⁶Tama augwaligo te ofa ebadi, tama Mosesgo te ofa yai bulmakau dabego kaneme selama, tama dobolama, meba te pouba muyu, tama te kaneme meba munalubo te agai selama, te altaba saḡwai. ⁷Tama agai te bomo yai po ɗaḡ wai elalubo buku selama, te Genuai Bidigo po te bukude elalubo te we bidi augwalibolo nedai. Augwaligo odolama, tama augwaligo te po wai, “Dago te Genuai Bidigo po tigidali odoyu, dolo wali paibao,” wali.

⁸Tama Mosesgo te poude muani kaneme selama, te we bidi dabeba te kaneme segeni saḡaḡa pali. Tama agai te po wai, “Te kanemego Genuai Bidi agai dage dali ɗaḡ wali bomo yai po ɗaḡ walai dao. Tama te bomo yai po dabe te ɗaḡ wali po page dao.”^w

⁹Tama nosali Moses, me Aron, me Nadap, me Abihu, me te Israel dabe genuai bidi, te bidi sese sela olama nogo si tama, augwali te bulu duba holai. ¹⁰Tama augwaligo Israel dabego God suai. Tama agai saḡaḡa dologode genuai sisi yai nai me deli, te be sai tiwai nai elaluai, tama te dagalu ula tiwai mu elaluai. ¹¹Mu tama, augwaligo God suai, tiali goli agai augwali dolobeo. Tama nosali augwaligo nai te bulude tuai.

Moses Sainai bulu duba holai

¹²Nosali Genuai Bidigo Mosesbolo te po wai, “Nage bulu duba ma holama, tama ena paḡa bidagasao. Eno bomo yai po meba te masigi sawali side aḡaibao. Tama eno te masigi si nagebolo menama, tama nago te bomo yai po te we bidibolo ola magameo,” wali.

¹³Tama tibaso, Moses aga seḡ bidi Josua dali, augwali si sisi elama, te Godigo bulu duba holainogo yai. ¹⁴Tama hasia sogo Mosesgo te Israel dabe genuai bidi augwalibolo te po wai, “Dage te be seḡnama, bidibo pesagede bidiyu, tama da si ma asobo tonaluyu bidao. Aron de Hur si dage dali bidaibao. Tama bidi mebago po gasa bidi dali wabo elalubaso da, teda augwali te bidi si pageba pelama, tama te bidi sigo te po dodolomainao.” Te po wai.

¹⁵Mosesgo te po ola silama, tama aga te Sainai bulu duba holali, tama poḡo te bulu du halua sai. ¹⁶⁻¹⁷Tama Godigo genuai ula te bulu duba dulai. Tama Israel dabe augwaligo te Genuai Bidigo te ula te bulu dude te genuai sia ula ebo tiwai suai. Tama poḡo te bulu du halualubadi, te nogo a naga olama me badu nogo deli sogo yai. Tama te a naga olama me badu si wali, te me deli sogo te Genuai Bidi te po tomode bidiyu, Moses

^w 24:8 Mat 26:28; Mak 14:24; Luk 22:20; 1 Ko 11:25; Hib 9:19-20; 10:29

asomainogo i wai. ¹⁸Tama Moses te pɔ tomoba pelama, tama te bulu du ugwaba mu holai. Tama aga te bulu dude te bidi sese si 40 te tama sogo bidai.^x

Godigo ugwa bede muabo nai dabe po wali

(Sai 35:4-9)

25 ¹Tama Genuai Bidigo Mosesbolo te po wai, ²“Te Israel dabe augwalibolo po olama, tama augwaligo nai dabe selama, enabolo ofa momainao. Te we bidi augwaligo mena ofa nai mawainogo homu ebaso, te usu da, te nago sao. ³Nago e tobage tiwai nai dabe augwali dali sao, te kapa gol, me silva, me bras, ⁴me te sipsip nisigo nigai hobi dabe, meba sisi yai, meba mama yai, tama te wiegi yai au yai name ugwa me, te gasa ugwa augwaligo meme nisigo nigai me, ⁵te sipsip omaigo wali te augwaligo mama pengo pilai me, tama wiegi yai hasa sikau wali tamu āide elalubo me, te me badu ni akas, te tama nai dabe sao. ⁶Tama te lam sole udulabo oliv ni du wel me, te wel dali begelabo pauda me, te eno nai dabe dāi ilabo nai, tama te pauda wiegi yai denami elalubo te hano dali yabo nai me sao. ⁷Tama haniani bomai masigi, te mone hauwago abelabo masigi tiwai, te pris dabe tobolu bidi aga ugwade belabo ugwa, me te aga bobobage gudubo ugwade te hagawia badu muabo, te sao. ⁸Tama te we bidi augwalibolo te po olama, tama te ofa mani naigo augwaligo te eno ugwa be me deli sɛnama, te wiegi yai tedali bede ena augwali dali tomode bidaibao. ⁹Tama dagego te ugwa be me, te be tomode munalubo nai tigidali me, te dolo bugagia nigimainogo eyu, tama eno te piksa noma nagebolo hasia ola mawaibao.”

Bomo yai po muabo halobage

(Sai 37:1-9)

¹⁰“Tama dagego halobage me deli te akas ni namego nigao, tama te halobage bobobage nigabo usu ni te 110 sentamita, te genuai te 66 sentamita, tama ugwadu usu ni te 66 sentamita, te tama tiwai nigao. ¹¹Tama dagego wiegi yai kapa gol te augwaligo siade ulama, pobele bage sela sāwai selama, tama golgo te halobage bulu badu me, tomode me haluama, tama bobobage gol dage me deli te halobage sesegede bagulama kēāo. ¹²Tama te halobage tolabo ring me si me si te golgo nigilama, tama te dwasianu halobage dolalubo sāgāde kēāo. Tama me si me sāgā side kēyu, me si me sāgā side kēyu yao. ¹³Tama dagego te ni akas pedai si dulama, te halobage tolabo te ni pedai si te golgo haluao. ¹⁴Tama te ni pedai si te ring tomoba te me badu muyu, me badu muyu elama, te halobage tolasa pomainogo eyu, tama tiao. ¹⁵Tama te ni dage

^x 24:18 Bom 9:9

si sesemane sogo te ringde elalumainao. Tama dagego te gudulamo dao. ¹⁶Tama nosali eno nage te bomo yai po elalubo masigi sawali si mawaibao, tama nago te masigi si te halobage tomoba muao,” wali.

¹⁷“Tama dagego te halobage po paliabo nai te wiegi yai kapa golgo nigao, te bobobage nigabo usu ni te 110 sentamita, tama te genuai usu ni te 66 sentamita dao. Te halobage da, te we bidigo dwai seḡe sali sela saḡo digi dao.” ¹⁸Tama dagego te gol meba selama, tama te hamago elama, tama te ensel mobo bidi noma si te golgo nigao. ¹⁹Tama me deli te halobage dolo nogo badu te halobage po paliabo nai elalubo digi te dolalumainogo eyu, tama me deli te pobase nogo badu dolalumainogo muao. Dagego te gol dage me deli selama, te halobage paliabo nai nigilama, tama aga te mobo bidi si me nigao. Tiali goli, dagego te nai sela nigilamuo, menio. Tigidali nigibo nai te deli nai tiwai naga nigao. ²⁰Tama te mobo bidi si te we bidi dabego dwai seḡe yali seḡe sela saḡo digi dolaluyu, tama mego gesabidigo me gesabidiba tiwai tonaluyu, tama augwali sigo aba te halobageba me tonalumainao. Tama augwali sigo bogo dinigina pai elaluyu, tama te halobage te tama dualumainao. ²¹Tama nagebolo eno te bomo yai po elalubo masigi sawali si menama, tama nago te masigi si te halobage tomoba munama, tama te halobage po paliao. ²²Tama ena nage dali te dwai seḡe sela saḡo buluba sisinaibao. Tama ena te mobo bidi si daidu tomode ugwadu bidiyu, tama nage dali da si deliba sisinama, tama eno te bomo yai po tigidali nagebolo pusaibao. Tama nago te bomo yai po te Israel we bidi dabe augwalibolo menama, tama augwaligo wali pomainao,” wali.

Augwaligo Godibolo maiabo bretgo tebol po wali

²³“Tama dagego te ni akasgo te tebol sai me deli nigao, te bobobage usu ni te 88 sentamita, te genuai usu ni te 44 sentamita, tama te ugwadu daidu te usu ni 66 sentamita dao. ²⁴Tama te tebol sai te wiegi yai golgo haluama, tama bobobage golgo te tebol sesege badu bagulama, daḡ wao. ²⁵Tama dagego te gol genuai ilibo te 8 sentamita ilama, tama dwasianu gol dagego te tebol sesege badu tigidali te obo bogegelao. ²⁶Tama dagego te tebol tolabo nai ring me si me si te golgo nigilama, tama te tebol saḡa me si me si te badu keḡa. ²⁷Tama te ring dabe te tebol paḡe ugwadu daide munaluaibao. ²⁸Tama dagego te ni akas si te tebol tolabo ni dulama, tama te ni si te golgo haluao. ²⁹Tama te wain ofa yabo genuai pou dabe, me te dwasianu pou dabe, me kap, me te botol me nigao. Dagego te nai dabe te wiegi yai golgo naga nigao. ³⁰Tama sesemane sogo dagego enabolo maiabo bret te tebolba naga munama, tama eno gedude munaluaibao,” wali.^z

Te sole dabe tolalubo nai*(Sai 37:17-24)*

³¹“Dagego te lam sole dabe muabo nai me deli te wiegi yai golgo nigao. Tama te gol hamago elama, te lam dabe tolalubo nai dolaluabo pesage nigilama, tama dono nigilama, te lam nogo dabe muabo digi nigao. Tama te golgo naga aga au yabo ni duduli noma meba nigao. Tama te tigidali nigibo te deli tigi tiwai naga nigao. ³²Te lam donogo nogo te a naga olama nogo me badu deli elalubo, te me sela te me badu muyu, te me sela te me badu muyu yao. ³³Tama tigidali nogo deli delide usu nama, te ni duduli noma sela elaluyu, te ni amongo nigai tonobo tiwai yaibao. ³⁴Tama te lam dono aga digi me te tiwai yao. Tama te ni duduli noma me si me si te amon ni aga duduli tiwai dao. ³⁵Tama te ni duduli yabe dwasianu dabe te lam dono nogo si si dologode naga nigao. ³⁶Te dagego hama selama, te gol haluama, tama te nai dabe tigidali te deli nai tiwai naga nigao. ³⁷Tama dagego te lam a naga olama me badu nogo si nigilama, tama augwali te lam tolalubo naiba muao. Tama augwali te bugagia wasilama, augwaligo ula te ugwa be tomoba pomainao. ³⁸Tama te lamde mubo hobi dodolobo nai me, te pou me, te nai dabe te wiegi yai golgo naga nigao. ³⁹Dagego te wiegi yai genuai seḡe elalubo te 35 kilogram golgo te lam tolalubo nai te nai dabe nigao. ⁴⁰Dagego te nai nigibo sogo, dagego dua bugagia te piksa noma eno nagebolo e bulu dude ola mani, te dolo wali pelama, te nai dabe nigao,” Genuai Bidigo te po Mosesbolo wai.^a

Godigo ugwa be*(Sai 36:8-38)*

26 ¹Genuai Bidigo po me ma weyu, Mosesbolo te po wai, “Dagego enabolo lotu po waiabo ugwa be te nogo si wiegi yai name ugwa te sisi yai, me te mama yai, te augwaligo hobigo au ilai ugwago nigao. Tama hobi selama, te ensel mobo bidi piksa noma dabe te name ugwade hobolama nigao. Te name ugwa te hobigo wiegi yai au ebo seḡ mu koneai bidi, agai te tobage au ebo seḡ emainao. ²Tama tigidali te name ugwa te dedeli au yai tiwai naga nogo si nigao. Te ugwa dabe bobobage te 12 mita, tama te genuai usu sabo te 2 mita dao. ³Tama a naga name ugwa dali bogo badu hobolama, tama te genuai moni bage kilasa pelama, tama gasa name ugwa te tiwai a naga hobolao. ⁴Tama te genuai name ugwa side wadolabo sisi ugwade te ring meba nigao. Tama te ring dabe te genuai ugwa si sesegede keḡe pao. ⁵Tama hasia te name ugwade te ring bidi sese si olama nogo si te sesegede bebe peyu, te gasa bidi sese si

^a 25:40 Tpi 7:44; Hib 8:5

olama nogo si me te si wali name ugwa sesegede keḡo. ⁶Tama dagego te bidi sese si olama nogo si huk te genuai ugwa si dali tama te deli ugwa tiwai naga pedelemainogo, bebe pabo te golgo nigao.”

⁷“Tama nosali dagego te genuai name ugwa deli te eno ugwa be haluabo nigao. Tama te name ugwa dage te nogo si olama saḡaḡo deli augwaligo te kibu meme nisigo nigao. ⁸Te tigidali badu te deli tigi tiwai naga nigao. Bobobage usu ni sabo te 13 mita tama, te genuai usu ni sabo te 2 mita dao. ⁹Tama a naga me badu dali hobolama, te bobobage ugwa deli tiwai naga pedelama, tama me sela me sela badu dali hobolama, tama te bobobage ugwa tiwai deli pedelaibao. Tama te me sela me sela wali te ugwa sigo pedelama, te ugwa be sunumi badu haluabo, te tama walolomainao. ¹⁰Tama te bidi sese si olama nogo si ring te hasia ugwa sesegede keḡama, me te bidi si olama nogo si ring te ugwa si wali ugwade keḡo. ¹¹Tama dagego te bidi sese si olama nogo si huk bras nigilama, tama te huk dabe te ringba munama, te genuai ugwa si dali si bebe pelama, te deli ugwa tiwai naga elaluaibao. ¹²Tama te usu sabo nai 1 mita te genuai ugwa te olo munalubo digi dagego te eno ugwa be tуди badude halalumainogo sula tagalao. ¹³Tama te bobobage halubo ugwago te ugwa be bogo badu side bobobage aiya elaluama, te 50 sentamita me badu elaluyu, te me badu elaluyu yaibao. Tama tebogo te ugwa be tigidali mu halua sabo usu yaibao. ¹⁴Tama te meme nisigo nigai genuai name ugwa, te nai ugwadu muabo gasa haluabo nai me si ma nigao. Me deli te omai sipsip wali te augwaligo mama pengo pilai tego nigao. Tama me deli te tamu aḡide bidibo hasa nogi sikau, te dabego waligo te ugwadu haluabo te nigao.”

¹⁵“Tama dagego te ugwa be daga dolaluabo ni name dabe te ni akasgo nigao. ¹⁶Te tigidali ni name deli deligo usu sabo te 4 mita, tama te ni name genuai usu sabo te deli deli te 66 sentamita dao. ¹⁷Tama dagego te ni name dabe dolaluama, tama pagede dulama, te peḡadage saḡa si si dula dula pelama, tama dagego tigidali ni name te tiwai naga nigao. ¹⁸Tama dagego te tobage ni name bidi sese deli usu nabo te lotu ugwa be me bogo badu dolalumainogo eyu nigao. ¹⁹Tama dagego te kapa silva selama, tama te gelali ni page tiwai nai te bidi sese si te dedage elalubo te ni name saḡa bulabo digi nigao. Te page nai si si te ni name deli deli dologode munaluyu, te tigidali daga ni name page daḡ elalumainao. ²⁰⁻²¹Tama dagego te tiwai naga te be gasa bogo badu me tama tiao. Te bidi sese daga ni name nigiyu, te bidi sese si silva te ni name page daḡ wabo nai dabe nigilama, te silva pedai si te ni name deli delide muao. ²²Tama te be daga ni name te me sela me sela te ugwa be tуди badu, te sia ge dega sigi pabo badu, teba mumainogo nigao. ²³Tama te badu kona side te ni name si si nigiyu, tama dabelim yao. Te tama nigao. ²⁴Tama te be dili habu badu te kona ni name si pagede wadolama, tama tigidali

ugwaba wadodolo holao. Tama dagego te si dali si habu badu tama tiao. ²⁵Tama te tudi badu te daga ni name te a naga olama nogo me badu sela elaluaibao. Tama nogo si olama nogo a naga tama me badu deli te silva te ni name page daꝓ wabo nai si usu nama, te deli deli usu dao.”

²⁶⁻²⁹“Tama dagego te ni akas selama, tama te ni name tuabo bobobage ni meba nigao. Tama te bobobage ni dabe te ugwa be daga dolalubo ni namede daꝓ omainogo eyu, tama te wiegi yai kapa golgo te genuai ring dabe nigiyu, munalubo keꝓao. Tama te dolalubo ni name tigidali me, te bobobage ni name tuabo ni dabe me, te nigo nigali nai tigidali te golgo haluao. Tama elama, tama te bobobage ni a naga tego te be me bogo badu dolalubo ni name dabede te ring dabego daꝓ wao. Tama bobobage ni meba te ni name ugwadu muyu, meba te ni name aiya badu muyu yao. Tama meba me tomode muyu, tama te be tudi badu gagalama, tama asama, tama te be gesabi baduba sabolaibao. Tama te be u bogo badu me te bobage ni namego tama naga tiao. Tama te be tudi badu daga, te sia ge dega sigi pabo badu, tede me te bobage ni te dolalubo ni name dabego ringba bulama, tama daꝓ walao.”

³⁰“Tama nosali dagego te lotu wabo ugwa be nigibo nai dabe silama, tama te be dodolobadi, te eno nagebolo e bulu dude ola mani te piksa subo tiwai yao.”

³¹“Tama dagego te ugwa be tomode walabo name ugwa gasa au wiegi yai genuai nigao. Tama te wiegi yai tedela yai hobi dabe siyu, te sipsip nisigo nigai sisi yai hobi dabe me siyu, tama te sipsip nisigo nigai mama yai hobi dabe me siyu yao, tama tego te wiegi yai name ugwa me deli nigao. Tama dagego gasa haniani wiegi yai hobi dabego te ensel mobo bidi noma bugagia mu te ugwade hobolao. ³²Tialima, te ni akas selama, te pos ni me si me si nigao. Tama te pos dabe te golgo haluama, tama te pos dabe te silvago nigai page me si me si tede bulao. Tama te gol huk meba nigilama, tama te ugwa dabe daꝓ elalumainogo te posde keꝓe piꝓao, tede walomainao. ³³Tialima, tama te ugwa te huk dabeba walama, te bomo yai po daꝓ wai po aseꝓi masigi sawali si elalubo halobage, te nai te walobo name ugwa tudi badu muao. Tama te ugwago te lotu wabo be tomode daꝓ tiwai togolama, tama be habu si elaluaibao. Te sunumi paꝓde te polalubo be habu nogi wabo te Tedali Gasagi Yai Be Habu dao, te name ugwa daꝓ tudi badu te habu te Tedali Gasagi Yai Mu Be Habu dao.^b ³⁴Tama te bomo yai daꝓ wali po elalubo masigi sawali si elalubo halobage, aga te Tedali Gasagi Yai Mu Be Habu te be habu badu te halobage munama, tama te halobage po paliabo nai te halobageba muao, te dwai kolesaga yali seꝓe sela saꝓo madigi dao. ³⁵Tama tebol sai te gasa be habude muao, te nogi Tedali Gasagi Yai Be Habu dao, te ugwa be daga

^b 26:33 Hib 6:19; 9:3-5

pađe, te sia ge pedalubo sesege pobase nogo badu muao. Tama ula ebo sole te gasa badu te be daga pađe muao, te tebol sai dolo si muao.”

³⁶“Tama dagego te wiegi yai genuai au yai name ugwa te ugwa be tu bagulabo nigao. Tama te wiegi yai au yai hobolama, te e tiwai hobi, te sis hobi me, te mama yai hobi me, te augwaligo sipsip nisigo nigai dao. ³⁷Tama te ni akas selama, tama a naga pos nigilama, te golgo haluao. Tama te pos dabede te huk gol kenama, te ugwa walabode dao. Tama te page nai a naga te kapa brasgo nigao, dedage elalubo te pos dabe bulabo digi dao,” wali.

Augwaligo alta sai niga wai

(Sai 38:1-7)

27 ¹Tama Genuai Bidigo po ma naga weyu, te po wai, “Dagego te ni akas selama, te alta sai nigao, te moni halobage tiwai pađe dao. Te tigidali bogo sesege badu te deli tigi gagawai naga nigilao, te usu ni 2 mita 30 sentamita, tama te daide ugwadu usu sabo me ma te usu ni 1 mita 30 sentamita, tama usu nama nigao. ²Tama te kibu bulmakau gaq tiwai nai me si me si te ni akasgo nigilama, tama deli deli dage badu daq walama, tama te alta tigidali te brasgo mesegelao, te aga deli tigi naga elaluaibao. ³Tama bras selama, te sia keli sabo pou me, te dwasianu savol me, pou me, te ofa hasa mi dodolobo age yai na me, tama te sia dage sela pabo plet nigibadi yao. ⁴Tama dagego te moni bras sawali selama, tama polola polola pelama, tama te tama pololai bras sawali te alta halobage tomoba muao. Magi baso meni, aga ugwadu daide augwaligo te sia nogelama, tama te ofa mabo nai te siago udubadi, tama te keli aiyaba tuloluaibao. Tama bagua si nai deli deli te bras sawali nai habu badu munama, tolabo madi muabo nai te brasgo nigao. ⁵Tama te alta halobage tomode te tigidali habu badude te aiya badudu usu siyu, ugwaba asiyu, tama tomode mu te dwasianu sai nigiyu, tede daq wao. Tama te moni pololai bras sawali, aga te dwasianu sai dabe ugwadu daide munaluaibao, te alta halobage tomode. ⁶Tama dagego te ni akas dage si selama, tama dulama, tama te dono si brasgo haluao. ⁷Tama dagego te alta tolasa painogo ebo sogo, te baguali dedageba te ni dono si munama, tama tolao. ⁸Dagego ni name selama, te alta te halobage tiwai nigao, tiali goli dagego te ni name te halobage habu pagede musiama, te dedage elalumainogo yao. Dagego te eno nagebolo te bulu dude ola mani piksa te tiwai nigao,” tama po wali.

Godigo ugwa be bagulali obo po wali

(Sai 38:9-20)

⁹“Dagego te genuai gasagi yai ugwa obo ebogo te lotu ugwa be mesalo bagulao. Bobage nigibo usu sabo te 44 mita, te wiegi yai bobage ugwago

obo tiwai bagulubo te me badu bogo badu nigilao. ¹⁰Tama te wiegi yai bobage obo ugwa walomainogo eyu, tama te kapa bras selama, tama pos te bidi sese deli nigao. Te pos dabe bulabo page dabe me te brasgo nigao. Tama te wiegi yai kapa silva selama, tama bobage dono dabe nigiyu, tama huk dabe hauwa nigiyu yao. Tama te pos dabe si si dolaluyu, tama pos me si tomode ugwadu te dono me deli daŋ wao. Tama te donode te huk meba munama, tama te ugwa obo te huk dabede tama walao. ¹¹Tama hasia te nigali tiwai naga, te me badu bogo badu obo bagulubo te tiwai nigao.”

¹²“Tama te sia ge dega sabo badu obo, te ugwa me deli te bobage usu sabo te 22 mita te usu nama nigao. Tama pos nogo si badi, te pos page daŋ walabo bras nai, te me nogo si te pos dodolabo madi dedage elalumainogo nigilao. ¹³Tama te sia ge pedalubo badu obo te tų elalubo madi, te usu sabo me te 22 mita dao. ¹⁴⁻¹⁵Te bobage ugwa walabo madi, te aga bobage usu nama, te 6 mita 90 sentamita, te tų si dali si badu dao. Te ugwa deli delide te pos sela te bras page dolalubo madi wawalo pao. ¹⁶Te tų dolo gasa wiegi yai name ugwa walao, te aga te 9 mita usu dao. Tama aga haniani te sipsip kibu nisigo nigai, husugu hobigo, me mama yai hobigo au ilama, hobolao. Tama dagego te pos me si me si te brasgo nigali pagede dodolama, tama te posde te bobage wiegi yai ugwa wawalo pao. ¹⁷Tama dagego te obo pos si si te ba silva dabego tigidali daŋ walao. Tama te bisigi gaŋ dabe te silvago nigilama, tama te pos dabe te ba silva keŋao. Tama bras selama, te pos dabe dodolabo madi nigao. ¹⁸Tama te obogo bobage usu nama, te 44 mita, te aga genuai usu ni te 22 mita, tama te ugwadu usu sabo te si 2 mita me 20 sentamita dao. Tama dagego wiegi yai tedela yai ugwa te obo bagulabo selama, nigao. Tama dagego te bras selama, te obo pos dabe dodolabo madi nigilao. ¹⁹Dagego te bras naga selama, te ugwa bede se yabo tigidali nai te brasgo nigao. Te ugwa be dali, aga mesalo obo dali si tuloluidali weyu, te bono dabe te augwali side gebelama, tama bobobage nil dabe tōba enama, tama te bono dabe te nil dabeba gebelao. Tama dagego te bobobage nil dabe te brasgo naga nigao.” Genuai Bidigo te po wai.

Te sole dabe tonalubo kolesaga ebo po wali

(Prs 24:1-4)

²⁰“Nago te Israel we bidi augwalibolo te po olama, augwaligo te wiegi yai oliv ni dude sabo wel te lamde muabo sela asa wao, tama te lamgo ula te tigidali sogo elaluaibao. ²¹Tama Aron aga ogomani dali, augwaligo te lam sole tolalubo nai eno ugwa be tomoba sela peyu, dodolomainao, te walali ugwa e badu me bogo badu, te bomo yai po elalubo halobage te ugwa tudi badu munalubao. Te ugwa bede ena te we bidi dali sisinabo be dao. Tama tigidali sogo Aron aga hani bagego wel te lamde munama,

tama te lam ula ena bidibo madi ula elaluaibao, tama pio gagalama, kigamuba usu nigi paibao. Dage Israel dabe dali, dagego te nosali pedalobo wai dabe dali, augwaligo te eno te lamde wali bomo yai po sesemane sogo tolalua peyu, bidada paibao.”

Pris dabego gudubo ugwa po wali

(Sai 39:1-7)

28 ¹Genuai Bidigo po ma wadolama weyu, e tiwai po wai, “Moses, nosali nage ma peyu, nago naga ama Aron aga ogwa dabe dali augwali i wao, Nadap, me Abihu, me Eleasar, me Itamar, augwali asomainao. Tama nago augwali te Israel bage tomode selama, tama augwali eno pris bidi pedalomainogo yao. ²Tama Aron prisgo gudabo ugwa wiegi yai tedali nigibadi, tama aga au ilama, tama gasagi yai pedelama, tama aga nogi te Israel we bidi gedude elalumainao. ³Tama eno homu kolesaga menama, te ugwa me gasa haniani nai nigao wali, te bidi augwali i olama, tama augwalibolo po olama, tama augwaligo te Aron pris pedalobo sogo muabo ugwa nigimainao. Tama agai enade pris se yaibao. ⁴Tama augwalibolo olama, te Arongo hagawiade muabo dwasianu ugwa dage deli au ilama, hobolao po wao. Tama augwaligo au yai ugwa me deli hobolobadi, me bobage ugwa deli badi, me te au ilai holobo ugwa, me tobolude bagulabo ugwa badi, me kukulu deli tama hobolao. Augwaligo te tedali gasagi yai ugwa dabe te Aron pris dali, te aga ogwa dabe, augwaligo me te ena tiwai pris se emainogo yabo ugwa dabe nigao. ⁵Te se bidi dabe augwaligo te husugu hobi, me mama yai hobi, augwaligo te kibu sipsip nisigo nigai, tama gol hobi me, tama wiegi yai name ugwago te ugwa dabe nigimainogo yao.”

⁶“Tama augwaligo te husugu hobi, me mama hobi te augwaligo sipsip nisigo nigali, me te gol hobi selama, tama wiegi yai ugwago hobolama, bugagia au ilao. Te tobage se ebo mu koneai bidigo naga te se yao. ⁷Tama augwaligo te ugwa daide ugwadu te ugwa daḡ olaluabo kukulu si hobolao, tama kukulu te nagiba bolama, tama te tudiba abebolabo usu nama hobolao. ⁸Tama augwaligo te sisi hobi, me mama hobi selama, augwaligo te sipsip nisigo nigai, tama wiegi yai ugwa dage sobadi elama, te mo tiwai kukulu nigao. Tama augwaligo te kukulu te ugwa sesegede kenama, tama te ugwa dage aga tiwai elaluaibao. ⁹Tama augwaligo nogi ebo wiegi yai masigi konilian si selama, te Jekopgo ogwa dabe nogo si olama saḡago si nogi mumainogo yao. ¹⁰Tama gomunai ogwade hasia gagalama, tama te nogo si olama saḡa si te sabi ogwaba te nogi mubo siminigi pao. Augwaligo te 6 nogi te me masigide mubadi, te 6 nogi te gasa masigi mede mubadi yao. ¹¹Nago te masigide asebo po togobo koneai bidi me delibolo te se menama, tama agai Jekopgo ogwa dabe nogi te masigi side asemainao. Tama dagego te gol selama, te masigi si

daꝓ olama tolaluabo au ilabo dwasianu nai si nigao. ¹²Tama te masigi si te nagide bolai elalubo kukulu siba keꝓama, tama te Israel hani augwali daꝓ yai tiwai elaluaibao. Tama Arongo augwali nogi te aga nagide tolasa bilibaso, tama Genuai Bidi eno sulama, tama eno bidi hani te eno homugo augwali sesemane sogo kone palaibao. ¹³⁻¹⁴Augwaligo te au yai nai dwasianu si te golgo nigibadi, tama te haliga si me golgo nigao. Augwaligo gol te dwasianu waia tiwai nigilama, tama te haliga nigibo kolesaga tiwaigo nigilama, tama te haliga si te au ilali golba keꝓao.”

Hagawiade mubo dwasianu ugwa

(Sai 39:8-21)

¹⁵“Dagego te het prisgo hagawiade muabo dwasianu ugwa me deli nigao. Te nai da, te Godigo homu kolesaga koneainogo tiaibao. Tama dagego te tiwai nai naga augwaligo te het prisgo dwasianu ugwa dagede au ilali tiwai selama, nigao. ¹⁶Tama dagego te dwasianu ugwa bobage ilibo usu sabo te 44 sentamita, tama aga genuai usu sabo te 22 sentamita dao. Tama bugagia tomode pobelama, te genuai agebele tiwai pobelama, tama tigidali badu me te tiwai daꝓ naga elaluaibao. ¹⁷⁻²⁰Tama dagego te me si me si nama hani bomai wiegi yai masigi te ugwade wasilama, keꝓao. Tama hasia polalubo hani masigi augwaligo nogi wabo te rubi, me topas, me ganet, tama keꝓao. Tama te hani side te masigi emeral, me sapaia, me daimon, te tama keꝓao. Tama te keꝓabo hani sela masigi tekois, me aget, me ametis dao. Tama te keꝓabo masigi hani me si me si te beril, me konilian, me jasper dao. Tama dagego tigidali deli deli masigide te golgo au tiwai dwasianu ilama, tama nosali te masigi dabe ugwago keꝓao. ²¹Tama te nogo si olama saꝓaꝓo si wali te tigidali masigi deli delide dagego te Jekopgo ogwa nogi deli deli te duga Israel hani tigidali daꝓ ela siyu, nogi aseꝓe pao.”

²²“Tama dagego wiegi yai gol selama, tama haliga si te hagawiade ugwa tolaluabo haliga si nigao. ²³Tama te ring gol si nigilama, tama te habu si badu te hagawiade muani ugwa daide ugwadu muao, ²⁴tama te haliga si te ring side keꝓao. ²⁵Tama dagego gasa te haliga gol si sesegede keꝓama, te au ilali gol side tama gol au ilali te kukulugo te het prisgo ugwa tolalumainogo keꝓao. ²⁶Tialima, tama dagego te ring gol me si ma nigilama, tama aiyadu habadu te ugwa elalubo madi hagawia badu te ugwa tudi paꝓadu keꝓao. ²⁷Tama dagego te ring gol me si ma nigilama, tama te si te kukulugo te ugwa tolalubo madi keꝓao, te gasa wiegi yai kukulu te tabi moꝓo bagulali madi paꝓe, te nai keꝓao. ²⁸Tama sisi yai string hobi selama, te hagawiade elalubo genuai ugwade ring keꝓama, tama tiyu da, te hagawiade elalubo ugwa te moꝓ tiwai kukulude daꝓ ola somainogo elama, tama te hagawiade muani ugwa te munu me peda pogobeo.”

²⁹“Tama Aron te Tedali Gasagi Yai Be Habuba pabo sogo, agai te Israel hani tigidali nogi elalubo te dwasianu ugwa te aga hagawiade munama, sela pomainao. Tama ena Genuai Bidi, eno te ena hani bidi dabe augwali sulama, tama eno augwali sesemane sogo homugo kone palaibao. ³⁰Tama te masigi si te Godigo homu kolesaga somainogo te hagawia badu muani ugwa agebele tomode munama, tama Aron te Tedali Gasagi Yai Be Habu tomoba pabo sogo, ena Genuai Bidi ena agade bidibao, aga te masigi si dali tolasa pomainogo yaibao. Sesemane sogo agai te hagawiade te muani ugwa sela asomainao, te agai eno Genuai Bidigo magi sę te Israel dabe dali yainogo ebo te agai konemai hagede yaibao,” wali.^c

Prisgo gasa ugwa dabe po wali

(Sai 39:22-37)

³¹“Te bobage ugwa te name ugwa dali kęnama, te dagego sisi hobi augwaligo te sipsip nisigo nigai naga selama, te ugwa nigao. ³²Dagego te tobolu muabo madi dedage nigilama, tama dwasianu ugwa dage me deligo te dedage bagulama, tama te sesegede te dedage bomo yai pedelama, tama dedage genuai peda pabuo. ³³⁻³⁴Tama sisi hobi, me haniani mama yai hobi te augwaligo sipsip nisigo nigai, tama nai mebago te ni pomigranet wai tiwai nigao. Te ni wai du dabe te prisgo ugwa sese aiyadu hobolama, tama golgo nigai belo deli deli te ni pomigranet du dabe tomo tomode hobolama walalumainogo yao. ³⁵Tama Arongo te bobage ugwa munama, te pris sę emainao. Tama aga ena te bidibo pąba te Tedali Gasagi Yai Be Habuba aselama, tama te buluba ma teda pabo sogo, te we bidigo te belo gela wabo odomainao. Ma, agai te bobobage ugwa gudasiąbaso da, teda eno aga ela muidalio.”

³⁶“Tama dagego te wiegi yai gol me deli selama, te ula ilibo nai medal me deli nigilama, tama e tiwai po te naide aseąo, ‘Te Genuai Bidigo Tedali Gasagi Yai Nai da,’ te po aseąo. ³⁷Tama sisi hobi selama, tama te gol nai tobolude muani ugwade kęnama, tama te het prisgo gesabidide ugwadu munalumainogo yao. ³⁸Sesemane sogo Arongo te medal tobolude elalubo ugwa muao. Tama tibaso da, ena Genuai Bidi eno te Israel dabego enabolo mabo ofa ebo nai te eno saibao. Ma, augwaligo te ofa ebo kolesaga mebago geda mubaso da, teda, Arongo te tebo augwaligo dwai sę sęę tolomainogo yaibao.”

³⁹“Dagego wiegi yai hobi selama, te holobo ugwa hobolao. Tama Arongo tobolude muabo ugwa wiegi yai nigilama, tama ugwa dage selama, tama mą tiwai kukulu nigilama, tama tede wiegi yai au ilama hobolao.”

⁴⁰“Tama dagego te holobo ugwa dabe, me te kukulu te mą tiwai, tama te tobolude muabo ugwa me, te Arongo ogwa dabe tigi munama,

^c 28:30 Nam 27:21; Esr 2:63; Neh 7:65

tama wiegi yai au mu ilama, tama te we bidi augwaligo gedude te Arongo ogwa dabe te nogi elaluyu, tama gasagi yai pedalomainogo tama tiao. ⁴¹Tama Moses, nago te ugwa dabe te naga ama Aron dali, aga ogomani dali, augwalibolo muao. Tama te ni oliv wel augwaliba gelama, te augwali pris dabe da olama, sa munama, tama te pris sę enabolo augwaligo emainao.”

⁴²“Tama augwaligo gudabo pęwadage ugwa belibo trausis te wiegi yai ugwago hobolama mao, te augwali tigi hale te bulu ulaba hania gagolama pedabuo. ⁴³Tama Aron aga ogomani dali augwaligo te tiwai belibo trausis munama, te augwali alta pąba te Tedali Gasagi Yai Be Habu tomoba pelama, te pris sę ebo sogo, ma gasa sogo te augwali eno ugwa be tomoba painogo te ugwa belibo trausis munama, asomainao. Ma, te tobage sę augwaligo me isąma, te augwali tigi olo eno bidibo madi asobaso da, teda augwali dwai sę yali homu eyu, te eno augwali ela muaibao. Sesemane bidada pabo sogo Aron me, aga wų dabe nosali pedalobo bage, augwaligo te bomo yai po wali pao,” Genuai Bidigo te po wai.

Pris dabe sa mubo kolesaga po wali

(Prs 8:1-36)

29 ¹Genuai Bidigo po ma weyu, te po wai, “Megi eno nagebolo nago te Aron dali, aga ogomani me, augwali te pris dabe pedalomainogo yabo sę po waibao. Te kibu bulmakau omai wai me deli badi, te sipsip omai si, te keni kenigo augwali tigi dolisiąwai dabe sao. ²Tama te witgo plaua hasia polali mu, te sao. Nago te plauade te yis me mugio. Tama te plaua meba selama, te bret nigibadi, tama te plaua meba selama, tama te ni oliv wel dali taluama, te bret nigao. Tama plaua meba selama, tama te bisket meba nigibadi elama, tama augwalide te oliv wel pilao. ³Tama te bret, me te bisket dabe te bonou wa me deliba munama, tama nago te bulmakau omai, me te sipsip omai si te ofa ilibo sogo te enabolo mao. ⁴Tama Aron dali, aga ogomani augwali dali, te eno lotu ugwa beba odasa aselama, augwali wę paluao. ⁵Nago augwali wę paluama silibo si, teda te pris ugwa dabe te Aronba muao. Holobo ugwa mubadi, tama bobage gudubo ugwa me muyu, tama dwasianu hagawiade mubo ugwa me te agabolo gudulama, tama te wiegi yai kukulugo agaba kęnao. ⁶Tama ugwa te aga tobolude bagulama, tama te po elalubo medal gol te nai sao, te Genuai Bidigo nai dao, tama te tobolude muani ugwade kęnao. ⁷Tama wel selama, te pris nigilali bidi dabe sa muabo wel, tama aga tobolude te wel gelama, aga te sęde sa muao. ⁸Nago Aron sa muna silibo si, teda agai ogomani odasa aselama, tama augwaliba te hobolo ugwa muao, ⁹tama augwali tabide te kukulu bagulama, tama augwali tobolude ugwa dage dabe kęnao. Nago tama tiwai sę te Aron

aga ogomani dali augwali te pris dabe nigiliyu, tama tia. Tama te bidi dabe augwali dali, te augwa wai ogomani nosali pedalubo bage, augwali hanigo naga te pris se sesemane sogo ela paibao,” wali.

¹⁰“Tama Moses nago te ofa yabo bulmakau te Deliba Sisinabo lotu ugwa be tu paɓa sela aselama, tama Aron dali, aga ogwa dabe dali, augwaligo nogo te bulmakau toboluba mumainao. ¹¹Tama eno gedude nago te bulmakau te ugwa be tu paɓe elagameo. ¹²Tama te bulmakau kaneme meba nago nogo danigo selama, tama te alta gaɗ dabeba muao. Tama te tigidali kaneme elalubadi te alta pagege gelao. ¹³Tialima, nosali te tabide ili tigidali sobadi, te wiegi yai homu, me te dwasianu dini homu si te ili dali elalubadi selama, tama te tigidali altade ulama, te enabolo ofa ebo tiwai ilao. ¹⁴Tiali goli, te bulmakau mi, me wali, me te di tabi tomode elalubo, te olo madi bulu badu siago domainogo ulao. Te bulmakau da, te augwaligo dwai se yali sela saɓo ofa yaibao.”

¹⁵“Tama nago te ofa yabo sipsip omai gomunai wai sao. Tama Aron dali, aga ogomani dali, augwaligo nogo te sipsip toboluba mumainao. ¹⁶Tialima, te sipsip elama, tama te kaneme selama, te alta me si me si bogo badu sayao. ¹⁷Tama nago te sipsip todogo pelama, tama te saɗa si weɗ telabadi, te haliga dabe me tilama, tama tigidali te sipsip tobolu daiba ugwaɗu manao. ¹⁸Tama tigidali te altaba munama, te ofa tiwai yao. Tama ena Genuai Bidi eno homu pemene wiegi yai te ofa elama, siago dabo denami ebo te eno homu pemene wiegi yai yaibao.”^d

¹⁹“Tama nago te si wali sipsip selama, tama Aron aga ogomani dali augwaligo nogo te sipsip tobolu daiba ugwaɗu mumainao,” Genuai Bidigo Mosesbolo te po wai. ²⁰“Tialima nago te sipsip kibu elama, tama aga te kaneme dwasianu selama, tama Aron aga ogomani dali augwaligo dolo olo sabi badu te kaneme muao, tama augwali te kaneme dolo a nogo danide mubadi, te dolo a saɗa dani badu muyu yao. Tama te poude munalubo kaneme tigidali te alta me si me si bogo badu saɗa pao. ²¹Nosali nago te altade munalubo kaneme meba, me te pris sa muabo wel sobadi elama, tama Aronba me agai gudali ugwaba segeni saɗayyu, tama aga ogomaniba me augwaligo gudali ugwaba segeni saɗayyu yao. Nago tama tiali da, teda Aron aga ogomani dali augwaligo gudali ugwa me, te tigidali augwali eno bage deli naga dao.”

²²“Tama nago te sipsip me togolama, tama te sipsip ili tigidali te pris bage augwali sa munama, tama ofa ilabo nai sao. Te nisali danu, me te haliga mesegelali delegabe ili, me te wiegi yai te sipsip kibu homu sobadi, te homu me si tede ili elalubo, tama dolo saɗa badu te tele mi, te me sao. ²³Tama te tudi badu augwaligo enabolo te bo disiɗwai yis meni yai bret ofa ilali nai, nago te deli deli haniani bret dabe sao, me deli augwaligo

^d 29:18 Ef 5:2; Fil 4:18

te oliv wel dali ulali, tama gasa augwaligo te oliv wel me te bisket dali me ulubeo. ²⁴Tialima, te kibu mi, me te bret te Aron aga ogomani dali augwalibolo menama, tama augwaligo te ofa ilibo sę eyu, te ena gedude augwaligo te nai dabe ugwaba sidu geyu yaibao. ²⁵Tama augwaligo nogode munalubo te nai selama, tama te alta daiba ugwadu munama, te ofa ebo dabo siago tigidali domainao. Tama ena Genuai Bidi, eno te ofa ebo denami wiegi yai ebo te eno godolo mu yaibao. ²⁶Tama nago te Aron te pris sęde sa mumainogo elali sipsip kibu aga bau te nago nogogo tulama, tama sela bilibo, te eno gedude tama tiao. Tama te kibu bau te naga tuagameo.”

²⁷“Tama dagego te pris sa muabo sogo pedalubode, dagego te kibu bau, me te sipsip sęa tele mi selama, nago te pris sa muyu, ofa iliyu, tama nogogo tulama, eno gedude sabilao. Tama nosali te mi te pris dabe augwalibolo mao. ²⁸Tigidali sogo Israel dabe augwaligo te kibu sipsip te ena dali deli homu pedelainu enabolo ofa mao, augwaligo te kibu bau, me te dolo sęa badu tele mi selama, tama te pris dabe augwalibolo mao. Te Israel dabe augwaligo te tiwai mabo ena Genuai Bidibolo momainao.”

²⁹“Te Aron isibo side da, teda augwaligo agai te pris sę yali ugwa dabe te aga ogomanibolo mao. Tama Aron aga hani bidi augwali te pris sę emainogo sa mubo sogo, te ugwa mumainogo yao. ³⁰Tama te Arongo ogwago te aga aya Arongo het pris sę yali tiwai selama bidainogo ebo sogo, agai te a naga olama nogo me badu si sogo usu nama, te ugwa mubo usu selama, te ugwa mumainao. Tama te a naga olama me si sogo aga eno te Deliba Sisinabo ugwa be obo tomoba pelama, tama te Tedali Gasagi Yai Be Habu tomoba peyu, te sę emainogo yao.”

³¹“Tama nago te Aron aga ogomani dali augwali te pris sę emainogo sa mubo sogo, nago te ofa ilali te sipsip mi selama, tama senede munama, tama te ugwa be obo bagulali tomode ulao. ³²Tama pris dabe augwaligo te mi dali, te bret me te basket wade munalubadi selama, tama eno Deliba Sisinabo Ugwa Be tude dulaluyu, tuao. ³³Augwaligo augwa dwai sę yali sela sęyu ofa ilali nai te augwa ma tumainogo yao, te augwali te pris bidi dabe da olama, sa mubo sogo te tiwai yao. Te pris dabe augwaligo naga te nai tuyu, tama te we bidi augwaligo te nai me tugobeo. Menio. Te augwalide habu mu selao, te tedali mu gasagi yai nai naga dao. ³⁴Tama te kibu mi me bret meba munalubadi te kigamuba sabalobaso da, teda te nai augwaligo me tugio. Te kibu mu habu selao, te tedali gasagi yai mu dao, tama augwaligo te siaba ulama, tama siago tigidali dela silimainao.”

³⁵“Nago te Aron aga ogomani dali augwali te pris sa mubo sę iliyu, tama eno nagebolo wali po gilama te a naga me te si sogo te sę dolo yao. ³⁶Tama tigidali sogo nago te bulmakau me deli selama, te dwai sę yali sęę sela sęyu, ofa ilao. Tama te ofa ebogo te eno alta te wiegi yai

eno gedude ilao. Tama te ni oliv wel te eno altaba sa muyu gelao, te eno nai naga dao. ³⁷Nago te altaba te tiwai se ilibo te 7 tama sogo te se yao. Tama te alta te eno nai mu da weyu, te eno habu mu selaibao. Tama bidi me deligo nogogo me d̄yau, ma magi nai me deligo te alta sai ugwadu daiba muyu da, te nai da, te tedali gasagi yai nai naga dao, te eno nai naga dao.”

Tigidali sogo ofa iduabo po wali
(*Nam 28:1-8*)

³⁸“Tigidali sogo dagego te kibu sipsip wai si te kibu be deli yai elalubadi, tama te altaba munama, ofa yao. ³⁹Tama sipsip me deli te kigamu ofa eyu, tama gasa sipsip me te pio mu ofa yao. ⁴⁰Tama te sege deli yai plaua te witgo nigai dali, te sege deli yai oliv wel dali begelama, te hasia sipsip me deli dali ofa ilao. Tama me, dagego te sege deli yai wain āi dali te ofa tiwai elama, te gelao. ⁴¹Tama dagego te gasa sipsip me deli te pio ofa yao. Te deli tigi poai plaua me, te oliv wel me, te wain āi me selama, tama te kigamu yali ofa tiwai gilama yao. Te tubo naigo ofa ebo dagego te nai ena Genuai Bidibolo mobao, tama te siago deyu, tama wiegi yai denami ebo te eno godolo ebo dao. ⁴²Te siago tigidali domainogo ulubo ofa te dagego sesemane sogo te ofa nosali yao, te eno Deliba Sisinabo Ugwa Be tu p̄ade tigidali sogo te ofa ebo, te eno sueibao. ⁴³Tama eno genuai ula te ugwa beba pedaliyu, tama te badu digi te eno bulu elaluyu, tama tedali gasagi yai bulu tama nigilaibao. Tede me ena te Israel we bidi dali deliba sisinaibao.”

⁴⁴“Tama tibaso, te Deliba Sisinabo Ugwa Bede alta si da, te eno nai da weyu, te eno sa muaibao. Tama eno te Aron aga ogomani dali augwali sa munama, augwali te pris se tiwai emainogo yaibao. ⁴⁵Tama ena dage Israel dabe tomode bidiyu, tama ena dagego God bidaibao. ⁴⁶Tama dagego ena bugagia koneama, ena Genuai Bidi da weyu, ena duga God dao, tama eno naga dage te Isip t̄de selama, tama eba odasa asai. Tama tiyu, ena dage tomode bidaibao. Ena digi, ena God, dagego Genuai Bidi dao,” te po wai.

Denami ebo pauda ulubo alta po wali
(*Sai 37:25-28*)

30 ¹Tama Godigo po ma weyu, te po wai, “Dagego te ni akas selama, tama alta me deli nigilama, te denami ilabo nai pauda ulubo alta tama nigao. ²Te alta bobage usu sabo te 45 sentamita, tama aga genuai te tiwai te 45 sentamita, tama te ugwadu usu sabo te 90 sentamita dao. Tama dagego te bulmakau gāu tiwai me si me si te alta dononama, ugwadu muabo te nai dulao. ³Tama te me si me si habu badu mesegelama, tama ugwadu me, tama aga gāude me, te wiegi yai golgo haluyu, tama bobage

golgo te alta bobegelama, obo tiwai nigiyu, keṅao. ⁴Tama te ni munama, te alta tolabo madi te alta me badu gaga nigiyu, me badu te gaga nigibadi yao. Tama te gaga nigali nai si te aiyadu te alta bobegelali gol paḍe dagego te sesegeḍe keṅao. ⁵Tama te ni akas dage si selama, te alta tolabo nai dulama, tama te nai si te golgo mesegelao. ⁶Tialima, te ugwa be tomode te genuai walobo ugwa ḍaj te bomo yai po dualali halobage, te ḍaj ugwa e badu te alta muao, te dwai se ebo seḡe sela saḡbo madi ugwadu paḍe, te halobage munalubo digio. Tama te seḡe sela saḡbo madi te eno dage sisinaibao.”

⁷“Te tigidali sogo kigamu Aron aselama, te lam sole sisi yagasaibao, tama te tiagasobo sogo agai te pusu wiegi yai ebo pauda meba te altaba denami elainogo ulao. ⁸Tama agai te tiwai naga te pio te lam sole domonagasu asobo sogo tiao. Dagego te ofa ena Genuai Bidibolo tigidali sogo nosali me te tiwai ofa elalua pao. ⁹Dagego te gasagi yai nai dabe te altade ofa igio. Te haniani denami ilibo pauda me te eno dagebolo habu selali nai, te kibu, me wit, me wain aḡ, te tama nai me e altade ofa igimio. ¹⁰Tigidali kibu bede deli sogo Arongo te alta wiegi yai ilibo te se eno gedude yao. Te tiwai se yainogo da, dagego te seḡe sela saḡu te ofa ilali kaneme me badu sobadi, tama te nigilali alta gaḡ dabeba muao. Dagego te tebo se te tigidali kibu bede yao. Tama tiyu, te alta te habu mu seliyu, tedali gasagi yai elaluaibao. Te Genuai Bidi eno nai naga da waibao.”

Genuai Bidigo lotu ugwa bede takis mone po

¹¹Nosali Genuai Bidigo po Mosesbolo weyu, te po wai, ¹²“Nago te Israel bidi nogi selama, tama te bukude aseḡo sogo, tigidali bidi deli deligo mone meba enabolo mao. Ma, meni baso da, teda genuai gasi dwai mu pedelama, te sogo augwali dolaibao. ¹³Tigidali bidi dabe augwali nogi sali bage, augwaligo te mone ge a naga te enabolo te ofa tiwai mao.^e ¹⁴Augwaligo te tigidali bidigo kibu be te 20de gagalama, te kibu be ugwaba holali bidi dabe nogi selama, tama tigidaligo te mone enabolo mao. ¹⁵Te mone bidigo te agai mone hauwa me menamuo, te magi nai meni yai bidigo te dwasianu mone me mayu me igio. Tigidaligo te mone ge a naga, te tama naga enabolo mao, te tama tiyu augwa yali seḡe abeleyu da, teda augwali me isigobeo. ¹⁶Te monego da, te eno lotu ugwa bede elalubo nai te dobaso da, te nai te monego gasa abelama, dodolabo mone dao. Te augwa bidibo ula abelabo mone eno te mone sulama, tama eno homu augwaliba muyu, tama augwali tonaluaibao.”

Te pou augwaligo te brasgo nigali po

¹⁷Tama Genuai Bidigo Mosesbolo te po wai, ¹⁸“Dagego te bras meba selama, tama te genuai pou me deli nigibadi, te pou muabo page me nigao.

^e 30:13 Sai 38:25-26; Mat 17:24

Tama te altade te ugwa be si tomode te t̄ba te pou munama, tama te poude te w̄e p̄aḡanao.^f ¹⁹Tama Aron aga ogomani dali augwali nogo saḡa te w̄e telamainogo yao. ²⁰Te augwali eno ugwa be tomoba painogo, me ma te altade te siago ulubo ofa dabe me yabo homu eyu da, teda augwaligo nogo saḡa bolo hasia aḡo tedelama, tama eno beba asobaso da, teda augwali me isigobeo. ²¹Mu tama, augwali isidali weyu, augwa nogo saḡa aḡo tedelao. Augwali dali, augwa nosali ame nabo wai dabe dali, augwaligo te bomai po sesemane sogo wali peyu, bidimainao,” wali. Te pris dabe sa mubo wel po wali

²²Tama Genuai Bidigo po Mosesbolo ma weyu, te po wai, ²³“Megi nago te wiegi wiegi yai denami ebo nai dabe sao. Hasia bolo te denami ebo nai sanda mea sao, te nai seḡe te 6 kilo te elalubao. Tama te sinamon pauda meba te wiegi yai denami elalubo, te aga te 3 kilo, tama te tobage wiegi yai denami ebo awi dili badi, te aga seḡe me te 3 kilo dao. ²⁴Tama te ni kasia waligo nigai pauda meba sao, te aga seḡe 6 kilo dao. Tama te oliv wel seḡe 4 lita elalubo te nai dabeba gelama, ²⁵tama te sanda nigibo se mu koneai bidigo ebo se tiwai eyu, te nai dabe bugagia taluama, te sanda tiwai pedelemainao. Te nai dabe da, te eno nai sa muabo nai elaluaibao.”

²⁶“Tama nago te wel dwasianu selama, tama eno dage dali Deliba Sisinabo Ugwa Beba dwasianu geliyu, te bomai po munalubo halobageba gelibadi, ²⁷tama te bret muabo tebol, me te tebolde munalubo nai dabeba me gelao, tama te lam dabe tolalubo nai, me aga nai dabeba badi, tama te denami ilibo altaba me gelao, ²⁸tama te tigidali siaba uluyu ofa ebo alta me, te aga nai dabeba dali, te w̄e paubo pou me, te aga pageba me, te tiwai naga yao. ²⁹Nago te nai dabe te eno tedali gasagi yai nai dabe mu da olama, tama te we bidi augwalibolo habu mu selao. Ma, bidi me deligo, me ma wego, me ma magi nai dabego te naiba d̄iya idali weyu, te me habu seliyu, gasagi yai tedali pedelama, tama te eno nai naga dao.”

³⁰“Tialima, nosali te wel selama, tama dwasianu te Aronba, me te aga ogomani, augwaliba gelama, tama augwali pris pedelama, tama eno se emainogo sa muao. ³¹Tama nago te Israel we bidi augwalibolo e tiwai po wao, ‘Dage dali, te duga hani nosali nosali pedalubo bage, dagego te wel selama, tama te dago Genuai Bidigo nai naga da olama, sa muao. ³²Dagego te wel te olo bidi dabeba geligimio. Tama dagego te deli tigi poai wel nigigio. Te Godigo tedali gasagi yai nai naga da weyu, tama dagebolo habu selibao. ³³Ma, te bidi me deligo te deli tigi poai wel nigilama, te pris meni yai olo bidi mebabolo te wel gelibaso da, teda te bidi aga te Godigo we bidi hani bidibo tomode me bidigobeo,’ te po pusao,” wali.

Denami ebo pauda po wali

³⁴Tialima, Genuai Bidigo Mosesbolo po ma weyu, te po wai, “Megi eno homugo dagego te wiegi yai denami yabo pauda meba nigiyao. Te pauda

te deli tigi poai dabe naga usu nama, elalumainao. Te pauda mea badi, te augwaligo te lalaigo nigai nai dabe badi, tama te bomai nai te galbanum pauda kanemego nigai me, te ni balsam kanemego nigali, te nai dabe tama sao. ³⁵Tama te nai dabe sesa pelama, tama te denami yabo nai pauda bugagia taluama nigao, te wiegi yai denami ilibo nai nigibo bidigo se ebo tiwai yao. Tama tamu dwasianu te pauda denami wiegi yai tedali gasagi yai ilimainogo, te tamu muao. ³⁶Te nai meba te pauda tiwai mu pedelemainogo, bugagia te nai me badu haluao, tama te ugwa be tomoba eno gedude sela pelama, tama te bomai po munalubo halobage pade muao, te ena dage dali deliba sisinabo madi. Te denami ebo nai pauda te tedali gasagi yai nai mu dao, te olo nai mu menio. ³⁷Tama dagego duga nai da, te homu elama, tama te tiwai nai munu me nigilamuo. Te Genuai Bidi eno nai naga dao, te tama homu naga yao. ³⁸Ma, bidi me deli aga homugo naga agai te denami ebo nai sanda tiwai me deli odainogo nigali da, teda te bidi aga te eno we bidi hani tomode me bidigobeo,” wali.⁸

Te ugwa bede mubo nai dabe nigibo koneai bidi po

(Sai 35:30–36:1)

31 ¹Tama Genuai Bidigo Mosesbolo e tiwai po wai, ²“Odao, eno te bidi Besalel sa muani, te Urigo ogwa, tama te Hurgo wago ogwa, te Juda hani bidi, ³⁻⁴tama agabolo eno homu kolesaga te bomo mawai. Tama eno agabolo te wiegi wiegi yai nai gol, me silva, me bras nigabo wiegi yai homu kolesaga mawai dao. ⁵Tama eno agabolo te gasagi yai bomai masigi dabe togolama te duliyu, tama te ni namede, me te nide, me haniani nai togolama dulumainogo te homu kolesaga mawai, tama te ugwa be au ilibo gasa tigidali haniani se emainogo yaibao. ⁶Tama me te Oholiap te eno sa muani, te Ahisamakgo ogwa, tama te Dango hani, tama aga te Besalel dali te se emainogo yaibao. Tama eno genuai wiegi yai homu kolesaga te gasa bidi dabe mebabolo menama, tama augwaligo eno te po weyu nigao wali nai nigimainogo te usu yaibao. ⁷Augwaligo te eno ugwa be se ebadi, te bomai po muabo halobage nigibadi, te aga paliabo nai da te sege sela sabo madi tiwai me, te tigidali ugwa bede muabo nai dabe nigagameo. ⁸Tama augwaligo te tebol sai dali, tebolde muabo aga doado bage dali nigibadi, tama te lam tolalubo nai dali, te nai aga doado bage, te me nigaibao. Augwaligo te lam sole tolalubo nai te wiegi yai golgo naga nigibadi yao, te aga dali elalubo nai dabe me. Tama augwaligo te denami ilibo alta me nigagameo. ⁹Tama augwaligo te siago tigidali domainogo te ofa eyu, te ulabo madi te alta nigiyu, tama aga doado bage me, tama te nogo saqa ai telayabo pou nigibadi, tama te pou muabo page me nigaibao. ¹⁰Tama augwaligo Aron aga ogomani dali

augwaligo gudabo ugwa te wiegi yai mu hobolama, nigagameo, te bage augwaligo te ugwa gudama pris sę yaibao. ¹¹ Tama augwaligo eno nai dabe sa muabo wel nigiyu, tama te Tedali Gasagi Yai Be Habu badu wiegi yai denami iliyu ulabo pauda nigaibao. Augwaligo te nai dabe te eno nagebolo wali po tiwai gilama tama te nai dabe nigimainao,” wali.

Toma tuyu olo bidibo side, te Sabat side da wali

¹²⁻¹³ Tialima, Genuai Bidigo Mosesbolo te po olama, te Israel we bidibolo te po omainogo yai, “Te Sabat side te olo bidiyu, toma nabo side dao, tama te Sabat side sesemane sogo dage eno po odolama, olo bidiyu, toma nao. Te Sabat side eno dagebolo te sa mubo tiwai megi mayu, tama nosali me tigidali sogo tama naga tiao. Tama tebo sę dagego konemainogo, te ena digi ena dagego Genuai Bidi dao, tama eno dage te tedali gasagi yai we bidi hani pedalomainogo ebo dao. ¹⁴ Te toma tubo side te Genuai Bidi eno side dao, tama tiyu, dage te sogo toma tuyu, olo bidao. Ma, bidi me deli aga te sogo sę yali da, agai te eno bomo yai po sela sębao, tama te bidi dagego aga ela muao. ¹⁵ Te tigidali Sarere dagego sę yabo side te 6, te tama side sę yao, tiali goli te dei 7, te me deli sogo da, te eno olo bidibo sogo, tama te olo bidiyu, toma nabo genuai side dao. Dagego te olo bidibo side sę ebo bidi dabe tigidali ela muao.^h ¹⁶ Dage Israel bage te sogo toma nao, magi baso meni, te polobadu te po daų wai elaluai, dagego po daų olama, te wali paibao wai dao. Tama tibaso, nosali dagego tama tidi pao. ¹⁷ Te side te po daų wabo tiwai elama, te ena tomode me te dage Israel bage dali te po sesemane sogo elalua paibao. Magi baso meni, ena Genuai Bidi eno te dagalu de tų si nigali, te 6 te tama sogo nigilama, tama te 7 wali, te me deli sogo eno te sę tigidali tagalama, tama ena toma tuyu, olo bidai dao.”ⁱ

¹⁸ Te Godigo po te Sainai bulu dude Moses dali wali sogo, agai te masigi name si te bomo yai po God aga digi nogogo aseai, te Mosesbolo mawai dao.

Augwaligo bulmakau wai te golgo nigali

(Bom 9:6-29)

32 ¹ Te Moses te Sainai bulu duba holama, tama bobage sogo bidali, tama aga gesege mu yali, tama aga polo me asobeo. Tama te we bidi augwali te Aron pageba sisinigi pelama, agabolo te po wai, “Te magi nai te bidi Mosesba pedelali, te dago konebeo, te bidigo da te Isipde selama, tama da odasa eba asai. Tama nago god me deli nigilama, tama pabodu polasa peyu, tama da tųdu odasa pomainogo yaibao.” Augwaligo te po wai.^j

^h 31:15 Sai 20:8-11; 23:12; 34:21; 35:2; Prs 23:3; Bom 5:12-14 ⁱ 31:17 Sai 20:11

^j 32:1 Tpi 7:40

²Tialima, Arongo augwalibolo te po wai, “Dagego duga we dabego olode walalubo gol, me duga wai dabego olode walalubo gol me sesa pelama, tama selasa aselama, enabolo magasao.” ³Arongo te po obaso, te we bidi dabe augwa olode walaluali gol dabe pepede pelama, tama sela aselama, agabolo magasai. ⁴Tama agai augwaligo te olode au yali gol dabe selama, tama ulama, tama te ą̄ tiwai pedelai. Tama agai te t̄ode dedage me deli augwaligo te bulmakau noma tiwai nigilama, tama te ą̄ tiwai pedelai gol teba gelama, tama te bulmakau tiwai pedelai. Tama agai hw̄ ge selama, te golgo nigai bulmakau noma bugagia dodolai. Tama nosali te we bidi augwaligo te po wai, “Odią̄! Te nai aga da Israel bagego god dao. Agai da Isipde selama, tama da odasa eba asai dao,” wali.^k

⁵Arongo te tebo sulama, tama agai te bulmakau p̄ade te alta sai me deli nigai. Tama agai te po wai, “Do da, dago Genuai Bidibolo genuai nogi mayu, genuai nai tueibao.” ⁶Tialima, te sogo nosali kigamu mu, te we bidi dabe augwaligo te ofa eyu, te siaba ulabo kibu bulmakau dabe sela asali. Tama augwaligo homu kolesaga deliba naga muainogo te ofa yabo kibu sipsip dabe me sela asai. Tama augwaligo te nai tuyu, te bomai w̄e tuyu elama, tama nosali te bidi dabe augwali pelama, te we dabe dali gagali igi pai.^l

⁷Tama Genuai Bidigo Mosesbolo te po wai, “Nage polo e bulu dude bidali tagalama, aba dulao. Te naga Isipde odasa asali we bidi dabe augwaligo dwai kolesaga hauwa megi ebao. ⁸Tama eno po weyu, augwalibolo te wali pao wali t̄u polo geda munama, tama augwaligo te bulmakau wai te golgo nigilama, tama agabolo lotu po weyu, tama agabolo ofa ilibao. Tama augwaligo te po wai, ‘Odao,’ wali, ‘te aga dago god dao. Agai da Isipde selama, odasa asai dao.’ Te po megi obao. ⁹Tama ena God eno te we bidi augwali eno koneanio. Augwali da, te hagoma mu ebo we bidi dao. ¹⁰Te eno augwali dali s̄eḅe mu elama, tama eno augwali mu dolaibao. Tama nago ena me togolamuo, mu menio. Tama nosali eno nage me, te naga hani ogomani dali, augwaligo te Israel bage hasegelama, tama genuai we bidi hani mu pedelaibao.” Te po wai.

¹¹Tiali goli, Mosesgo te Genuai Bidigo homu bea sainu, agai bomonama gedu haluasa po aga Genuai Bidi Godibolo e tiwai po wai, “Genuai Bidio, tiyu nago s̄eḅeḅe naga we bidi augwali dolomainogo sula tagalamuo. Nago te we bidi augwali te Isipde te nago naga genuai bomogo digi te augwali selama, odasa asai dao. ¹²Ma, nago te tiwai kolesaga augwalibolo ebaso da, teda te Isip dabego te po waibao, ‘Godigo aga we bidi augwali dali dwai homu yai. Tama tibaso, augwali agai te Isipde selama, tama augwali odasa asali, te augwali te bulu dude mu dola silama, tama tigidali ela

^k 32:4 Tpi 7:41 ^l 32:6 1 Ko 10:7

muani da,' te po wabuo. Tiali goli, Genuai Bidi, tagalao. Tama nago te seḅe yali homu te nago tagalama, tama nago homu kolesaga hasegelama, tama te we bidi augwali nago me dolamu dao." Mosesgo te po wai.

¹³"Nago naga seḅe bidi Abraham, me Aisak, me Jekop, te homugo koneao. Tama nago te bomo yai po augwali dali daḅ wali po, te homude koneao. Nago bomo yai po daḅ mu weyu, e tiwai po wai, 'Eno mu po obao, eno te dagego waḅ nḅu dabe te dagebolo hauwa mu, te hḅ tiwai dageba mawaibao. Tama eno po daḅ weyu, te eno dagebolo mawaiba wali te tḅ, teda te tḅ te eno duga waḅ nḅu dabe augwaliba mawaibao. Tama augwali sesemane sogo mu te tḅde bidada paibao,' nago te po wai."^m ¹⁴Tama Mosesgo te tiwai gedu haluasa po obaso, tama Genuai Bidi aga homu ma hasegelama, tama aga te we bidi dolainu yali nai te aga we bidiba me tagala palobeo."ⁿ

¹⁵Tialima, Moses te bulu dude bidali tagalama, tama aba duliyu, te Godigo bomo yai po aseḅani te masigi pedai si sela dulai. Godigo po te masigi si te si dali si badu te po aseḅai dao. ¹⁶Godigo digi te masigi si nigilama, tama te masigi side te bomo yai po aseḅani, te bugagia ma dodolama todogo pai.

¹⁷Tama Josua te Sainai bulu dude a badu gana Moses asobo tonaluyu bidali. Tama Moses teba dulama, tama augwali si aba pidubadi, tama Josua agai te we bidi dabe augwaligo te i wabo po daga agai odai. Tama agai Mosesbolo e tiwai po wai, "Ae, Moses! Eno te we bidi bidibo madi te waḅi hwḅyu kulukulu wabo odalio."

¹⁸Tiali goli, Mosesgo te po wai, "Menio. Te bidigo waḅi hwḅbo te aiyaba elaluyu, i wabo te tiwai me ebeo. Ma, te waḅi hwḅbode te bidi dabe aiyaba elalubaso, te gela wabo tiwai menio. Eno te teḅaḅi wabo dogoni naga odobao," wali.

¹⁹Tama Moses te we bidi bidibo pesage paḅa sabolama suali, te bulmakau gol, me te we bidi augwali teḅaḅi idubo suali, tialima tama aga seḅe mu yai. Tama agai te tolasa asali te masigi si, agai te bulu du pageba saḅama, tama te masigi si pepeda pai. ²⁰Tama Mosesgo augwaligo te nigali bulmakau selama, tama siaba ulai. Tama te gol aḅ tiwai pedelama, tama nosali kedau elama, dila saide, agai te hamago haluama, te olo pauda tiwai pedelai. Tama agai te pauda gol te pabo aḅba saḅwai. Tama saḅa bila silama, tama Mosesgo te tiwai ilama, te Israel dabe augwaligo te aḅ tumainogo yalio. ²¹Tama agai Aronbolo te po hanalu wai, "Te e we we bidi augwaligo magi seḅ nagebolo ebaso, tama nago augwaligo te dwai kolesaga mu emainogo sula tagalaliwe?"

²²Tialima, Arongo po wei ponoyu, te po wai, "Genuai bidio, nago ena dali seḅe igio. Nago te we bidi hani augwaligo ebo kolesaga koneai dao.

Augwaligo dwai kolesaga yainogo bomu mu ebo dao. ²³Tama augwaligo enabolo e tiwai po wai, ‘Dago te bidi Mosesba magi nai pedelali, te dago konebeo, te bidigo da Isipde selama, tama da eba odasa asai. Tama da te pabo tude polasa pabo god me deli nago nigao.’ ²⁴Eno odolama, tama eno te gol olode elalubo we bidibolo te po olama, tama augwaligo te gol pedelama, enabolo mao wai. Tialima, augwaligo enabolo mawai, tama eno te gol te siaba ulalio. Tama polo te bulmakau wai aga digi odolali pedelalio,” Arongo te po wai.

²⁵Mosesgo koneani, te we bidi augwaligo dwai kolesaga subigila emainogo yali, tama Arongo augwali daw wabo usu ebeo, te homu yali. Tama agai te homu yai, tiyu augwa boi bidi dabego augwali sulama, tama posobo po me gisugu maidali, te homu yai. ²⁶Tama tibaso, Moses pelama, te obo tuba doligi pelama, tama te tiwai i wai, “Te mena bidigo te Genuai Bidi wali paiba wida, teda te bage te ena bidibo madi asao.” Tialima, te Livai hani bidi tigidali augwali aselama, aga paba dolagasai.

²⁷Tama agai augwalibolo te po wai, “God, te da Israel bagego Genuai Bidigo te po wai, ‘Dage tigidaligo te bobage ge hwa selama, tama te u bidi dabe bidibo madi te pesageba pelama, tama te tibo god wali pabo bidi dabe ela muao, te ama, me te abagi dabe, te dage dali pade bidibo bage, te dao,” wali. ²⁸Tama te Livai dabe augwaligo te Mosesgo wali po selama, te tiwai se yai. Tama te sogo naga augwaligo te bidi sese umabo bidi dabe, 3,000 mu ela muai dao. ²⁹Tama Mosesgo te Livai dabe augwalibolo te po wai, “Megi dagego te bidi dabe augwali ela muani, te wai dabe me, te duga ama dede dabe, augwali meba da, te duga wai dabe, ama dede dabe, tiali digi augwaligo dwai se ebaso, dagego augwali ela muani. Tama dagego te kolesaga yaligo naga, dage te Genuai Bidigo pris dabe tau sabo bage pedelaibao. Tama tiyu, megie Genuai Bidigo wiegi yai se dagebolo ilaibao,” wali.

³⁰Tama nosali sogo Mosesgo te we bidi augwalibolo te po wai, “Dagego te yali sege, te Genuai Bidi bidibo madi te bulu duba ma holama, tama eno agabolo te dagego sege sela sagowe naga, te eno agabolo hanalua sueibao,” wali. ³¹Tialima, Moses te bulu duba ugwa holama, tama Genuai Bidibolo te tiwai po wai, “Homu dene mu ebaso. Te e we bidi augwaligo te genuai sege sabo se mu yalio. Augwaligo te tibo god me deli nigilama, tama augwaligo lotu po agaba wai dao. ³²Tiali goli, megie eno nagebolo hanalu obao, te nago homugo augwaligo sege sela sayabo homu ebaso da, teda nago augwaligo sege sela sayao. Ma, nago hagela homu ebaso da, teda eno nagebolo te po hanalu waibao, te nago naga we bidi augwali nogi aseai elalubo bukude te eno nogi aseai elalubo, te deli naga te sela sayagameo.” Te po wai.^o

³³Tiali goli, Genuai Bidigo Mosesbolo te po wai, “Menio. Eno te dwai se yali we bidi augwaligo nogi naga te eno sela sawaibao. ³⁴Tialima, megie nage pelama, tama te we bidi augwali selama, tama eno nagebolo te po wali te buluba pao. Odao, eno Ensel Mobo Bidigo dage te pabo tudu odasa paibao. Tiali goli, nosali da, te dene mabo sogo ena asiyu, tama te dwai se yali we bidi augwali eno dene mu ilaibao,” Genuai Bidigo te po wai.

³⁵Tialima, Genuai Bidigo nosali genuai gasi dwai me deli te bidi dabego dwai se yali wei ponoyu, tama te gasi augwaliba tagala palai. Magi baso meni, augwaligo po bombo yai Aronbolo olama, tama agai te bulmakau wai te golgo nigai dao.

Genuai Bidigo te Israel dabebolo po weyu, te Sainai bulu du taga pao po wai

33 ¹Megi da, Genuai Bidigo Mosesbolo e tiwai po wai, “Nage dali, te nago Isipde odasa asali we bidi me, dagego e bulu taga peyu, tama eno dagebolo po daq weyu, dagebolo te mawaibao wali, te buluba piao. Polobadu eno Abrahambolo, me Aisak dali, me Jekop dali, te tiwai po wai, ‘Tama eno te to te duga hani wai nuq dabe augwalibolo mawaibao,’ wai dao.” ²Tama eno ensel mobo bidi me deli te dage pabo madi polasa tagalama, tama eno te Kenan hani, me Amor, me Hit, me Peres, me Hivi, me Jebus, te hani augwali eno sela sagi paibao. ³Tama dage te wiegi wiegi yai haniani nai holobo madi, te ili elalubo wiegi yai toba bidigi paibao. Tiali goli, ena digi te ena dage dali me pogobeo, magi baso meni, te dage hagoma ebo we bidi dabe dao. Tiyu, te ena dage dali peyu da, te dage eno te tude dolabuo,” wali.

⁴Tama Mosesgo te we bidi augwalibolo te Genuai Bidigo te bomai po mobaso, tama augwaligo homu sege elama, tama augwaligo te wiegi yai au te tigide me mubeo. ⁵Tama Genuai Bidigo po Mosesgo te Israel we bidi augwalibolo omainogo te po wai, “Dage te hagoma ebo we bidi dabe mu dao. Te ena dage dali pobaso da, teda eno dage dolabuo. Te ena dage dali pewadage sogo naga bidagasali goli, te eno dage tigidali dolabuo. Tialima, odiao, te dagego tigide elalubo ring gol te nai dabe tigidali peda sawai madi, tama eno mena tiwai kolesaga dagebolo yabo te eno homugo bugagia konemainogo yaibao.” Te po wai. ⁶Tama augwaligo te Sainai bulu du taga pabo sogo, augwaligo te tigide muani te au dobage te me mubeo.

Godigo ugwa be po

⁷Tigidali sogo te Israel dabe augwali pelama, te bidigi pabo madi, tama augwa ugwa be se eyu yai, tama Mosesgo me ugwa be me deli selama, tama

augwaligo te be se ebo pesage te bulu badu te dwasianu digibulu gana te ugwa be se eyu yai. Tama agai te ugwa be nogi te tiwai nogi poai, te God Dali Sisinibo Ugwa Be da wai. Tama dego te Genuai Bidigo homu kolesaga te koneainogo da, teda aga te ugwa beba paibao. ⁸Tama Moses te ugwa beba pabo sogo da, te tigidali we bidi augwa ugwa bede bidiyu, tama augwali hodaluama, tama augwa ugwa be tude dolaluyu, tama Moses te ugwa be tomoba pabo suai dao. ⁹Tama Moses te ugwa be tomoba pai madigi, tama te po aselama, te ugwa be tu pa ba dolagasai. Tama Genuai Bidi te po tomode bidiyu, tama Moses dali po mian dao. ¹⁰Tama te Israel we bidi augwali te augwa ugwa be tude dolaluyu, tama te po te ugwa be pa de bidibaso da, teda augwali tobolu basi gulama, tama lotu po Godibolo wai dao. ¹¹Tama Genuai Bidigo Moses dali po miani, te bidigo aga abagi dali po mibo tiwai gilama yai. Augwa si te po ola silama, tama Moses aga te bidibo pesageba ma asiyu yai. Tiali goli, Mosesgo se ebo ogwa bidi, te Josua, te Nungo ogwa, aga te tomode me bididuai. Agai te Sisinibo Ugwa Be munu me taga pisawai dao.

Genuai Bidigo da wai po

¹²Mosesgo e tiwai po Genuai Bidibolo wai, “Nago enabolo te e we bidi augwali te augwa tba odaya pao, te po wai. Tiali goli, nago enabolo te mena bidigo ena tau somainu yabo bidi te ena dali me pao wabo po, te nago me wabeo. Tama nago te po wai, ‘Eno nage bugagia koneani, tama nage eno godolo ebo da,’ wai. ¹³Tama nago ena godolo eba wida, teda eno homugo nago enabolo te nago homu kolesaga ola menama, tama eno nage bugagia konemainu, tama sesemane sogo eno te nago godolo yabo kolesaga naga yaibao. Tama eno homugo me te naga digi sa muani we bidi te nago homugo ma konemainogo, te homu eno ebo dao.”

¹⁴Tama Genuai Bidigo te po wai, “Ena digi nage dali hodobo peyu, tama nagebolo wiegi yai homu nagame ebo kolesaga mawaibao.”

¹⁵Tialima, Mosesgo Genuai Bidibolo te po ma wai, “Te naga digi te da dali pisawani da, teda nago da ede bidali te taga pomainogo te me tigio. ¹⁶Ma, nage da dali pisawani da, te gasa bidi hani augwaligo mena tama te nago ena me, te naga we bidi dabe dali, godolo ebo te koneaibawe? Tiali goli, nage da dali pobaso da, teda te gasa bidi hani augwaligo koneama, te da we bidi te gasa we bidi hani tigidali tiwai meni, da te gasagi yai bage mu da waibao,” wali.

¹⁷Tialima, Genuai Bidigo Mosesbolo te po wai, “Eno te nago wali po selama, te se yaibao. Magi baso meni, eno nage godolo eyu, tama eno nage bugagia koneai dao.”

¹⁸Tama Mosesgo Genuai Bidibolo e tiwai po wai, “Eno homugo nago genuai ula ebo gesabi enabolo waselao.”

¹⁹Tama Genuai Bidigo Mosesbolo po wei ponoyu, te po wai, “Eno nagebolo te eno wiegi yai ula tigidali ola mawaibao. Tama eno nogi

nagebolo pusuyu, eno e tiwai po waibao, 'Ena Genuai Bidi dao.' Odao, te eno olo tau siyu mabo wiegi yai kolesaga eyu, tama eno bidi me delide homu dene eyu, tau sobaso da, teda eno te se eyu naga ebo dao.⁹ ²⁰Tiali goli, nago ena gesabi me sugobeo, magi baso meni, te bidi me deligo eno gesabi subaso da, teda aga isaibao. ²¹Suao, te genuai masigi me dedeli ena pađe elalubao. Tama nage te masigi daiba ugwadu dolugulao. ²²Tama eno gesabigo genuai ula te nage pađa asobo side, eno nage te masigi dudulawi me deli tomoba munama, tama nage eno nogogo mesegelama elalubadi, ena ela soaibao. ²³Tama nosali eno dagala saḡbosi, tama nago ena tudi badu naga sumainogo yaibao. Tiali goli, nago ena gesabi me sulamuo," te po wai.

Mosesgo bomai po si sogo ma sali

(Bom 10:1-5)

34 ¹Nosali Genuai Bidigo po Mosesbolo weyu, te po wai, "Nago te masigi dage si togolama, tama bugagia dodolama, tama nago te saḡnama toga pali masigi sawali, te tiwai si ma emainao. Tama eno te hasia polobadu togolama aseani tiwai po naga ma aseaiabao. ²Tama nago te masigi si dodola munama, tama do kigamu nage te bulu duba holama, tama ena dali da si deliba sisinaibao. ³Te bidi me deli nage dali me asomainogo menio. Eno homugo te gasa bidi te e bulu duba asela bidagasobo, te eno homu hagela ebo. Tigidali aiyade naga bidalumainao. Tama te sipsip bulmakau dabe me te bulu du pađa aselama, te nosa dabe munu me tuagaselamu dao."

⁴Tialima, tama Mosesgo te masigi pedai si te polasa togali te tiwai elama, tama agai te masigi sawali si te Sainai bulu duba kigamu digi mu tolasa holali, te Genuai Bidigo agabolo wali po selama, tama tiwai se yai dao. ⁵Tama Genuai Bidi te po tomode bidama, tama dulama, tama Moses dali te bulu duba ugwadu dolagaselama, tama aga digi, aga Genuai Bidi nogi page po pusagasai. ⁶Tama aga te Moses pađa pelama ela soali, tama i weyu, te po wai, "Ena Genuai Bidi, ena Genuai Bidi dao. Ena God, tama ena te olo tau siyu mabo wiegi yai kolesaga badi, te homu dene ebo page bidi dao. Tama eno seḡḡ polo me egobeo. Eno tigidali we bidi godolo mu elama, tama eno ena wali po tigidali wali pabo dao. ⁷Te eno we bidi hani hauwa godolo iduyu, tama te eno po daḡ wali tiwai gilama, tama eno augwaligo hagoma ebo haniani dwai kolesaga te sela saḡbo dao. Tiali goli, te dwai se ebo bidi dabebolo eno dene ilaibao. Tama eno augwaligo wai dabebolo me, tama augwaligo nosali pedalobo waḡi te wai dabebolo me, tama te sela, me te me si me si haniba te tiwai dene mabo se naga augwaliba pedelaibao," wali.^r

⁹ 33:19 Rom 9:15 ^r 34:7 Sai 20:5-6; Nam 14:18; Bom 5:9-10; 7:9-10

⁸Tama Godigo po ola silibo si, tama polo Moses te t̄ɔba degasa dulama, tama Godibolo lotu po wai dao. ⁹Tama Mosesgo te po wai, “Genuai Bidi, nago ena godolo mu ebo da wida, teda eno homugo nage da dali pomainogo homu ebao. Te mu tama, te e we bidi augwaligo hagoma eyu, dwai kolesaga ebo dao, tiali goli eno homugo te dago tigidali dwai kolesaga ebo me, tama dago s̄eḡe me, te sela s̄anama, tama da selama, tama naga we bidi tiwai mu bidimainogo te homu eno ebo dao,” Mosesgo te po wai.

Godigo te we bidi augwali dali te po ɗaɗ ma wali po
(*Sai 23:14-19; Bom 7:1-5; 16:1-17*)

¹⁰Tama Genuai Bidigo Mosesbolo te po wai, “Megi eno bomai po ɗaɗ dage Israel dabe dali yainogo ebao. Te nago we bidi augwali gedude te eno genuai bomai s̄e te eno gasa tigidali we bidi hani dali polobadu me is̄awai te s̄e yaibao. Tama tigidali gasa we bidigo te ena Genuai Bidigo dage eno tau siyu, haniani s̄e ebo te augwaligo sulama, tama augwali homu hauwa elama, tama noma saibao. ¹¹Tama meg i eno dagebolo te mawainogo ebo bomai po tigidali te dagego odoyu, wali pīaɔ. Ena te dage pabo madi te ena polasa pelama, tama eno te Amor dabe badi, te Kenan dabe me, te Hit dabe me, te Peres dabe me, te Hivi dabe badi, te Jebus, te hani dabe augwali eno sela s̄aḡi paibao. ¹²Tama dua bugagia, te dagego meg i painogo ebo te bulu t̄ɔde bidibo bidi dabe dali te abagi nami bidabo bomai po munu me ɗaɗ wagimio. Tiyu, augwaligo ebo kolesagaba dage kekelama, tama dage tulaluama, tama dage tigidali dolabuo. ¹³Menio. Dagego augwaligo te lotu wabo nai dabe dolao. Te alta dabe, me te pos masigi dabe te pepedelama, tama augwaligo tibo god we Asera piksa te ni dagede elalubo, te togolama s̄ayao.”^s

¹⁴“Ena Genuai Bidi, tama dagego ena deliba naga lotu po wao. Dagego te tibo godiba lotu po me wagimio. Magi baso meni, te tibo god me deligo ena bidibo hasegelainogo ebaso, te eno aga me gogologobeo. Tede ena s̄eḡe mu yaibao. ¹⁵Dagego te bulu t̄ɔde bidibo bage augwali dali te abagi nami bidabo bomai po ɗaɗ munu me olamuo. Augwaligo te tibo godiba lotu wabo dao. Tama dagego augwali dali te bomai po ɗaɗ obaso da, teda augwaligo dagebolo te augwali dali deliba sisinabo po hanaluama, tama dagego te augwaligo tibo godiba ofa ilali te kibu me te nai dabe tuaibao. ¹⁶Tama tiyu, dage Israel gesi bidi dabego te gasa hani gesi weg i mani sabuo. Te dagego tama tiali da, teda te we dabego te augwa bidi kekelama, tama te bidi dabe augwaligo ena tagalama, tama te tibo god dabeba lotu waibao. Te eno gedude te kolesaga te penani ela bilibo kolesaga tiwai yaibao.”

^s 34:13 Bom 16:21

17“Dagego te tibo god dabe te aingo nigilama, tama augwaliba lotu po me wagimio. Te habu mu dao.”

18“Dagego te Bo Disiqwai Nai Bret te tubo sogo te genuai side te homugo me gegeda pigimio. Dagego polua Abipde te Isip taga soali, tama tigidalu kibu bede dagego te yis meni yai bret te poluade, te a naga olama nogo me badu si, te tama sogo naga tuyu, te eno dagebolo polobadu wali gilama tama tiao.”^t

19“Te dagego tigidalu gomunai ogwa, me te dagego bulmakau sipsip dabe te gomunai wai omai dabe me, te enabolo naga mao.”^u 20Tiali goli, dagego homugo te duga te bidi duabo donki kibu gomunai wai ma abela homu ebaso da, teda duga sipsip wai me deli selama, te donki hasegelama, tama sipsip wai ofa yao. Tama dagego ma abelesiqwani da, teda dagego te donki mage togwao. Tama me te duga gomunai ogwa tigidalu te ma abelao.”

“Te dagego enaba lotu po wagasabo homu ebaso da, te dagego ofa yabo nai deli digi sela asao, olo asigio.”^v

21“Tama tigidalu Sarere te dagego se yabo side te a naga olama nogo kibisa, te tama sogo naga se yabo sogo te elalubao, tiali goli te 7 wali, te me deli sogo te se me egio, te habu selai. Te gide to elabo sogo, ma te nai inayu tau yai nai sisinibo sogo elalubaso da, dagego te olo bidibo side te se me igimio.”^w

22“Dagego homu wiegi yai pemene te genuai side te inawai nai siyu, te wiegi yai homu pemene yali side te dagego homu koneama, te side te wit hasia inawai te sali side dao. Tama me te poluade te ni du inayu tau yai sali side, dage te dwasianu tolu yabe dabe bede genuai sogo bidali side, te dagego homugo ma koneao.”^x 23Tama deli kibu bede sela sogo, dage bidi tigidalu ena Tigidalu Nai Tonalubo God bidibo madi aselama, lotu po wagasao, te duga Israel duga Genuai Bidi dao. 24Nosali da, eno dagego tode megi te bidibo we bidi hani augwali sela sanama, tama dagego to dai genuai ilaibao. Tama dagego enabolo lotu wagasobo sogo, te tigidalu kibu bede sela sogo naga te lotu po weyu, tama dagego tama tibadi, te boi bidigo dagego to sainogo homu me egobeo.”

25“Dagego te kibu sipsip, meme, bulmakau dabe te enabolo ofa ilibo sogo, dagego te yis elalubo bret te dali te enabolo ofa me elamuo. Tama dagego te Godigo dage Ela Soali Side te bodolu koneama, tama dagego te ofa eyu elali sipsip mi tigidalu te dagego me tula silisabaso da, teda dagego te nai dage dabe te kigamu tuaiba homu elama me mugimio.”^y

^t 34:18 Sai 12:14-20; Prs 23:6-8; Nam 28:16-25 ^u 34:19 Sai 13:2 ^v 34:20 Sai 13:13

^w 34:21 Sai 20:9-10; 23:12; 31:15; 35:2; Prs 23:3; Bom 5:13-14 ^x 34:22 Prs 23:15-21, 39-43; Nam 28:26-31 ^y 34:25 Sai 12:10

26 “Te tigidali kibu bede dagego gide te polasa ina yani wiegi yai nai te Genuai Bidi eno beba sela asao.”^z

“Dagego te kibu meme ame pe te seneba peḡenama, tama te meme digi wai te aḡo me ulainogo me igimio.”

27 Tama Genuai Bidigo Mosesbolo e tiwai po wai, “Nago te po dabe te buku me delide aḡao, magi baso meni, te tigidali po nage dali, me te Israel dabe augwali dali, te po daḡ wali page e dao.”²⁸ Tama Moses te Genuai Bidi dali te bulu dude te bidi sese si, 40 sogo bidai. Tama agai nai deli me, aḡ me, te me tubeo. Mu menio. Tama Genuai Bidigo te bomai po te Mosesgo te sela holali masigi side aḡai. Te po te Godigo bomo yai nogo si po dabe dao.

Mosesgo gesabi ula mu yai

29 Tama Mosesgo te bulu du tagalama dulali sogo, agai te bomai po elalubo masigi si me te sela dulali. Agai te Genuai Bidi dali po mianigo, tama Mosesgo gesabi ula mu yai. Tiali goli, aga digi te tiwai ula yali, te agai me konebeo. 30 Aron dali te we bidi augwaligo te Moses gesabi ula yai sulama, tama augwali wi elama, tama augwali aga paḡa me pai menio. 31 Tiali goli, Mosesgo augwali i obaso, tama Aron dali, te Israel tobolu bidi dabe dali, augwali aga pageba pelama, tama Mosesgo augwali dali po wai dao. 32 Tama nosali, te gasa Israel bage meba tigidali te aga paḡa pelama, tama Mosesgo augwali tigidalibolo dali te Genuai Bidigo agabolo te Sainai bulu dude mani bomai po, te augwali tigidaliba te po wai dao. 33 Mosesgo te po augwalibolo ola silibo si, teda aga te ugwa pedai selama, tama aga gesabi geme duala siyu yai dao. 34 Tiali goli, Moses te lotu ugwa be tomoba te Genuai Bidi dali po miainogo pabo sogo, agai te gesabi dualaluali te ugwa pedai sela ṣanama, tama buluba ma asiyu, te gesabi halusiḡama asai. Aga te bedu buluba asobo si da, teda te we bidi augwalibolo te Genuai Bidigo agabolo wali po tigidali te augwalibolo wai dao. 35 Tama te we bidi augwaligo te Moses gesabi ula ebo suai. Mosesgo augwalibolo te po ola silibo si da, teda aga gesabi ma haluama, tama aga te Genuai Bidi dali po ma migi painogo ebo sogo da, agai te ugwa pedai ma sela ṣanama, te Genuai Bidi dali po migi pabo dao.^a

Te olo bidiyu toma nabo side te bomo yai po dabe po

35 ¹ Mosesgo te tigidali Israel we bidi i olama, asobode augwalibolo e tiwai po wai, “Genuai Bidigo te po wali, dagego te e bomai po wali piḡo, te po wai dao. ² Te Sarere dagego seḡ yabo side te 6 sogo te seḡ yabo side te elalubao. Tiali goli, te 7 wali, te me deli sogo te olo bidiyu,

^z 34:26 Bom 24:21; 26:2 ^a 34:35 2 Ko 3:7-16

toma naga niào, tama te se idali weyu, habu mu selao, magi baso meni, te Genuai Bidigo side dolo dao. Te side te bidigo, ma te wego, te se ebaso da, teda dagego aga ela muao.^b ³Te dwasianu se dagego bede te sia udulabo se elalubaso, te me habu selai dao, te olo bidiyu toma nabo side dao.” Te po wai.

Te we bidi dabego nai dabe te ugwa beba Godibolo mani

⁴⁻⁵Nosali Mosesgo te Israel dabe augwalibolo e tiwai po wai, “Genuai Bidigo te po wai, megi dagego nai meba agabolo mao. Te agabolo nai mawainogo ebo we bidi, augwaligo e tiwai nai dabe sela asomainogo yao, te gol, me silva, me bras, ⁶tama te gasa au wiegi yai name ugwa badi, te sisi yai, me te mama yai sipsip nisi, tama te augwaligo te meme nisigo nigai ugwa badi, tama te nai dabe sela asa wai. ⁷Tama augwaligo te omai sipsip wali te mama pengo pilai, te sela asomainao. Tama augwaligo te wiegi yai hasa nogi sikau wali, te tamu aïde elalubo, te wali me, te ni akas dage dabe, te sela asobadi, ⁸tama te lam wel me, te wel dali taluabo denami ebo haniani nai me sela asiào. Te taluali wel da, te Godigo nai dabe sa mubo wel dao. Tama wiegi yai denami ebo pauda, te denami ilabo nai dao, te me sela asomainogo yao. ⁹Tama augwaligo te wiegi yai masigi meba sela asiyu, te ugwa aulubo nai, tama te het pris bidi hagawiade muabo dwasianu masigi muai ugwa dage, teba muabo masigi dabe, te me sela asomainogo yao,” Mosesgo Genuai Bidigo po tama pusali.

Te ugwa be te nai dabe po

¹⁰“Dage tomode te nai dabe nigibo koneai bidi dabe augwali bidibo, tama te bage aselama, te Genuai Bidigo dagebolo niga wali nai dabe tigidali nigao. ¹¹Tama te ugwa be se badi, tama te haluabo nai dabe me nigiyu, tama te bisigi dabe te obo ni dili me, te obo eyu te pipili pabo ni dabe me, te tigi ni pos bras dali, te pos page daq walabo halobage, te nai dabe nigao. ¹²Tama augwaligo te bomai po muabo halobage nigibadi, tama augwaligo te halobage tolabo ni togobadi, tama augwaligo te gol selama, te sege sela sayabo madi te pesage nigiyu, tama augwaligo te bomai po muani halobage haluabo name ugwa nigibadi yao. ¹³Tama augwaligo te tebol nigiyu, te aga tede muabo nai dabe me nigibadi, tama te tebol tolabo ni dulubadi, tama augwaligo te God gedude te tebolde muabo bret me niga po wai. ¹⁴Tama augwaligo te lam muabo nai, me te aga nai dabe dali nigao. Tama augwaligo te ula yabo lam dabe me, te wel me nigao.”

¹⁵“Tama augwaligo te denami ebo nai pauda ulabo alta nigiyu, tama te alta tolabo ni me togwao. Tama augwaligo te Genuai Bidigo nai da

^b 35:2 Sai 20:8-11; 23:12; 31:15; 34:21; Prs 23:3; Bom 5:12-14

olama, te sa muabo wel me nigiyu, tama wiegi yai denami yabo pauda me nigao. Tama te ugwa be tude walabo name ugwa me nigao. ¹⁶Tama augwaligo te ofa yabo te alta nigibadi, tama alta tomoba mubo pololai moni bras nai, te bras nai dage nigiyu, te alta tolabo ni dage si me, te altade muabo nai dabe tigidali me nigao. Tama te aï pauabo genuai pou me, te aga muabo page me, nigibadi yao. ¹⁷Tama augwaligo te ugwa be bagulali te obode muabo ugwa nigibadi, tama te obo tigi ni pos dabe nigibadi, te tigi ni pos page daŋ walabo halobage me nigao. Tama augwaligo te obo bagulali madi tude muabo name ugwa me nigao. ¹⁸Tama augwaligo te ugwa be keabo te bono dabe nigibadi, te obo keabo me te tude enebo bobobage nil bras, te haliga bono bomonabo nai dabe badi, tama nigao. ¹⁹Tama augwaligo te Aron aga ogomani dali augwaligo te Tedali Gasagi Yai Be Habuba augwali te pris se igi pabo sogo muabo ugwa, te gasa wiegi yai mu nigao.”

Te we bidi augwaligo Godiba maiabo nai dabe selasa asali

²⁰Tialima, tama tigidali Israel we bidigo Moses tagalama, tama palio. ²¹Tama Mosesgo wali pogo te Israel we bidi hauwa augwali homude enebaso, tama augwaligo te Mosesgo wali po tiwai gilama te se yainogo yali. Tama augwaligo nai dabe te Genuai Bidiba sela pelama, agai ugwa be se emainogo yai. Tama augwaligo te lotu wabo nai dabe tigidali me, tama te ugwa bede se yabo tigidali nai dabe badi, te pris dabego gudabo ugwa nigibo nai dabe tigidali sela pai. ²²Tama tigidali we bidigo homugo, te augwaligo e tobage haniani au dobage dabe sela pali, gudubo ugwade walobo pin me, olode walobo ring me, nogode mubo ring me, magede domobo beli me, tama golgo haniani doado bage sela pai. Tama te we bidi dabe augwaligo te doado bage te Genuai Bidibolo te ofa tiwai elama, mu mawai dao. ²³Tama meba we bidigo te gasa au wiegi yai ugwa, me te sisi yai, ma te mama yai sipsip nisigo, me te meme nisigo, me te omai sipsip wali te augwaligo mama pengo pilai badi, te tamu aïde elalubo wiegi yai hasa sikau wali badi, te tama doado bage elaluali, te augwaligo te nai dabe sela asai dao. ²⁴Tama tigidali we bidigo te silva me bras elaluali, te augwaligo sela aselama, tama Genuai Bidi magasai. Tama te ni akas elaluali bidi dabego te ugwa be se yabo ni sela asai.

²⁵Tama te hobi gudubo koneani tigidali we, augwaligo te sisi yai me mama yai sipsip nisi selama, te hobi gudai. Tama augwaligo te wiegi yai ugwa nigabo te tedela yai hobi nigai. Tama augwaligo te hobi dabe dali, te wiegi yai tedela yai name ugwa me, selasa asai. ²⁶Tama te meme nisigo te hobi gudubo bugagia koneai we dabe mebago, te hobi augwaligo bugagia gudai dao. ²⁷Tama te tobolu bidi dabe augwaligo wiegi wiegi yai masigi te ugwaba, me te het pris bidigo hagawiade mubo ugwa, me te aga magede mubo ugwade muabo masigi dabe selasa asai. ²⁸Tama augwaligo

te gasa tigi, me tedali yai pauda, me wel, me sanda te wel nigilama, te Genuai Bidigo naiba sa muyu nigabo nai, me te lam dabeba muabo nai, me te denami emainogo munama nigabo nai dabe selasa asalio. ²⁹Tigidali Israel we bidigo Genuai Bidibolo nai maiabo homu yali bage, augwaligo dwagi yai homu eyu, te Genuai Bidigo se te Mosesbolo yao wali, te se yainogo, te nai dabe olo sela asai.

Te Godigo ugwa be se yabo bidi dabe po wali

³⁰Mosesgo te Israel dabe augwalibolo e tiwai po wai, “Genuai Bidigo te Besalel sa muani, te Urigo ogwa, tama Hur te aga waj, te Juda hani dao. ³¹Tama Genuai Bidi Godigo digi aga noma bidi te agabolo mani, tama agai homu kolesaga wiegi yai elaluyu, tama tigidali haniani se ebo kolesaga wiegi yai koneai elalui. ³²Tama agai homude bugagia koneama, tama te gol, me silva, me bras, te nai dabego te se emainogo yai. ³³Tama agai te wiegi yai au yabo masigi togobo me, te ni dulama te todogo pabo se me, te gasa au yabo nai meba togobo dabe me, te tigidali agai koneai. ³⁴Tama Genuai Bidigo wiegi yai kolesaga te Besalel de Oholiap, te bidi sibolo mawai, te Oholiap aga te Ahisamakgo ogwa, te Dango hani dao. Tama augwali sigo te gasa bidi dabego te se dabe emainogo ola mabo te usu yaibao. ³⁵Genuai Bidigo te bidi si te haniani se yabo homu kolesaga mawai dao, te masigi togobo se, me te gasagi yai au yai piksa noma nigibo se me, te wiegi yai gasa au yai ugwa hobolobo se me, te hobigo au ebo se me, te augwaligo sisi yai me mama yai sipsip nisigo augwaligo nigai. Augwali sigo te tigidali nai me, te piksa noma dabe me augwaligo nigainogo ebo, te augwali sigo te se dabe me ebo te usu yaibao,” Mosesgo te po wai.

36 ¹Te Mosesgo po ma weyu, te po me wai, “Genuai Bidigo wiegi yai homu kolesaga te Besalel de Oholiap, te bidi sibolo dali, te tigidali se ebo koneani bidi dabebolo dali, te se emainogo eyu mani, tama augwaligo te Godigo ugwa be se yabo nai tigidali nigibo te usu yaibao. Tama te bidi dabego naga te tigidali nai dabe te Genuai Bidigo po wali gilama te se yainogo yao.”

Te we bidi augwaligo doado bage hauwa sela asai

²Tama nosali Mosesgo Besalel me, Oholiap badi, i weyu, tama te Genuai Bidigo wiegi yai homu kolesaga mani bidi augwali tigidali i wai. Tama te se ebo godolo homu ebo bidi dabe augwali asali, tama Mosesgo augwalibolo te se gagalama yao, te po wai dao. ³Tama Mosesgo te bidi dabe augwalibolo te Godigo ugwa be se emainogo te Israel dabego sisinani nai tigidali te augwalibolo mawai. Tama tigidali sogo kigamu te Israel we bidi augwaligo te Godibolo te ofa tiwai maiabo nai dabe selasa pabo se idu geai. ⁴Tama tibaso, te ugwa be se ebo bidi dabe augwaligo

te nai dabe sela asobo sulama, tama augwa ebo se tagalama, ⁵tama aselama, Mosesbolo e tiwai po wagasali, “Te we bidi augwaligo te doado bage hauwa sela asali. Te tigidali se yabo nai dabe te usu yali, te Genuai Bidigo dabolo te se emainogo wali po gilama. Tama te doado bage meba hauwa te olo munaluaibao,” augwaligo te po wai. ⁶Tialima, te tiwai Mosesgo te tigidali we bidi bidibo madi po ola tolai, “Dage we bidigo te Godigo ugwa be se yabo nai dabe me sela aselamu.” Augwaligo te po odama, tama te nai dabe augwaligo me sela pabeo. ⁷Te we bidi dabego sela asali tigidali nai dabego te ugwa be se yabo te usu elama, te daɣi ela pelama, tama meba olo munaluai dao.

Augwaligo te Godigo ugwa be se yani

⁸Te tigidali se bidigo te se ebo mu koneama, tama augwaligo te Godigo ugwa be se yai. Augwaligo te ugwa be se yani, te genuai ugwa name nogo sigo se yai. Augwaligo te gasa wiegi yai ugwa selama, tama augwaligo te mama yai, me sisi yai hobigo te name ugwa au ilai, te hobi te augwaligo sipsip nisigo nigai. Tama te se mu koneai bidi augwaligo te mobo bidi ensel noma te tigidali ugwade hobobolo pai dao. ⁹Te ugwa deli deli bobage usu sali, te 12 mita, te aga genuai usu nama te si tama 2 mita, tama tigidali ugwa te deli tigi poai naga dao. ¹⁰Augwaligo te a naga ugwa dali te bobage iliyu, tama te gasa a naga bobage ugwa te tiwai naga elama hobolai dao. ¹¹Tama augwaligo te ring meba te husugu ugwago nigilama, tama tego te genuai bobage ugwa siba wadolainogo hobolai. ¹²Te augwaligo 50 ring te hasia ugwa me dedeli sesegede kenani, tama te tiwai naga augwaligo me si wali te ugwa sesegede kenai dao. ¹³Tama augwaligo te 50 huk gol nigilama, tama te genuai ugwa si dali te huk dabego daɣi olama, tama deli ugwa poai naga pedelai dao.

¹⁴Tama augwaligo te ugwa be haluabo genuai ugwa me dedeli nigai. Augwaligo te ugwa 11 nigali, te augwaligo meme nisigo nigai dao. ¹⁵Te ugwa deli deli bobage usu sali, te 13 mita, tama te genuai dabe usu nama, te si tama 2 mita, te tigidali usu sali te deli tigi poai naga yai. ¹⁶Augwaligo te nogo a naga ugwa dali hobolali, te bobage ugwa dedeli pedelai. Tama augwaligo te ugwa 11de te gilama tiwai naga yai dao. ¹⁷Tama augwaligo te 50 ring ugwa te hasia ugwa sesegede mubadi, te me ugwade te 50 te gasa me ugwa sesegede kenai. ¹⁸Tama augwaligo te 50 te huk bras te ugwa si dali kenabo te nigilai. Tama te ugwa si te genuai deli tiwai naga pedelai. ¹⁹Nosali augwaligo te ugwa be haluabo gasa nai me te augwaligo mama yai pengo pilai te omai sipsip waligo nigai. Tama nosali me augwaligo te sela wabo te be haluabo nai te tamu aɣide elalubo hasa nogi sikau waligo nigai. Te si haluali madi ugwadu muainogo nigai.

²⁰Augwaligo te ugwa be daga ni name te ni akasgo nigai dao. ²¹Te ni name tigidali bobage usu sali, te 4 mita, tama te ni name genuai usu

sali usu ni te 66 sentamita dao. ²²Augwaligo te ni name dabe dwasianu bobage gana togolama, te be dili ni te page nai tomode daꝓ walomainogo yai. Tama augwaligo tigidali ni name te tiwai naga nigali. ²³⁻²⁴Tama augwaligo te ni name dabe te bidi sese deli te tꝓ sesege badu muabo nigibadi, tama te silva page halobage te bidi sese si te augwaligo te dodolabo ni name nigilama, tama te halobage si te ni name deli deli dologode te ni name page daꝓ walama, elalumainogo yai. ²⁵Tama augwaligo te tꝓ sesege me badu te bidi sese dodolabo ni name nigali, ²⁶tama augwaligo te bidi sese si silva halobage nigilama, te ni name page dabe daꝓ walomainogo yai. ²⁷Tama augwaligo te dodolabo ni name me sela me sela te be tуди badu, te ugwa be te sia ge dega sigi pabo badu nigali. ²⁸Tama augwaligo te ni nami si te ugwa be tуди badu te dage badu nigali. ²⁹Augwaligo te be dage si aiyadu ugwaba digigo daꝓ wawalo holai. Augwaligo te tiwai seꝓ te si dali si dage badu te tiwai yali. ³⁰Tama te be tуди badu muani ni name te 8 badi, tama te 8 ni name dabe page daꝓ walabo silva halobage dabe elaluali. Te silva halobage si te tigidali dodolabo ni name deli deli dologode elalua muani.

³¹⁻³²Tama augwaligo te obo tuabo bobage ni meba te ni akasgo nigai. Augwaligo te tꝓ sese me badu te obo tuabo ni nogo a naga nigibadi, te obo me badu sese badu tuabo ni a naga nigiyu, te sia ge dega sigi pabo tуди badu obo tuabo ni a naga nigiyu yai. ³³Te ni name dabe tomode daꝓ walama tuabo ni dabe, augwaligo te be dolo usu nama bobage togai dao. ³⁴Tama augwaligo te be daga ni name dabe te golgo haluama, tama tigidali ni name deli delide te ring gol meba keꝓnama, te bobage ni dabego te be daga ni dabe keꝓani daꝓ walali. Tama augwaligo te ni name dabe me te golgo haluai dao.

³⁵Tama augwaligo te ugwa be tomode walabo daꝓ te gasa wiegi yai genuai ugwa me deli nigai. Tama augwaligo te sisi yai, me mama yai sipsip nisigo nigai hobigo te ugwa au ilai. Tama te seꝓ mu koneai bidigo te mobo bidi ensel piksa noma te ugwade hobobolo pai dao. ³⁶Tama augwaligo te genuai daꝓ ugwa walabo pos me si me si te ni akasgo nigai. Tama augwaligo te pos dabe te golgo haluama, tama te ugwa walabo gol huk dabe te posba muai. Tama augwaligo te silva page daꝓ walabo halobage me si me si te pos dabe dodolabo madi nigai. ³⁷Tama augwaligo gasa wiegi yai genuai ugwa te ugwa be tuꝓde muabo nigai. Tama augwaligo te gasagi yai hobi dabego bugagia au ilama, tama augwaligo te au yabo sisi yai hobi, me te mama yai hobi te sipsip nisigo nigai dao. ³⁸Tama augwaligo a naga pos nigilama, tama augwalide te huk dabe keꝓnama, tama te ugwa dabe walabo madi tama tiwai nigilai. Tama augwaligo te gol selama, te pos toboluba halubadi, tama te posba wadolabo ba dabe me tiai. Tama augwaligo a naga halobage bras, te pos dabe dodolabo madi te me nigai dao.

Augwaligo te bomai po muabo halobage nigali

37 ¹Te Besalel dali se ebo bidi dabe augwaligo te bomai po muabo halobage te ni akasgo nigali, te aga bobage usu nama nedali, te 110 sentamita, tama aga genuai yali usu nama, te 66 sentamita, tama aga ugwadu me te usu nama, te tiwai naga te 66 sentamita naga tama nigalio. ²Tama augwaligo te halobage te wiegi yai golgo te tomo badu me, te bulu badu me haluama, tama augwaligo bobage gol me deligo te halobage sesege badu bagulai. ³Tama te ring gol me si me si te halobage tolabo nigali, tama te ring dabe te saḡa me si me si tede keḡnani, te me si me badu keḡnyu, te me si te me badu keḡnyu yai. ⁴Tama augwaligo te bomai po muani halobage tolabo ni dage si te ni akasgo dulama, tama te ni si te golgo haluai. ⁵Tama te ni dage si te ring dedage siba me badu me, me badu me palama muani, te halobage tolainogo tiwai.

⁶Tama augwaligo te halobage po paliabo nai te wiegi yai golgo nigai, aga te dwai se yali seḡe sela saḡo pesage dao. Te aga bobage usu nama usu sali, te 110 sentamita, tama aga genuai yali usu sali, te 66 sentamita tama nigai. ⁷Tama augwaligo te gol selama, tama te hamago haluama, tama mobo bidi ensel si nigai. Te mobo bidi ensel si te halobage po paliabo nai nigali si badu dolaluai. ⁸Tama te mobo bidi ensel si te me deli te dolo nogo badu dolaluyu, te me deli te pobase nogo badu dolaluyu yali. Augwaligo te mobo bidi ensel si nigibadi, tama te halobage po paliabo nai te deli nai tigi tiwai naga nigai. ⁹Te mobo bidi ensel augwa siba digi ma tonononaluyu, tama aba te halobageba me tonononaluyu, tama augwali sigo bogo te dinigaluyu, tama te halobage po paliabo nai geme dualama elalui.

Augwaligo te bretgo tebol nigai

¹⁰Tama augwaligo tebol sai te ni akasgo nigali, tama bobage usu nama usu ni sali, te 88 sentamita, tama aga genuai usu sali, te 44 sentamita, tama ugwadu usu sali, te 66 sentamita, te tama tiai. ¹¹Tama te tebol augwaligo te wiegi yai golgo haluama, tama bobage golgo te sesege badu bagulai. ¹²Tama te gol dage me augwaligo te ugwadu dai tigidali sesege badu keḡnani, tama aga genuai usu sali, te 8 sentamita teba sabolali. Tama augwaligo te dwasianu golgo te tebol ugwadu dai sesege tigidali bagulama au yai dao. ¹³Tama augwaligo ring gol me si me si nigilama, tama te tebol dage dabe me si me si te tebol saḡa dabede keḡnai dao. ¹⁴Tama te ni tolaluali ring dabe te tebol tolobo nai augwaligo te sesege de paḡe ugwadu daiba muai. ¹⁵Tama augwaligo te tebol tolabo ni dage si te ni akasgo nigai, te si te golgo haluai. ¹⁶Tama augwaligo te tebolde muabo pou me te doado bage dabe te wiegi yai golgo nigai. Te wain aḡi ofa ilibo pou dabe, tama te plet dabe me, te kap dabe, me botol, te nai dabe tama

te ofa yabo nai dao, tama augwaligo te nai dabe te wiegi yai golgo naga nigai.

Augwaligo te lam sole dabe tolaluabo nai nigai

¹⁷Tialima, augwaligo te wiegi yai golgo te lam sole dabe tolaluabo nai nigai. Tama augwaligo te gol hamago haluama, tama te lam dodolabo madi te pesage nigilama, tama lam nogo dabe muabo digi te lam tolalubo nai elalui. Tama augwaligo te ni duduli dabe te golgo nigilama, te lam tolaluabo nai au ilai. Augwaligo te deli tigi tiwai nai naga tigidali nigai dao. ¹⁸Te lam tolaluabo naigo nogo ageali, te me sela me sela elaluali, te me sela me badu elaluyu, tama me sela te me badu elaluyu yai. ¹⁹Augwaligo te tigidali nogo age deli deli te ni duduli sela, te ni amon duduli tiwaigo au ilai dao. ²⁰Tama augwaligo te lam tolaluabo nai au ilali, te ni duduli me si me sigo au ilai, tama te ni amon ni duduli tiwai tonobo aq yalio. ²¹Tama augwaligo te dwasianu ni duduli yabe dabe te lam ageali si si dologode nidigili pai dao. ²²Augwaligo te wiegi yai gol naga me dedeli selama, tama augwaligo te dabe nigilama, tama deli nai tiwai naga mu pedelai. ²³Tama augwaligo te gol nogo a naga olama me si lam genagi nigilama, tama selama, te lam tolaluabo naiba muainogo nigali, tama te lam genagi deli deliba muabo hobi, me te plet meba badi, te tama nai nigai dao. ²⁴Augwaligo te sege te 35 kilo elalubo te wiegi yai golgo te lam tolaluabo nai, me te aga muabo nai dabe tigidali nigai dao.

Augwaligo te denami ebo nai ulabo alta nigali

²⁵Augwaligo te ni akas selama, tama te denami ebo pauda ulabo alta nigai. Te tigidali sesege badu te deli tigi poai yali, te 45 sentamita usu naga tiwai, tama ugwadu usu sali te 90 sentamita daq yali. Te altade te tiwai nai te bulmakau gaq me si me si augwaligo dulama, tama te deli deli te alta kele ni dagede muai. ²⁶Tama augwaligo te nai me si me si ugwadu bogo badu haluama, tama te gaq me si me si me te golgo haluai. Tama augwaligo te bobobage golgo te tigidali sesege bobegelama paliai. ²⁷Tama me badude augwaligo te ni palabo madi te ring si golgo nigali, te alta tolabo madi nigilama, tama gasa badu me tama tiali, tama augwaligo te ring me si me si te alta ugwadu sesegede muai. ²⁸Tama te alta ni palabo ni dage si augwaligo te ni akasgo nigilama, tama te ni si te golgo haluai.

Augwaligo te wel me, denami ebo pauda me nigai

²⁹Tama augwaligo te wel nigilama, te Genuai Bidigo nai dabe da olama sa muabo wel dao, tama te begelali, te sanda tiwai dolo mu yai. Tama augwaligo te wiegi yai paudago te wiegi yai denami yabo nai nigali, tama augwaligo bugagia taluai dao.^c

^c 37:29 Sai 30:22-38

Augwaligo te ofa ebo nai dabe ulabo alta nigali

38 ¹Te Besalel dali, te sę ebo bidi dabe dali, augwaligo te ni akas selama, te ofa ebo nai dabe ulabo alta sai nigai. Te alta sesegede te tigidali te deli tigi poai naga yali, te 2 mita 20 sentamita te usu tama yali, tama ugwadu usu sali, te 1 mita 30 sentamita, te tiwai usu sai dao. ²Tama augwaligo te bulmakau gaę tiwai nai me si me si habu badu te ugwadu, te tiwai nai me si me si dulama, tama te gaę dabe te altade mu daę wai. Tama te alta tigidali augwaligo te brasgo haluai dao. ³Tama augwaligo te bras selama, te sia munama tolabo plet dabe badi, te dwasianu savol dabe me, te pou dabe badi, te age age yai na dabe me, tama te sia nogani keli sabo pou dabe, te tama nai dabe tigidali nigai. ⁴Tama augwaligo te bras selama, tama te moni sawali bras nigiyu, polola polola pelama, tama te nai nigilama, tama te nai te alta halobage tomode elalumainogo eyu, muani. ⁵Tama augwaligo te ring bras me si me si nigilama, tama te alta dage me si me si dage badu kenai. Te ring dabe te ni munama, te alta tolabo digi nigai dao. ⁶Tama augwaligo te alta tolabo te ni akas si dulama, tama brasgo haluai dao. ⁷Tama augwaligo te ringba te alta si dali si badu muai. Te alta te augwaligo ni namego nigai halobage tiwai yali, tiali goli aga pagede te ni name meni yai.

Augwaligo te aį pauabo genuai pou nigai

⁸Tialima, te Godigo ugwa be tų mabode sę ebo we dabe augwaligo te bras Besalel bolo mawai. Te bras te augwa gesabi subo dula dabe tiwai. Tama te sę ebo bidi dabego te bras selama, tama te wę pauabo genuai pou me deli nigibadi, te pou muabo page me deli nigibadi yai dao.^d

Te Godigo ugwa be bobegelali obo po

⁹Augwaligo te Godigo ugwa be bagulabo obo ugwa nigali. Te sesege bogo badu bobobage usu sali, te 44 mita te usu tiwai. ¹⁰Tama augwaligo te bras selama, te bidi sese pos nigibadi, te pos dabe page dodolabo halobage te bidi sese nigali, tama augwaligo te huk dabe, me te ba dabe te silva dabego nigai. ¹¹Tama augwaligo te deli tigi poai naga te me sesege badu nigai dao.

¹²Tama te sia ge dulubo badu te name ugwa me deli walai elaluali, te ugwago bobage usu sali, te 22 mita elaluai, tama nogo si pos bras badi, te me nogo si te pos page dodolabo te halobage bras dabe elaluai. Tama te posde kenabo dabe me, te ba me, te nai dabe augwaligo te silvago nigai. ¹³Tama te giliga pedalu badu obo me te usu sali, 22 mita yai. Tų te obo badu elaluai. ¹⁴Te obo me deli te sesege badu te tų sesegede te

^d 38:8 Sai 30:18

ugwa me deli walai elaluali, te ugwa aga bobage usu sali te 6 mita ma 60 sentamita usu sali tiwai yali, tama pos sela elaluali, me sela te pos dodolabo halobage nigai elaluai. ¹⁵Tama augwaligo te deli tigi poai nai naga te gasa tų sesege obo badu nigai dao. ¹⁶Augwaligo te gasa wiegi yai ugwa tigidali naga te obode walabo nigai. ¹⁷Augwaligo te bras selama, tama te pos dabe page dodolabo halobage nigali. Tama augwaligo te silva selama, te huk dabe nigali, tama te pos dabe kęabo ba te nigai. Tama augwaligo te pos tobolude te silvago naga haluai. Tama te tigidali obo pos dabe augwaligo te ba silvago naga wadolai dao.

¹⁸Tama augwaligo te obo tųde muabo ugwa wiegi yai mu nigai. Tama augwaligo te ugwade au ilibo nai hobolali, te haniani hobigo, tama te husugu sipsipgo, me te mama yai sipsip nisigo nigai hobigo hobolai. Te ugwago bobage usu sali, te 9 mita tama yali. Tama te ugwa ugwadu dai badu usu sali, te 2 mita 20 sentamita yali, te obo bagulali ugwa te tiwai nigai. ¹⁹Tama augwaligo te bras halobage me si me side dolalubo te pos me si me side te ugwa walai. Tama te huk dabe me, te pos tobolu haluali nai me, te posba wadolali ba dabe me, te augwaligo silvago naga nigai. ²⁰Tama augwaligo te bras selama, tama te tųba enebo bobage nil dabe nigai, te bomonama kekelama tama te ugwa be dolaluabo bono dąq waliyu, tama te ugwa be bobegelali obo dąq waliyu yainogo tiwai dao.

Augwaligo Godigo ugwa bede sę yabo haniani kapa sali

²¹Tama augwaligo te tigidali nai nigali gol, me silva, me bras nedali, augwaligo te tobage wiegi yai kapago nigali nai te Genuai Bidigo ugwa bede muani nai dao. Te ugwa be da, te Godigo nogo si bomai po elalubo masigi pedai si elalubo be dao. Tama Mosesgo digi te Livai dabe augwalibolo te nai nedao po olama, tama augwaligo nedelama, tama nisu naga gol elaluali te augwaligo aseani. Itama, te pris Arongo ogwago te Livai dabego te sę ebo tonaluai dao. ²²Tama Besalel, te Urigo ogwa, tama Uri te Hurgo ogwa, te Juda hani dao. Tialima, Besalelgo te Genuai Bidigo Mosesbolo wali po gilama te tigidali nai nigibo sę yalio. ²³Tama Oholiap te Ahisamakgo ogwa, te Dango hani bidi dao. Te Oholiapgo te wiegi yai masigide asebo po togobo sę konebadi, tama agai te haniani gasa nai dabe nigibo sę me koneai. Tama agai te haniani gasa hobi dabego te au ilibo sę me koneyu, te sisi yai hobi, me te mama yai hobi, te tobage sipsip nisigo nigai hobigo te au dabe ilibo sę koneai dao. Agai te Besalel dologode bidiyu, aga tau sali. ²⁴Augwaligo te we bidigo te Godigo ugwa be sę emainogo sela asali nai dabe te tigidali gol nedai, tama te nai dabego aga seęę da te e tiwai, te 1,000 kilo usu dao.

²⁵⁻²⁶Tama augwaligo te silva nedali, tama te naigo seęę te tiwai, te bidi sese hauwa, te 3,430 kilo seęę yai. Te silva te bukude augwa nogi aseña elaluali bidi dabego sela asai. Te bidi dabego kibu be te bidi sese delidu

ugwaba holali bage, augwali deli deligo te silva monego te mone ge a naga muani. Te bidi dabe te bidi sese hauwa mu, te 603,550, te tama bidi te mone muna muna pai dao.^e ²⁷Tama augwaligo te silvade seḡe 3,400 kilo yali, te Godigo ugwa be dili te daḡ walabo nai nigali, tama te pos dabe page dodolabo halobage me, te Tedali Gasagi Yai Be Habu me, te Tedali Gasagi Yai Mu Be Habu me, te madi si te dualabo madi nai nigai. Te bidi sese a naga te 100 halobage elaluai. Te silva dage halobage deli deligo seḡe te 34 kilogram elaluai dao. ²⁸Tama me badu te munaluali silvago seḡe te 30 kilo usu tama elaluai. Tama te munaluali silvago augwaligo te huk nigilama, tama te pos dabede wadolama, tama te pos dabe ugwadu haluainogo tiwai seḡe yai dao.

²⁹Te augwaligo Genuai Bidiba mani tigidali brasgo seḡe te bidi sese hauwa mu, 2,425 kilogram igi pai dao. ³⁰Tama augwaligo te bras selama, tama te pos dabe dodolabo halobage nigali, tama te Godigo ugwa be tuḡe muainogo yali nai me, tama alta dali te alta tomoba muani pololai sawali bras, te nai dali elaluai, tama te altade seḡe yabo nai dabe tigidali nigai dao. ³¹Tama augwaligo te ugwa be bobegelabo te pos bulabo halobage dabe, me te obo bagulali madi tuḡe nigabo nai dabe nigai. Tama augwaligo te toḡba enabo bobage nil dabe, te ugwa be bomonama kekalumainogo daḡ walobo nai nigiyu, tama te ugwa be bobegelabo nai me nigai dao.

Augwaligo te pris dabego gudabo ugwa dabe nigai

39 ¹Augwaligo te sisi yai sipsip nisi, me mama yai sipsip nisigo nigali hobi te augwaligo selama, tama te gasa wiegi yai ugwa te pris dabe augwaligo gudabo ugwa au ilama, te pris dabe augwaligo te Tedali Gasagi Yai Be Habu, te be habuba pelama, te pris seḡe ebo sogo te ugwa muani. Tama augwaligo te Genuai Bidigo Mosesbolo wali po gilama te Arongo pris seḡe eyu muabo ugwa nigai dao. ²Augwaligo te wiegi yai ugwago te tobolu bidi pris gudabo wiegi yai ugwa nigilama, tama augwaligo te gol hobigo au ilama, tama te sisi sipsip nisigo, me mama sipsip nisigo nigai. ³Augwaligo te gol hamago haluama, tama te pepa yabe tiwai pedelai. Tama te gol te hwaḡ gego bugagia pedama, tama hobi tiwai te golgo nigali. Tama augwaligo te ugwa hobolo dwasianu gol hobi tiwai dali, te gasa haniani hobi dabe dali gelali, tama sisi hobigo me mama hobigo badi, tama togolama hobolai, te tobage seḡe mu koneai bidigo ebo seḡe tiwai naga tama yai. ⁴Tama augwaligo te nagede abebolabo kukulu si te ugwago nigilama, tama ugwago digi ma hobolai. ⁵Tama augwaligo wiegi yai ugwa pedai selama, tama te sesegedu bagulabo kukulu, te haliga tiwai kukulu te ugwago nigai. Tama augwaligo te gasa haniani hobi dabe selama, tama tede au ilali, te Genuai Bidigo Mosesbolo wali po gilama te tiwai seḡe yai dao. ⁶Tama augwaligo te masigi konilian si

^e 38:25-26 Sai 30:11-16; Mat 17:24

te sisi ela munama, tama Jekopgo ogwa 12 te augwali nogi te masigi side aseñama togwali. Tama te masigi si augwaligo te dwasianu golde keñanio. 7Tama augwaligo te masigi name si te nagede muani te ugwago nigali kukulude keñani, te Genuai Bidigo Mosesbolo wali po gilama tama tiai. Tama te masigi sigo te Israel hani 12 te hani sa muai dao, te Genuai Bidigo augwalide sesemane sogo homugo kone palomainogo eyu yali.

Augwaligo te hagawiade muabo dwasianu ugwa nigai

8Tama augwaligo te hagawiade muabo ugwa te tobolu bidi prisgo gasa ugwa te tiwaiño naga nigai, te tobage se ebo koneai bidigo ebo tiwai naga nigai. Augwaligo te ugwa te golgo nigai hobigo me, te gasa haniani hobigo me, tama au ilama, nigalio. 9Tama augwaligo te ugwa bobage yali me, te genuai me, te bugagia tomode sugunama, te usususi yali te nedali, 22 sentamita teba sabolai. 10Tama augwaligo te gasa wiegi yai masigi hani me si me si keñani. Te hasia polali hani augwaligo te masigi hani rubi, me topas, me ganet, te tama masigi bolo podolama keñai. 11Tama te hani side augwaligo te masigi emeral, me sapaia, me daimon, te tama masigi dabe keñai. 12Tama te hani me sela te masigi tekois, me aget, me ametis, te tama hani masigi augwaligo keñani. 13Tama te hani me si me side te augwaligo te masigi hani beril, me konilian, me jaspera, te tama masigi augwaligo keñani. Augwaligo te deli deli masigide te dwasianu gol au ilabo dañ walobo nai muani, tama nosali augwaligo te masigi dabe te ugwa daide, keñai dao. 14Te tigidali masigi nogo si olama saña me badu si, te masigi deli delide augwaligo te Jekopgo ogwa nogi deli deli aseñe pali, te tigidali Israel hani sa muyu, tiai dao.

15Tama augwaligo te wiegi yai golgo te sen si nigali, te hagawiade muabo ugwa dañ olama, tolalumainogo tama tiwai dao. 16Tama augwaligo te au ilubo gol si nigibadi, te ring gol si me nigai. Tama te ring si te hagawiade muabo ugwa dage si badu te nai muai. 17Tama augwaligo te sen gol deli deligo sabi te ring sigo keñai dao. 18Tama augwaligo sen gol deli deligo gasa sabi te au yai gol sigo keñani, tama augwaligo te au yali nai te ugwa tolalubo kukulude keñai dao. 19Tama augwaligo te ring me si ma nigilama, tama te sabi si dabe aiyadu te hagawiade dañ wali, te genuai ugwa pađe te keñai dao. 20Tama augwaligo te ring me si ma nigali, tama te kukulugo te ugwa keñalubo madi keñiyu, te gasa wiegi yai kukulugo te tabi bagulali pađe keñai. 21Tama augwaligo sisi yai string bono sobadi, tama te ring si te hagawiade elalubo ugwa te ring si sobadi elama, te genuai ugwaba keñai. Tama te hagawiade muani ugwa te kukulude dañ olama, tama me tulaluidali weyu dañ wai. Augwaligo te Genuai Bidigo Mosesbolo po walali gilama wali peyu, te tiwai se yalio.

Augwaligo te pris dabego gasa ugwa dabe nigali

22Tama augwaligo husugu hobi selama, tama te bobage gudubo ugwa te holobo ugwa dali daganama hobolalio. 23Tama augwaligo te tobolu

muabo madi sesege badu te dedage daꝓ olama hobolali, te ugwa dedage peda pelama, genuai me idali weyu. ²⁴⁻²⁶Tama augwaligo gasa haniani hobi dabe selama, tama nai meba te ni pomigranet du tiwai hobolai. Tama augwaligo dwasianu belo te wiegi yai golgo nigai. Tama augwaligo te ni pomigranet du me, te belo me, te tobolu bidi prisgo gudabo ugwa aiyadu sabide walama hobolai. Augwaligo te deli deli gol belo te ni pomigranet du dabe tomo tomode te walalumainogo hobolama walai. Augwaligo te tiwai seꝓ te Genuai Bidigo Mosesbolo po wali gilama tama tiai dao.

²⁷⁻²⁹Augwaligo te Arongo holobo ugwa me, te agai ogomanigo holobo ugwa me nigibadi, tama te tobolude bagulabo ugwa pedai dabe me, tama te peꝓadage belibo trausis dabe me, tama te moꝓ tiwai kukulu dabe me, te tama nai nigai. Te augwaligo wiegi yai name ugwa selama, tama te nai dabe nigai. Tama augwaligo gasa haniani hobi selama, tama te moꝓ tiwai nigali kukulude hobolama, wiegi yai au ilali, te Genuai Bidigo Mosesbolo po wali gilama wali peyu, te tiwai seꝓ yai. ³⁰Tama augwaligo te medal te wiegi yai golgo nigali, tego te het pris bidi te Genuai Bidigo bidi da olama sa muani. Augwaligo po me deli agade aseꝓu te tiwai po wai, “Te Genuai Bidigo Tedali Gasagi Yai Nai da.” Te po wai. ³¹Tama augwaligo husugu yai hobi bono selama, tama augwaligo te tobolude muani ugwade te medal kenani, te Genuai Bidigo Mosesbolo wali po tiwai gilama tama tiwai seꝓ yai dao.

Tigidali seꝓ silali po

³²Tama te ugwa be seꝓ yali tigidali silai. Tama te Israel dabe augwaligo te Genuai Bidigo te Mosesbolo po wali gilama te tigidali nai nigalio. ³³Tama augwaligo te nai dabe te Moses bidiboba sela pai. Augwaligo te ugwa be dali, te aga doado bage dabe badi, tama sela pali, tama te huk dabe me, te be daga ni name dabe me, tama te ni name tuabo ni dabe me, te pos dabe me, tama te ni name dodolabo halobage dabe, te tama nai dabe sela pali, ³⁴tama te ugwa be haluabo genuai nai augwaligo te omai sipsip waligo nigali, tama te haluabo nai me augwaligo te tamu aꝓde elalubo hasa sikau waligo nigali, tama te Tedali Gasagi Yai Mu Be Habu te geme dualabo genuai ugwa walobo nigibadi yalio. ³⁵Tama augwaligo te daꝓ walali bomai po muani halobage me, te aga seꝓe sela saꝓo madi te po paliabo nai dali elalubo me sela asai. Tama te halobage tolobo ni si me sela asobadi yali, ³⁶tama te tebol me, te tebolde mubo doado bage dali, tama te God gedude te tebolde mubo te bret me, te augwaligo sela pai dao.

³⁷Tama augwaligo te wiegi yai golgo nigai te lam dabe tolalubo nai me, te aga doado bage dali me, te lamde muabo wel dabe dali, sela peyu, ³⁸te alta gol me sela pai. Tama augwaligo te Godigo nai sa muainogo te

wel sela pali, tama denami ilibo pauda me, tama te ugwa be tũde mubo ugwa me sela palio. ³⁹Tama augwaligo te brasgo nigai alta me, te pololai sawali bras te alta halobage tomoba muabo nai, te dali sela pai, tama te alta tolobo ni dabe me, tama te tigidali altade nai dabe badi, tama te wę paubo pou me, te aga page dali, sela pali. ⁴⁰Tama augwaligo te ugwa be bobegelabo obo ugwa dabe badi, te pos dabe dali, tama te pos dodolabo halobage me, te obo tũde muabo ugwa me, te obo daų walabo bono dabe dali, te tũa enabo bobobage nil dabe, te bono bomonobo nai dabe badi, tama nai dabe sela pai. Augwaligo te ugwa be tomode sę yabo nai dabe tigidali sela pai. ⁴¹Tama te pris dabego te Tedali Gasagi Yai Be Habu tomoba pelama, te pris sę eyu, te gudabo wiegi wiegi yai ugwa dabe, te me augwaligo sela pai. Te ugwa dabe te Godigo te pris Aron aga ogomani dabe dali augwaligo naga te ugwa gudama, te pris sę emainogo sa munama, te tedali gasagi yai ugwa dabe elalumainao wali.

⁴²Te Israel dabe augwaligo te tigidali sę yali, te Genuai Bidigo Mosesbolo wali pode naga te tiwai gilama sę yai dao. ⁴³Tialima, Mosesgo augwaligo te nigali nai tigidali bugagia tonono bilama, osola sulama, tama agai koneani, te Genuai Bidigo agabolo po weyu, te nigao wali nai te tigidali te tiwai naga nigai. Agai sulama, tama agai augwalibolo te po wai, “Genuai Bidigo wiegi yai sę bugagia mu dagego te sę yalio. Tama tibaso, eno homugo agai dage dali dwagi yai sę emainao,” Mosesgo te po wai.

Augwaligo te ugwa be sęnama, te Godigo be da olama, sa muani

40 ¹Tama Genuai Bidigo Mosesbolo te po wai, ²“Odao, te hasia nanobo polua, te dei deli wabode, te dagego eno ugwa be sę yao. ³Tama dagego te bomu yai po nogo si elalubo te halobage selama, tama te ugwa be tomoba munama, tama te halobage dualiyu, te genuai name ugwa walao. ⁴Tama te tebol tomoba sela pelama, tama te nai dabe ugwadu daiba manao. Tama te lam dabe tolalubo nai sela aselama, tama te lam dabe te aga nogoba muao. ⁵Tama te denami ebo pauda ulubo alta gol te bomu yai po haluali ugwa te sesege e bulu badu pađe muao. Tama te ugwa be tũde ugwa walao. ⁶Tama te ofa dabe yabo genuai alta te ugwa obo tų pađe muao, te mesalode. ⁷Tama te wę pauabo genuai pou te mesalode muao, te ugwa be de te alta si tomode, te ađi pağanama, muao. ⁸Tama te ugwa be bagulubo obo te dodolobadi, tama te genuai ugwa te obo tũde walobadi yao.”

⁹“Tialima, nosali te wel selama, te eno nai dabe sa muyu, tama te ugwa beba geliyu, te tomode munalubo nai dabe tigidaliba gelao. Te tiwai naga te dagego eno nai naga tigidali da sa muyu, tama tedali gasagi yai mu elalumainao. ¹⁰Tama te bras altaba te wel geliyu, tama te sę yabo nai tigidaliba tiyu, tama te alta me te Genuai Bidigo nai naga dao homu

eyu, tedali gasagi yai nai elalumainao. ¹¹Tama te tiwai naga te wẹ paubo genuai pouba me tiyu, tama aga te pageba me, tama te me te eno nai dao.”

¹²“Nosali nago te Aron aga ogomani augwali dali te ugwa be tɔba sela pelama, tama augwali tede wẹ paumainao. ¹³Tama te tobolu bidi pris ugwa te Aron tigiba muyu, te wel agaba sa muyu gelibadi, tama agai te eno te pris sẹ tiwai emainogo tiwai yao. ¹⁴Tama nosali nago aga ogomani augwali me te pɔba sela aselama, tama te pris au dobage augwali tigiba muao. ¹⁵Tama augwali te welgo mumuyu, te nago augwa aya sa muani gilama tiao, tama augwa enade te pris sẹ emainogo yao. Nago augwali te tiwai te welgo sa muao, tama nosali augwa digi, me te augwa hani dali, augwa te pris sẹ sesemane bidada pabo sogo te sẹ ela pomainao.” Genuai Bidigo te po wai dao. ¹⁶Tialima, Mosesgo te po odama, tama Genuai Bidigo agabolo te po wali te tigidali sẹ yai dao.

¹⁷Tama te hasia polua deli, te dei deli wabode, te kibu be side te augwaligo te Isip bulu taga soali, te bodolu nosali pedalobo sogo, augwaligo te Godigo ugwa be sẹ eyu yai dao. ¹⁸Te augwaligo te ni name dabe bulabo te halobage dabe selama, te tɔba munama, tama te be daga ni name dabe te halobage tomoba bulai, tama te ni name te ni name tuabo bobobage ni dabe munama, tama te genuai ugwa walabo te pos dabe bulai. ¹⁹Tama augwaligo te genuai ugwa te ugwa be pedu dili ugwadu munama, tama te halubo nai sela selago te ugwa be haluali, te Genuai Bidigo te Mosesbolo wali po gilama te tiwai sẹ yalio.

²⁰Tama augwaligo te Godigo bomai po aseai masigi pedai si selama, tama te masigi si te daɟ wali bomai po muabo halobage tomoba muai. Tama augwaligo te ni dage si te halobage tolabo madi nigilali dedage me si me siba muani, tama te halobage po paliabo nai, te da te seɟe sela sɔbo madi, te halobage daiba ugwadu muai dao. ²¹Tama te halobage te ugwa be tomoba munama, tama te halobage aga digi be habu elalumainogo eyu, augwaligo te moni wiegi yai daɟ ilibo name ugwa walama, te halobage te Tedali Gasagi Yai Mu Be Habu tama elaluali. Augwaligo te tiwai sẹ yali, te Genuai Bidigo Mosesbolo po wali gilama tama tiai dao.

²²Tama augwaligo te tebol te daɟ ilibo ugwa e badu muyu, te Tedali Gasagi Yai Be Habu me badu tomoba muanio. ²³Tama augwaligo te bret selama, te Genuai Bidigo gedude te tebolba muai, te Genuai Bidigo Mosesbolo po wali gilama te tiwai sẹ yai.

²⁴Tama te lam dabe tolalubo wiegi yai nai te me badu te tebol dolo si muanio, te Tedali Gasagi Yai Be Habu tomode. ²⁵Tama augwaligo te lam dabe te lam dabe tolaluabo nai te nogo age yaliba muani, tama te lam dabe te Genuai Bidi gedude udulali. Augwaligo te tiwai sẹ yali, te Genuai Bidigo Mosesbolo po wali gilama te tiwai sẹ yai.

²⁶Tama augwaligo te alta gol te Tedali Gasagi Yai Be Habu tomoba muyu, te daɟ ilibo wiegi yai name ugwa e badu muyu, tama muani.

²⁷Tama te altade augwaligo te denami ebo nai pauda ulali, te Genuai Bidigo po Mosesbolo wali gilama tama tia. ²⁸Tama augwaligo te ugwa be tũde te genuai name ugwa walai dao.

²⁹Tama nosali augwaligo te ofa ebo moni alta te ugwa be tũ pade muani. Tama te altade augwaligo te siago domainu tigidali ulubo kibu bulmakau me, te wit me, augwaligo ofa yali, te Genuai Bidigo Moses dali po wali gilama tama tia dao.

³⁰Tama augwaligo te wẽ pauabo genuai pou te alta de te ugwa be si tomode te aĩ pağanama muai dao. ³¹Tialima, nosali Moses me, Aron me, te Aron aga ogomani me, augwali nogo sağa te aĩde telawai dao. ³²Te augwali te Godigo ugwa be tomoba me te altaba painogo, augwaligo hasia bolo nogo sağa aĩgo tedelama, pai. Augwaligo te Genuai Bidigo Mosesbolo po wali gilama tia.

³³Tama augwaligo te ugwa be dali, te alta me, bagulabo obo dodolama, tama augwaligo te obo tũde me te ugwa walali. Tama Moses dali, te bidi dabe me, augwaligo te tigidali se yali, tama te ugwa be se yani te se tigidali silai.

Te pọ Godigo ugwa be ugwadu elalui

³⁴Tama te ugwa be se silibo si, teda Genuai Bidigo pogo te ugwa be mesega sagaselama, tama aga genuai bomo yai ulago te be pağanai sai dao.^f ³⁵Tama tiyu, Moses te ugwa be tomoba pabo te usu me ebe, magi baso meni, te Genuai Bidigo pọ me, te ula me, te ugwa bede elaluyu, tama te be pağanai sai dao.

³⁶Tama nosali te pogo te Godigo ugwa be taga pabo sogo da, teda te Israel dabe augwa tigidali doado bage selama, tama te pọ pabo wali pai dao. ³⁷Tiali goli, te pọ me te ugwa be ugwadu me bidibaso da, teda augwaligo te bulu me taga pabeo. Augwaligo suali, te pogo te ugwa be taga pabosi, teda augwali me hogodolama, tama te pọ wali peyu yai dao. ³⁸Te Genuai Bidi bidibo pọ te ugwa be ugwadu tigidali sogo bidai. Te siade augwaligo te pọ suali, tama hulide te pode sia elalubo suai. Te ela asali se tiwai tama me ela pidubadi, te Genuai Bidigo augwali mawainogo yali te tọ pedaiba augwali sabolama bidigi pai dao.

^f 40:34 1 Kin 8:10-11; Ais 6:4; Ese 43:4-5; Ped 15:8